

WANTOK

NIUSPEPA BILONG OL PAPUA NIUGINI STRET

32 pes

Namba 1072

Wik i stat long Fonde, Januari 12, 1995.

40 toea

Moa yangpela man smokim mariwana long Is Sepik provins

FUZO PAUL i raitim

HEVI bilong smokim spakbrus mariwana i wok long kamap wanpela bikpela hevi nau insait long Is Sepik provins.

I gat bikpela luksave insait long provins i stap olsem planti yangpela man na manki wok long smokim mariwana. Arapela samting i olsem namba bilong ol yangpela man na manki husat i save smokim spakbrus mariwana i wok long kamap bikpela long olgeta yia.

Mariwana em i wanpela spakbrus we gavman bilong Papua Niugini putim kamap lo we i tambuim ol manmeri long planim, salim na smokim. Tasol planti manmeri wok long planim, salim na smokim mariwana.

Bikos long i gat lo i tambuim ol manmeri long smokim dispela spakbrus, planti manmeri save hait na smokim. Bikos ol i pret long nogut ol plisman bai holimpasim ol na sasim

Wantok apim prais tu

Wantok niuspepa bilong yu bai kos 50t stat long neks wik.

Prais i goap long narapela 10t bikos strong bilong kina i go daun, na tu long bikpela kos bilong primum pepa.

Word Publishing Kampani i bin salim ol 4-pela niuspepa bilong em long olpela prais, bihain long ol arapela niuspepa i apim prais bilong ol. Tasol em i no inap long salim long wankain prais moa bikos long bikpela kos. Olsem na em i mas apim prais tu.

Long neks wik, *Wantok*, *The Times* na *PNG Business* niuspepa bai wanwan i kos 50t, na *Weekend Sport* bai kos 40t.

• Ol niuspepa bilong neks wik bai luk narakain tu. Wanwan bai gat nupela mashed na nupela logo we bai soim olgeta niuspepa bilong Word Publishing Kampani.

Ritim stori bilong ol wina bilong Word logo kompetisen, na tu lukim sampela entri long spesel, ripot long *Wantok* bilong neks wik.

ol.

Long Is Sepik provins, ol yangpela man na manki na tu sampela lapun man, i no save long pasin bilong hait na smokim spakbrus mariwana. Ol i save sindaun i sanap ples klia na smokim spakbrus mariwana-wankain olsem wanpela man o meri sanap na kaikai buai o dring wanpela botol Pepsi long ai bilong olgeta manmeri.

Sampela papamama insait long provins i save olsem ol pikinini bilong ol i wok long o i save salim mariwana. Tasol ol i no mekim wanpela samting long pikinini bilong ol. Ol i save pasim maus na stap lukluk tasol.

Pasin bilong smokim na salim mariwana i stap tu long ol skul insait long provins-komyuniti skul, haiskul, vokesenel senta na tu nesenel haiskul (Passam) insait long provins.

Planti lida long ol komyuniti, stemen, ples i save olsem i gat sampela yangpela man i wok planim, salim o smokim mariwana. Tasol wankain

i go moa long pes 4



Lod Meyas sil stap long kolples • Ol referi na opisal bilong Sogerl op sisen ilg resis i soim dispela Lod Meyas sil em ol i bin winim long long Krismas na Nu Yia wiken. Ol i winim Unagi tim. Foto: Jack Ami.

Nupela CIS bil laik stretim wok bilongol haus kalabus

GODFRIED YASSAFAR i raitim

WANPELA bikpela polisi Chan/Haiveta gavman bai mekim wok long kamapim em nupela Koreksinel Institusen Sevis (CIS) Bil.

Dispela nupela Koreksinel Sevis Bil bai kamap long stretim pasin bilong ol CIS opisa, CIS long karimaut wok gut, na tu long daunim ol hevi CIS i wok long bungim long nau yet.

Gavman bai putim kamap dispela bil bikos long 1950 i kam inap long nau, nogat wanpela kain bil olsem i bin kamap long stretim ol opisa, wok bilong CIS na stretim ol hevi CIS i gat.

Minista Bilong CIS, Sylvanius Siembo i tokaut long dispela Koreksinel Sevis Bil long wanpela pas em i raitim na salim i go long Komisina bilong CIS, Sam Nuakona long mun Jenueri long dispela yia.

Long dispela pas bilong em, Minista Siembo i tokaut long Komisina Nuakona long watpo na CIS i bin bungim hevi long las 8-pela yia i go pinis.

Minista Siembo i tokim Komisina Nuakona olsem CIS i bin bungim hevi long wanem: (1) planti infrastraksa bilong ol haus kalabus insait long kantri bagarap, (2) ol opisa i nogat gutpela pasin na tingting bilong mekim wok, (3) nogat gutpela pasin bilong disiplin namel long ol sinia na junia opisa,

(4) ol opisa i no kisim promosen, (5) nogat luksave i go long ol opisa long gutpela wok ol i mekim, (6) ol opisa i no kisim nupela yunifom insait long las 8-pela yia, (7) ol opisa i nogat gutpela haus, (8) ol sinia opisa long hetkwata i no go aut long ol haus kalabus na karim aut ol inspeksen wok na tu i no givim sapot na (9) nogat gutpela gutpela fanding na ol sapot sevis.

Mista Siembi tokim Komisina Nuakona olsem ol haus kalabus insait long kantri save pulap long ol kalabus manmeri. Arapela samting i olsem sampela opisa i save les long go long arapela hap-ol i laik stap na wok long wanpela haus kalabus tasol.

Em i tok CIS i bin bungim hevi

bikos i nogat gutpela trening program bilong ol opisa, i nogat polisi bilong spirituel developmen long ol kalabus manmeri na tu longpela taim we ol kot i save kisim long harim kot bilong ol manmeri husat i stap long kalabus na wetim kot bilong ol long kamap gen.

CIS minista i tokim Mista Nuakona olsem em i lukluk na glasm dispela ol hevi. Tasol i no kamapim ol samting we bai stap insait long dispela nupela polisi long stretim ol hevi stap long CIS.

Tasol em i tokim Mista Nuakona olsem i no longtaim em bai tokaut long dispela nupela polisi. Na tu ol polisi dairekta bilong dispela nupela polisi long kirapim na hapim tingting bilong ol opisa long mekim gut wok bilong ol.

DELTA

STRONGPELA TRU NA INOPILAI NABAUT TRAK...
DABOL KEBIN BILONG DABOLIM PLANTI MOA
MANMERI INSAIT!

Daihatsu Dan



DAIHATSU

Ela Motors
OLGETA HAP LONG
PAPUA NIUGINI

PORT MORESBY 229400 • LAE 423322 • KABUL 221965 • MADANG 822185 • GOROKA 721884 • MI HAGEN 521885 • WENAI 342356 • KAVENO 942132
KOROR 231155 • TARAMA 249040 • VANIMO 874284 • TOBISA 579347 • ALOTAU • WALTERS WORKS • SP 411174 • ORO MOTORS 297002

Plis RIPOT



HAGEN: Plis long Hagen taun i wok strong tru long stapim bikipela pait we i kamap long ol sapota na lain bilong ol kendidet husat i sanap long provinsel ileksen.

Ekting Plis Komanda, Leo Kabilo i tok planti man i bin kisim bagarap na tripela man i dai pinis long dispela hevi bilong ileksen. Wapela man husat i dai i bilong Dei Kaunsil eria na tupela arapela i bilong Baiya.

Planti manmeri i bin kisim bagarap na stap nau long haus sik long kisim marasin.

Dispela birua i stat long dispela wik taim Westen Hailans provinsel ileksen i stat. Ilektolel opisa i laik stat long kaunim nem bilong ol kendidet.

Ripot i tok pait i bin stat taim sampela sapota bilong ol kendidet i kros wantaim arapela, sapcta bikos ol i wok long pusim ol manmeri long votim ol kendidet bilong ol.

Dispela i kamapim belhat na pait i stat we tupela balot bokis i bagarap bikos ol man i brukim na tromoi nabaut.

Plis i wok long mekim bikipela wok raun yet long pinisim dispela pait na hevi. Tasol belhat na pen i stap yet we i gat pret long moa trabel i ken kamap yet.

RABAU: Ailan Rijenel Plis Komanda, John Toguata i tok lukaut long ol bikhet lain husat i laik stapim ol manmeri bilong kea senta long go bek long ples.

Mista Toguata i tok em i kisim ripot olsem sampela lain i wok long pretim na stapim ol manmeri long i no ken go long hap bilong Gelegele, Waena na Sikut Risev Graun.

Mista Toguata i tok olgeta graun ya em gavman i baim pinis na givim long ol manmeri husat i kisim bagarap long birua bilong volkanu long go wokim haus na stap long en.

Em i tok bai ol plisman na ami i wokabout na was long wokabout bilong ol manmeri bilong kea senta i go long ol hap graun ya. Na sapos husat man i laikaskim ol, bai em i kisim taim long han bilong ol.

MENDI: Sauten hailans provins i gat nupela Provinsel Plis Komanda nau. Man ya em olpela. Sauten Komanda eksekutiv opisa, Sif Inspekta Aloysius Eviaisa.

Mista Eviaisa i tok bikipela wok bilong em long karimaut pastaim em long wok klostu wantaim komyuniti long helpim na strongim wok bilong karimaut lo na oda insait long provins.

MOSBI: Ekting Sif Jastis, Robert Woods i tok em bai askim wapela jas long sekim haus kalabus long Bomana na sekim sapos i tru olsem sampela liklik manki i stap tu insait long Bomana haus kalabus.

Jas Wood i mekim dispela toktok long bekim ripot bilong Roger Mount husat em wapela katolik pater.

Pater Mount i bin raun long Bomana haus kalabus long krismas taim wantaim Asbisop, Sir Peter Kurongku long holim lotu long haus kalabus long krismas taim.

Ripot bilong Pater Mount i tok taim em i raun long Bomana haus kalabus, em i lukim ol yangpela manki we sampela i gat olsem 9-pela krismas na em i no bilip long wanem kain sistem i kamap nau long haus kalabus.

Pater Mount i save wok bipo olsem dairekta bilong Child Welfare we em i save wok klostu wantaim ol liklik pikinini husat i save bungim hevi long laip bilong ol.

Spesel Palamen bung ripot

Atoriti bai lukautim wok bilong stretim Gasel Peninsula

PALAMEN i warkurai na tokorait long putim kamap wanpela atoriti ol i kolim Gasel Ristoresen Atoriti long karim aut wok bilong stretim Gasel Peninsula eria insait long Rabaul, Is Nu Briten Provins, we i kisim bagarap long maunten paia.

Palamen i go het na tokorait long putim kamap dispela atoriti bihainim wanpela bil Minista Bilong Stet Afeas na Administretiv, Paul Tohian i putim kamap.

Palamen i warkurai na tokorait long putim kamap Gasel Ristoresen Atoriti bihainim disisen bilong Nesenel

Eksekutiv Kaunsil (NEC). NEC long Disemba 21 long las yia i wokim disisen long kirapim dispela atoriti wok bilong dispela atoriti em long kontrolim na ranim wok bilong stretim gen sindaun bilong ol pipel, ples, bisnis wok na tu ol arapela samting insait long Gasel Peninsula na ol arapela eria insait long Is Nu Briten provins.

Mista Tohian i tokaut olsem dispela atoriti bai kisim wok bilong Spesel Ministeriel Komiti na Imejensi Komiti. Bikos dispela tupela komiti bungim hevi long karim aut wok bilong tupela



Mista Tohian

bihainim sampela imejensi lejisesen (lo).

Mista Tohian i tok atortiti ya bai karim aut plan bilong kontrolim na ranim wok bilong stretim Gasel Peninsula eria-klinim ol eria

kisim bagarap, bringim: na putim kamap gen ol sevis, putim ol pipel long arapela gutpela graun na tu long stretim ol arapela samting olsem infrastraksa wok.

Gasel Ristoresen Atoriti bai wokbung wantaim ol pablik bodi, Is Nu Briten provinsal gavman, ol non-gavman oganaisesen na tu ol praivet entaprais.

Ol memba bilong Gasel Ristoresen Atoriti bai: (1) wanpela bikman bilong Is Nu Briten provins stret husat bai stap olsem siaman bilong atoriti, (2) 4-pela opisa long Nesenel Pablik Sevis-tupela i mas holim wok olsem

dipatmen het, (3) tupela memba bilong Is Nu Briten provinsal gavman-Provinsal Eksekutiv Kaunsil mas makim tupela (4) wanpela man bilong Is Nu Briten provins stret.

Nesenel Eksekutiv Kaunsil bai apoinim dispela ol memba bilong Gasel Ristoresen Atoriti. Na nem bilong ol bai stap insait long Nesenel Kaset (rekot buk bilong gavman).

Minista Tohian i tokaut olsem NEC i givim tok-save i go pinis long Fainens na Plening dipatmen long redim K1 milien long karamapim kos bilong putim kamap dispela atoriti.

Sir John Kaputin no laikim Atoriti

MEMBA bilong Rabaul, Sir John Kaputin i tok em i no amamas na tu i no laikim gavman long putim kamap Gasel Ristoresen Atoriti long lukautim na kontrolim wok bilong stretim ol eria insait long Gasel Peninsula na ol arapela eria long Is Nu Briten provins.

Sir John i tokaut olsem dispela plan na tingting bilong gavman i no gutpela. Bikos gavman bai spenim mani long putim kamap dispela atoriti na tu long ranim dispela atoriti.

Sir John i tok em i amamas long lukim olsem Chan/Haiveta gavman i wok long traim long helpim ol pipel bilong em long Rabaul. Na tu long stretim laip na ol samting i bagarap. Tasol em i no laikim tru olsem gavman i mas go het na putim kamap dispela atoriti.

Em i askim: Gavman i laik putim kamap wanpela wanem kain oganaisesen gen?

Em i tok i gat ol oganaisesen i stap pinis long karim aut wok bilong stretim Rabaul. Wanem samting gavman i sapos long mekim em long givim:

mani, risoses na ol arapela samting long ol dispela oganaisesen. Na ol dispela oganaisesen i ken wokbung wantaim na mekim wok bilong stretim Rabaul.

Memba bilong Rabaul i kros na tokaut olsem Is Nu Briten provinsal gavman wantaim helpim bilong Provinsal Disasta Komiti na Imejensi Komiti ken karim aut dispela wok. Tasol bikipela samting i olsem nesenel gavman i mas putim kamap mani na ol arapela risoses.

Sir John i tok taim Gasel Ristoresen Atoriti kamap, ol komiti na oganaisesen bai paul long husat tru bai lukautim, kontrolim na karim aut wok.

Em i tok Is Nu Briten provinsal gavman em i wanpela ligel bodi o oganaisesen bilong gavman. Na gavman i sapos long luksave long dispela oganaisesen na givim aut mani go long em. Na askim em long wokbung wantaim ol arapela oganaisesen long karim aut dispela wok bilong stretim Rabaul.

Palamen surukim Stet ov Imejensi taim long Rabaul long tupela moa mun

PALAMEN i paitim toktok na surukim Stet ov Imejensi taim long Rabaul i go long tupela mun moa.

Palamen i mekim dispela samting bikos olpela Stet ov Imejensi taim bai pinis long Februeri 10 long dispela yia. Palamen i paitim toktok na vot na surukim nupela pinis taim bilong Stet ov Imejensi long Rabaul i go long Epril 10 long dispela yia.

Praim Minista Sir Julius Chan, na namba tu bilong em, Chris Haive-

ta i tokaut long Palamen olsem gavman bilong tupela i kamap wantaim tingting bilong surukim taim i go long arapela tupela moa mun bikos hevi long Rabaul i pinis olgeta. Sir Julius na Mista Haiveta i tokaut olsem i tru olsem wok bilong tupela maunten paia i pinis. Tasol ol saveman bilong maunten paia i tokaut olsem sampela samting i ken kamap. Bikos maunten paia i no save toksave long man na kamap. Mista Haiveta i tokim



Sir Julius

Palamen olsem gavman i laik lukim olsem olgeta wok long stretim Rabaul na stretim laip bilong ol manmeri husat i painim bagarap

long maunten paia i mas go het gut. Na ol i mas kisim gutpela helpim long gavman na sindaun bilong ol i mas kamap gutpela gen.

Mista Haiveta i tok gavman i laikim olsem mani ol ovasis oganaisesen i givim long gavman bilong em wantaim Sir Julius i mas go stret long wok bilong stretim Rabaul. Olsem na long lukim olsem mani go long stretpela rot, ol i mas surukim taim bilong Stet ov Imejensi go long arapela tupela

moa mun. Dispela bai givim ol inap taim long stretim ol samting,

pepa wok na tu ol projek wok insait long provins wantaim astingting long kamapim gutpela sindaun.

Bihainim dispela tingting bilong gavman, memba bilong Rabaul, Sir John Kaputin i tokaut olsem em i no amamas long gavman i surukim taim bilong Stet ov Imejensi go long arapela tupela moa mun.



BIHAINIM ol toktok bilong hevi long Rabaul na tu ol arapela disasta hevi insait long kantri bin kamap long ol yia i go pinis, rijonol memba bilong Is Sepik, Sir Michael Somare i askim gavman long putim kamap wanpela nesenel bodi o oganaisesen.

Wok bilong dispela bodi, Sir Michael i tok, em long karim aut wok bilong stretim laip na sindaun bilong ol manmeri na tu arapela samting na wok bihainim ol disasta hevi.

Sir Michael i putim kamap dispela askim bihainim tingting na plan bilong gavman long putim kamap wanpela atoriti ol i kolim Gasel Ristoresen Atoriti long lukautim na kontrolim wok bilong stretim Gasel Peninsula eria. Palamen i paitim toktok na tokorait long gavman i mas go het na putim kamap dispela atoriti.

Sir Michael i tok bihainim ol disasta hevi kamap long ol yia i go pinis, gavman i save putim kamap ol komiti na oganaisesen. Astingting em long karim aut wok bilong kontrolim ol wok na arapela samting long stretim bagarap ol disasta hevi kamapim.

Rijonol memba bilong Is Sepik i tok sapos nesenel gavman i putim kamap dispela nesenel bodi, olgeta yia em (gavman) i mas skelim mani go insait long dispela bodi. Astingting em long redim dispela nesenel bodi wantaim mani.

All departments Phone: 25-2500 Fax: 25-2579

WANTOK Published Weekly, Thursdays, for Word Publishing Co Pty Ltd

Printed and published by Anna Solomon of Bittern Place, Gardens, at Allotment 2, Section 209, Spring Garden Road, Honiara, for Word Publishing Co Pty Ltd

General Manager: Ian Fry
Company Secretary: Vince Ohlinger SVD
Group Editor in Chief: Anna Solomon
Editor of Wantok: Leo Watwa
Advertising Manager: Peter Kalso
Advertising deadlines: Display bookings: Monday, midday
Camera ready copy: Tuesday, midday
Classified advertising: Wednesday 2 pm

Regional office: Suite 7, Haus Tisa, Second Street, Lae PO Box 1726 Lae, Morobe Province
Phone/Fax: 42 06 10
District Manager: Zeph Aigai
Papers distributed by air throughout PNG Available by airmail subscription within Papua New Guinea and overseas
Australia & New Zealand Representatives: Tonkin Media Pty Ltd
PO Box 101 Avoca Beach NSW 2251 Aust
Sydney, James Tonkin, 043 85 1746
Melbourne, Glen Smith, (03) 807 2311

Word Publishing Co Pty Ltd is owned by the four major churches of Papua New Guinea: Catholic 55%, Lutheran 25%, Anglican 10% and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms of acceptance are available at the office of The Times and are set out in full on the reverse side of its official Display Advertising Booking Form

Spesel Palamen bung ripot

Imejensi Komiti givim namba tu ripot

NESENEL gavman na ls Nu Briten Provinsal Gavman i mas paitim toktok na stretim ol samting hariap long rausim provinsal hetkwata long Rabaul i go long Kokopo.

bilong Katolik sios long Kokopo. Na askim Katolik sios long givim sampela graun long Kokopo i go long gavman. Bikos bikpela hap bilong graun long Kokopo i bilong Katolik sios long Kokopo.

ol kea senta. Na putim ol i go long ol ples na eria we gavman i tok long ol bai go sindaun na wokim ples. Long wankain taim, nesenel gavman i mas go het yet long helpim ol manmeri long kamapim gutpela sindaun gen long nupela ples bilong ol.

long namba tu ripot bilong Stet ov Imejensi long Rabaul. Siaman bilong bilong Pemenen Palamentari Komiti bilong Nesenel Imejensi, John Nilkare i putim kamap dispela ripot long Palamen.

ol arapela provins i go bek long provins bilong ol. Bikos dispela bai bagarapim plantesen ekonomi insait long provins. Bihain tasol long maunten paia i pairap, planti manmeri long ol arapela provins i lusim Rabaul na go bek long provins bilong ol. Arapela samting i olsem nesenel na provinsal gavman i

mas helpim dispela ol manmeri long kirapim sindaun na laip bilong ol gen long provins bilong ol yet.

Komiti askim tu nesenel gavman long lukluk na bekim dinau em i gat long ol bisnis haus na oganaisesen long Gasel Peninsula. Gavman i gat samting olsem K5 milien dinau wantaim ol bisnis haus.

Ripot bilong Komiti askim nesenel gavman tu long toktok wantaim ol fainensal institusen.

Na askim ol long givim helpim i go long ol manmeri na tu long ol koporesen husat i lusim ol samting bilong ol. Tasol dispela lain i mas bekim dinau ol i kisim bihainim lo bilong bekim dinau.

Long kirapim provinsal hetkwata long Kokopo, nesenel gavman i mas paitim toktok na warkurairi wantaim Asdaiosis.

Arapela samting i olsem nesenel gavman i mas hariap long rausim ol manmeri long

Dispela na tu ol arapela askim i stap insait

Dispela ripot i tok provinsal gavman i no ken go het moa na rausim ol manmeri long

Olgeta memba mas wokbung

NESENEL memba bilong Gasel, Nakikus Konga i tokaut olsem hevi maunten paia i kamapim long laip na sindaun bilong ol manmeri long Gasel Peninsula eria em i wanpela bikpela hevi tru.

Bikos long dispela, Mista Konga i askim olgeta nesenel memba long Palamen long putim tingting na wokbung wantaim. Na helpim nesenel gavman long karim aut wok bilong stretim Rabaul taun na tu laip na sindaun bilong ol manmeri.

Mista Konga i tok sapos i gat toktok kros i stap namel long gavman na oposisen, nogat wanpela gutpela wok bai kamap long stretim taun na laip na sindaun bilong ol manmeri. Em i tok wok politik bai no inap helpim ol pipel bilong Gasel Peninsula.

Mista Konga i tok em i no laikim olsem nesenel gavman i mas putim nupela provinsal hetkwata long Kokopo. Bikos Kokopo i gat planti

ples na plantesen i stap insait long en. Sapos provinsal hetkwata i stap long hap, bai gat hevi bilong nogat inap graun bihain long samting olsem 10-pela yia.

Em i tok em i gat bikpela tingting na laik olsem nupela provinsal hetkwata i mas kamap long Kerevat. Bikos Kerevat i gat inap graun we gavman i baim na yusim long kirapim nupela provinsal hetkwata. Na tu bai gat inap graun long provinsal hetkwata i ken develop long bihain taim.

"Long nau yet, laip na sindaun bilong ol manmeri na pikinini long ol kea senta i no gutpela tumas. Ol i sot long kaikai na gutpela wara bilong dring na kukim kaikai," Mista Konga i tokaut long Palamen.

Konga i tok long bipo pastaim long Papua Niugini gat kopa, gol na wel, Rabaul i bin sapotim na stongim ekonomi bilong kantri wantaim kakao na kopra.



Em nau, mipela kam nau Dispela ol man i no karim plk. Nogat. Ol i paslim wanpela nupela garamut olsem plk na karim. Lain ya i bilong wanpela ples long Turubu bos long hap bilong Wewak, ls Sepik provins.

Ol skul i bungim bikpela bagarap

BIHAIN long maunten paia i pairap na i kam inap long nau, moa long 48,000 manmeri na pikinini stap long ol kea senta.

Dispela olgeta lain i stap long ol kea senta long Rabaul. Ol i lusim olgeta samting na taun bilong ol. Eben senta (Rabaul taun) i bin givim ol wok, sevis na tu ol arapela samting.

Ol pipel long ol ples na eria long Vulcan i lusim olgeta smating bilong ol. Graun nogut bilong maunten paia i kamapim gutpela graun bilong ol long wokim gaden na ol arapela samting. Graun

bilong ol bai redi long ol i ken yusim gen bihain long sampela yia.

Ol pipel bilong ples Raluan namba tu (2) i lusim olgeta haus, kakao, buai na gaden bilong ol. Tasol ol i ken go bek long ples bilong ol. Tasol bikpela hevi stap long sait bilong wara. Bikos planti famili lusim teng bilong ol. Ol kokonas na banana long gaden i no kisim bikpela bagarap tumas. Planti manmeri long ol arapela provins tu i lusim setelmen na kompaun na i go na stap long ol kea senta. Ol tu i lusim olgeta

samting bilong ol. Planti bilong ol dispela pipel i lusim Rabaul wanpela o tupela wik bihain tasol long maunten paia i pairap.

Dispela ol samting i stap insait long wanpela ripot, man husat i go pas long kontrolim "Operesen Yuniti" long Rabaul na tu bikman bilong Difens Fos, Brigidia Jenerel Rokus Lokinap i givim i go long Palamen.

Ripot bilong Jenerel Lokinap i tok i gat sampela pipel husat i no sapos long stap long ol kea senta i stap nau long ol kea senta.

OLGETA tokples prepatori na adal literesi skul long ol eria i kisim bikpela bagarap i pas. I nogat plan i stap olsem ol dispela skul bai op long dispela yia. Tokples Prodaksen Senta long Rabaul taun tu i kisim bikpela bagarap.

Ripot bilong Brigidia Jenerel Rokus Lokinap i tokaut olsem 9-pela komyuniti skul na moa long wan handet klasrum bilong ol i kisim bikpela tru. Dispela ol komyuniti skul bai no inap op long dispela yia. Moa long 3500 komyuniti skul sumatin i lusim ples bilong ol we ol komyuniti skul i stap. Na ol i stap nabaut nau long ol kea senta long ol arapela eria insait long Gasel Peninsula.

Enrolmen bilong ol skul long dispela yia long ol kea senta na risetelmen eria bai bikpela moa. Bihainim wanpela ripot bilong AIDAB, ol skul long ol kea senta i mas i gat inap klasrum na haus bilong ol tisa. Sampela bilong ol dispela komyuniti skul long nau yet i kamap olsem ol kea senta.

I gat paul tingting i kamap na stap long sait bilong ol haikul. Tripela haikul na vokesenel senta bilong ol meri long Rabaul i kisim bikpela

bagarap. Tasol ol provinsal atoriti givim planti spes insait long ol skul long ol sumatin husat i pinisim gred 6.

Disisen bilong kamapim wanpela sistem bilong senisim ol tisa namel long Malaguna na Kokopo haikul i no kisim gutpela sapot i kam long ol manmeri long pablik, ol tisa na ol sios ejensi. Malaguna i stap insait long eria bilong Rabaul na tu insait long kefiu eria. Em i stap tu long wanpela eria we long taim bilong ren, dispela i ken stopim ol manmeri long i go i kam long Kokopo na tu ol arapela eria. Ol samting i luk olsem bai kamap orait bihain long sisen bilong ren i pinis insait long provins.

Sampela haikul i kamap olsem ol kea senta. Long Malabunga ol manmeri slip insait long ol domitori bilong ol sumatin. Ol i kaikai long haus kaikai bilong ol sumatin na tu i gat planti na gutpela wara bilong dring, waswas na mekim ol arapela samting. Difens Fos i wok long rausim ol manmeri na putim ol i go long ol arapela hap. Na ol sumatin i ken go bek long skul. George Brown tu i kamap olsem wanpela kea senta.



WANTOK

NIUSPEPA BILONG OL PAPUA NIUGINI STRET

Mani i sot yet

LAS WIK Minista bilong Helt, Peter Barter i bin kisim moa long K4milien long helpim wok bilong Helt insait long kantri. Em i laki bikos planti ol gavman dipatmen na ol kampani na ol manmeri i wet yet long gavman i mas givim mani long ol o stretim dinau em i gat wantaim ol.

Tasol dispela mani Mista Barter i kisim em i no inap long amamasim olgeta wok bilong helt insait long kantri. Planti samting i sot yet. Planti ol lain i komplek yet bikos ol i no kisim mani.

Dispela wik lain bilong Sios Medikal Kaunsil i sutim tok long gavman. Ol i tok gavman i katim baset bilong ol na dispela asua bai i kilim bikipela wok tru insait long kantri.

Em i tru bikos i gat moa helt senta, etpos na haus sik. Namba bilong ol i winim namba bilong ol haus sik bilong gavman. Ol dispela haus sik bilong misin i givim bikipela sevis i go long ol pipel bilong yumi. Ol ples long bus, maunten na ol ailan i slip namel long solwara i save kisim bikipela helpim i kam long ol haus sik bilong misin.

Nau, bai ol dispela lain i kisim taim. No gat mani, bai i no gat ol nes i wok, bai marasin i sot gen na hevi bai kamap gen.

Tasol yumi mas luksave nau. Ol dispela lain husat i strong long mani bilong gavman i mas stat long sekap na katim daun ol samting we i pulim mani nating na i no givim gutpela bekim. Yumi mekim ol dispela samting pinis, orait bihain yumi ken sindaun na sutim tok i go kam long gavman.

Bogenvil pipel paul long nupela gavman

PETER KASIA i raitim

Ol pipel bilong Bogenvil long nau yet i no save long wanem samting tru bai kamap wantaim dispela nupela gavmani Bougenvil Trensese nel Gavman (BTG) we nesene l gavman i tok long givim i go long ol. Tupela lida bilong Buka, Paul Kehona na Aloysius Sohaga i tok olsem planti pipel long ailan i laikim olsem ol man husat bai makim ol long dispela gavman ol pipol yet i mas elektim ol. Gavman i no ken makim ol maus-

man. Tupela man ya i tok sapos gavman i makim ol dispela lain husat bai stap insait long BTG, dispela i min olsem olgeta wok i stap insait long provins em Waigani wok long ranim. Tupela bikman ya i tok dispela Mirigini Agrimen we ol lida bilong Bogenvil na nesene l gavman i bin sainim long mun Novemba long yia i go pinis i no karim kaikai. Dispela long wanem ol i no bin kisim toktok bilong

olgeta manmeri long provins pastaim long ol i tok orait long en. "Ol i bin sainim dispela Mirigini Agrimen hariap tumas. Ol i no bin tok tok wantaim ol pipel pastaim. Nau olgeta pipel ol i no save wanem samting i wok long kamap long dispela Agrimen. Pastaim mipela i ting olsem husat bai kamap olsem memba bilong BTG em mipela yet. Tasol i nogat. Waigani yet bai makim ol," tupela lida ya i tok. Tupela i tok tupela i makim maus bilong moa long 20,000 pipol insait long Buka basis na Haku eria. Na i no

amamas long dispela pasin we gavman bai makim ol man i go long BTG bilong kamap olsem ol memba. "Mipela i no laikim tru dispela provins bai nesene l gavman i ranim wantaim rimot kontrol masin long Waigani. Olgeta samting em mipela yet i mas wokim hia long provins. Mipela i no nupela long dispela kain wok," Mista Kehona na Sohaga i tok. Tupela i tok olsem ol dispela lain man Bogenvil husat i bin sainim dispela Mirigini Agrimen em ol i no ol

lida tru bilong provins. Ol i sapota na wokman bilong nesene l gavman. Dispela kain pasin tasol, tupela i tok, i bin statim ma kamapim dispela hevi long Bougenvil. Sapos ol i no harim tok gen, wankain samting bai kamap gen. Mista Kehona na Sohaga i tok 7-pela Siaman bilong ol Interim Atoriti bai kamap ol memba sapos nesene l gavman i go yet na makim ol lain long BTG husat tupela i tok i nogat moa sapot i kam long ol pipel long provins.



Lotu pasim 1994 yia . ol meri bilong Katolik Wimens Asoslesen long Bogenvil i kisim komunio long misa long Hahela haus lotu long pinis bilong las yia. Dispela long ol i holim lotu long pasim olgeta wok bilong yia 1994.

Kos bilong skul long Yunivesiti go antap

OL sumatin husait i bai stadi long Yunivesiti bilong Papua Niugini long Mosbi bai baim moa mani antap long mani bilong skul fi aninit long wanpela we bod bilong Yunivesiti givim tokorait long pulim sampela mani bilong Yunivesiti. Ekting deputi registrar bilong Yunivesiti, Mista Koren Ambiu i tokaut long dispela ol fi we ol sumatin i mas baim taim ol i kam long baim rejistresen bilong ol. Olgeta i mas baim ful fi bilong ol long dispela taim. Fi blong Waigani mein, kempas i sanap olsem

Ol sitisen
1. OL ANDA GRE-DUET KOS
 Bot na loding fi K1002.50 long 6-pela mun
 Tuisen fi K195.00 long 6-pela mun
 Helt fi K30.00 long wan yia
 Ol narapela fi K60.00 long wan yia
 Sekiriti fi K50.00 long wan yia
 S R C fi K6.00 long wan yia
POS GREDUET NA HONAS PROGRES
 Bot na Loding fi

K1002.50 long 6-pela mun
 Tuisen fi K390.00 long wanpela ful yia
 Ri enrolmen K195.00 long wan ful yia
 Pat taim enrolmen K195.00 long wan yia
 Ri enrolmen (Pat Taim) K45.50 long 6-pela mun
 Yunivesiti bai givim bek mani bilong ol sumatin sapos ol i no yusim dispela ol mani. Tasol ol bai no inap kisim bek mani bilong sekuriti fi. Dispela mani em ol sumatin i bai baim i no bungim kos bilong skul buk.

Mariwana hevi bikipela long Is Sepik

i kam long pes 1 olsem ol papamama, ol i no save givim ripot long polis o toktok long ol yangpela. Ol i save stap na lukluk tasol na tok em laik bilong wanwan tasol. Long Is Sepik provins, i luk olsem ol bikman long ol komyuniti ting olsem pasin bilong pasim maus na stap bai helpim ol yangpela na komyuniti. Olsem na ol i no traim long mekim wanpela samting long pait egensim

spakbrus mariwana insait long provins. Ripot long Wewak Distrik Kot i soim olsem long 1994 Distrik Kot i harim 39 kot we i toktok long spakbrus mariwana. Insait long dispela 39 kot, 34 i bilong ol man na 5-pela i bilong ol meri. I gat bilip na luksave i stap tu olsem planti yangpela man insait long provins i wok long planim spakbrus mariwana. Na bihainim salim long ol manmeri husat i save smokim.

spakbrus mariwana insait long provins. Ripot long Wewak Distrik Kot i soim olsem long 1994 Distrik Kot i harim 39 kot we i toktok long spakbrus mariwana. Insait long dispela 39 kot, 34 i bilong ol man na 5-pela i bilong ol meri. I gat bilip na luksave i stap tu olsem planti yangpela man insait long provins i wok long planim spakbrus mariwana. Na bihainim salim long ol manmeri husat i save smokim.

Kos bilong kukim kaikai kamap long Buka

ALOYSIUS SAMI i raitim

PROVINSAL helt opis long Buka na Buka Taun Atoriti Komiti (BTAC) bai ranim wanpela kos long skruim save bilong ol meri long kukim ol kuk kaikai olsem skon, ban, bret na donat. Tupela grup ya i tingting long mekim dispela samting bihain long ol komplek i kamap long ol kuk kaikai we ol mama i salim long Buka taun maket. I no longtaim i go pinis, sampela pipel i komplek long ol skon, ban na donat ol i baim long maket we ol i tok i no kuk gut na ol i kaikai. Na sampela bilong ol i kisim sik belpen na tu pekpek wara.

Siaman bilong BTAC, Julius Longa i askim nau long ol meri husat i laik sindaun long dispela kos long putim nem bilong ol wantaim komiti bilong em. Provinsal helt eduketa, Reuben Tokome bai sindaun wantaim ol meri long helpim ol long kisim moa save long pasin bilong kukim gutpela kaikai we ol i ken salim long Buka maket. Mista Tokome i tok ol i no laik bagarapim wok bilong ol meri. Na stopim ol olgeta long salim ol kuk kaikai long maket. Bikos dispela em wanpela rot long ol i save kisim liklik mani long helpim sindaun bilong famili bilong ol. Olsem na ol i tingting long helpim ol wantaim kos we i ken skruim save bilong ol.

WANTOK

NIUSPEPA BILONG OL PAPUA NIUGINI STRET

P.O. Box 1982 BOROKO
 telepon Namba: 25 2500
 Feks Namba: 25 2579

PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na NuSilan	K92.00
Esia pasifik na Japan	K123.00
Amerika na Yurop	K180.00



Ol hailans redio stesin meknais yet

YAKAM KELO I raitim

PROVINSEL Redio stesin long Goroka i stretim pinis ol hevi bilong em na i redi long meknais gen long ol pipel bilong Isten hailans provins long dispela wik yet. Provinse menesa bilong Redio Isten hailans, Touko Nonao i tokaut olsem Redio stesin i redi long wok gen bihain long ol i stapim redio sevis long 13 Septemba long las yia.

Mista Nonao i tok taim Redio Isten Hailans i bungim dispela hevi we mani i sot long baim ol samting olsem bensin bilong ka na ol samting bilong

yusim long redio stesin, ol i pasim redio sevis.

Mista Nonao i tok long Septemba las yia i kam inap nupela yia, ol pipel insait long ol rurel eria olsem Opena na Marawak i painim hat tru long save long wanem samting i kamap. Bikos ol i save kisim olgeta toksave bilong ol stret long Redio Isten hailans.

Em i tok planti arapela ples tu husat i stap klostu long ol boda bilong Madang provins, Western provins na Lufa eria tu i bungim hevi long taim sevis bilong redio i pas. Provinse menesa ya i

tok em i amamas taim Dipatmen bilong Isten hailans provins, aninit long opis bilong edministreta i givim K3,000 long ol. Dispela mani i kam long taim stret we ol i kisim na stretim ol dinau bilong ol long bensin, wel na ol samting bilong opis.

Mipela i salim pas na toksave tu long ol provinse na nesene lida bilong Isten hailans provins tasol no gat wanpela i kamap long helpim mipela, Mista Nonao i tok.

Em i tok sapos ol politikel memba ya i gat save, ol inap helpim na sapatim Redio Isten hailans long wok gen. Bikos redio stesin em bris bilong ol memba i go long ol pipel bilong ol long wanwan ilek-

toret bilong ol. Redio i save sevim stret ol pipel bilong ol dispela memba tasol ol i no luksave na no gat wanpela i kamap long helpim, mista Nonao i tok.

Redio Isten Hailans i redi long meknais gen long dispela wik na olgeta manmeri long Isten Hailans provins i kisim toksave pinis long opim redio bilong ol long dispela wik.

Ripot i kamap tu olsem arapela redio stesin long ol hailans rijen i orait. Olgeta i wok long mekim wok i stap.

Ripot i tok olgeta redio stesin long PNG i bungim wankain hevi we baset bilong Nesenel Brodkasting Komisni i bin sot long

las yia. Tasol sampela redio stesin i kisim helpim long provins bilong ol yet na stretim ol hevi bilong ol.

Redio stesin long Madang i bungim hevi wantaim ripita stesin bilong em long dispela wik olsem na stesin i bin pas liklik.

Ripot i kam long Redio Madang olsem olgeta samting i orait tasol long go het. Sevis bilong redio i orait tasol long go long ol manmeri bilong Madang provins. Tasol ol i wetim yet ol teknisen man bilong PTC long go stretim dispela ripita stesin we i kamapim hevi long ol waia bilong redio.

Dispela hevi bai inap pinis long dispela wik yet na redio sevis bai i go het yet.

Helt ministra mekim gutpela wok long ol Madang haus sik

PAULUS TALI raitim

BIKPELA tok amamas i kam long ol pipel bilong Madang provins long gutpela wok rijonal memba bilong Madang, Peter Barter i mekim long ol haus sik insait long kantri.

Wanpela lida bilong ples Danben insait long Madang provins, Mar! Aih i tok Helt ministra, Peter Barter i soim tru wok bilong ol lida long strong ol haus sik insait long kantri.

Em yet i save go raun na sekim ol haus sik long poket mani bilong em yet. Sampela taim em yusim, helikopta balus bilong em yet na raun long olgeta haus sik long kantri.

Mista Aih i tok Mista Barter i mekim gutpela wok long traim stretim olgeta haus sik long kantri bikos haus sik em bikpela sevis tru long laip bilong olgeta manmeri long ples graun.

Em i askim Helt ministra long lukluk na senisim nem Yagaum Luteran haus sik i go kamap Yagaum Distrik Helt Senta long Madang provins. Dispela em long opim haus sik ya i go bikpela liklik na kamapim sampela nupela senis tu long ol samting bilong haus sik.

Em i tok Mista Barter i wok long traim stretim planti haus sik long Madang provins. Na Yagaum haus sik em wanpela bilong ol haus sik we i mas kamap gut tu.

Is Sepik komyuniti gavman kisim luksavelong 1995 baset

FUZO PAUL I raitim

DRIMAN bilong ol komyuniti gavman insait long Is Sepik provins i stat long karim kaikai nau. Kaikai bilong dispela driman i bihainim askim bilong provinse Komyuniti Gavman minista Eric Wangihau. Mista Wangihau i bin askim Is Sepik provinse gavman long givim sampela graun mani go long 33 komyuniti gavman insait long provins. Dispela askim bilong Mista Wangihau i stap long provinse baset bilong dispela yia.

Mista Wangihau i tokaut olsem askim bilong em i go long provinse gavman i karim kaikai taim provinse gavman i ansaim askim bilong em. Na givim mani inap long K660,000 i go long divisen bilong em long givim i go aut long wanwan komyuniti gavman. Dispela i min olsem wanpela komyuniti gavman bai kisim K20,000.

Minista Wangihau i tokaut olsem em i bin askim provinse gavman long givim em K3 long wanwan manmeri bihainim namba bilong ol pipel insait long wanpela komyuniti gavman eria. Tasol provinse gavman i tok nogat long askim bilong em. Bikos ekonomik developmen insait long Is Sepik provins i no gutpela tumas. Olsem na provinse gavman i nogat inap mani long givim K3 makim wanwan manmeri insait long wanwan komyuniti gavman eria.

Em i tok Maprik distrik bai kisim K180,000 bilong dispela K660,000. Bikos Maprik distrik i gat planti konstituensi. Bihain long Maprik em Wewak na Angoram distrik. Bikos wanwan bilong tupela i gat 7-pela distrik tasol. Tupela distrik wantaim bai kisim K140,000. Ambunti distrik bai kisim K120,000. Nupela distrik insait long provins, Kanauki distrik husat i gat 4-pela konstituensi tasol bai kisim K80,000. Wangihau i tok em i gat bikpela

bilip olsem wantaim dispela nupela sistem bilong komyuniti gavman, gutpela luksave bai kamap long provinse na nesene gavman long wok bilong lokal level gavman. Dispela luksave bai mekim gavman long skelim mani long karim aut wok bilong stretim na helpim ol liklik rurel developmen projek. Na tu long stretim sampela ekonomik na sosel hevi ol pipel long rurel eria i wok long bungim.

Mista Wangihau i tok long ol yia i kam bihain, mani wanwan komyuniti gavman bai kisim aninit long provinse baset bai surik i go antap. Bikos ol lokal level gavman insait long ol rurel eria i save karim aut gutpela na bikpela wok.

Em i tok long ol yia i go pinis, nesene na wanwan provinse gavman insait long kantri no givim luksave i go long ol lokal level gavman. Bikos long nogat gutpela luksave, ol atoriti rausim planti pawa bilong ol lokal level gavman i go long provinse na nesene level gavman.

Ol papagraun laik kisim bek refusi ken

IAN KAKARERE I raitim

OL ples insait long boda mak bilong Papua Niugini na Indonesia long Western provins i askim gavman atoriti long rausim ol Iran Jaya refusi husat i stap long ol refusi kem we i nogat luksave long en. Not Flai Provinse Plis Komanda, Sief Inspekta Peter Taiang i tokaut olsem ol manmeri long ol dispela ples i pret long ol refusi stap long hap bilong ol. Sief Inspekta Taiang i tok ol bikman na viles lida i tokim em olsem namba bilong ol refusi manmeri winim namba bilong ol manmeri long ples. Em i tok tu olsem manmeri long ples i pret long ol refusi holim ol sot we ol yet i wokim. Ol refusi wok long kisim tu ol kaikai long gadan bilong ol manmeri long ples, katim saksak bilong ol na tu ol arapela kaikai na samting bilong ol. Ol manmeri long ples i kisim

bagarap tu long wara Ahu bihainim maining wok kamap bilong Ok Tedi main.

Ol manmeri long ples i laikim olsem ol gavman atoriti mas stretim ol samting na putim ol refusi go long opisal refusi kem long Is Awini. Sapos ol gavman atoriti no mekim dispela samting, orait ol refusi mas go bek long Irian Jaya.

Planti bilong ol dispela refusi na ol manmeri bilong ples i bilong wanpela traik o tumbuna lain ol i kolim Yonggom. Ol manmeri long ples na ol refusi papa long graun long tupela sait wantaim bilong boda. Gavman i gat hevi wantaim ol papagraun bilong hap graun we Is Awini refusi ken i stap long en.

Ol papagraun long Is Awini i no laikim gavman long salim ol refusi go moa long Is Awini refusi kem. Gavman i ken mekim dispela samting pastaim long em i stretim ol hevi em i gat wantaim ol papagraun bilong Is Awini.

Morobe primia laikim wok bung long 95

PRIMIA bilong Morobe provins, Titi Christian i bin tokaut olsem bai i gat bikpela wok bilong klinim Lae siti na Morobe provins olgeta i kamap.

Primia Titi Christian i mekim dispela toktok long wanpela bung bilong olgeta divisen het insait long Lae long dispela wik.

Primia i no toktok klia long wanem wok tru bilong klinim Lae siti na Morobe provins tasol tingting i stap klia pinis long rausim ol bikhet pasin we i wok long kamap na bagarapim gutpela sindaun bilong ol manmeri.

Primia i bin tokim Wantok olsem bihain

long Morobe provinse baset bilong 1995 i kam aut, bai gavman i ken save long amas mani em i ken yusim long mekim dispela wok bilong klinim Morobe provins.

Primia i no tokaut klia long amas mani em i lukluk long putim i go insait long dispela wok bilong klinim provins.

Tasol em i bin tokaut pinis olsem i gat inap sapot we 4,000 yut manki long Morobe provins na tu ol publik sevans opisa bai i go pas long wok bilong klinim siti na Morobe provins.

Primia i tok em i laikim bai 1995 i mas wanpela gutpela yia

bikos las yia i gat planti hevi i kamap. Ol hevi olsem bikpela ren na wara i brukim ol haus na ples, ol bikhet man i kilim ol pipel bilong Morobe na ol vot i no gat bilip we i wok long kamap long senisim gavman.

Primia i tok em yet wantaim ol politikel lida bilong Morobe provins i as bilong ol hevi we i wok long kamap na givim hevi long ol pipel.

Olsem na em i laikim bai 1995 i kamap wanpela gutpela yia bilong gavman na ol pipel bilong Morobe.

Long mekim 1995 i kamap wanpela gutpela yia, mi askim long sapot bilong olgeta

politisen na publik sevans long sanap wantaim na mekim wok, primia i tok.

Ripot i kam tu long dipatmen bilong Morobe olsem olgeta divisen bilong dipatmen bai i gat inap mani long yusim long ol wok bilong ol. Bikos 1995 baset bilong Morobe provins i bikpela na i karamapim samting we ol wanwan divisen i save mekim.

Ripot ya i tok mani bai i no inap sot long ol gavman opis tasol safos ol publik sevans yet i no yusim gut mani long wok, bai mani i sot long ol.



Ples Buakap paia long krismas • Bikpela tenksgiving seremoni i bin kamap long ples Buakap long Morobe provins long las krismas. Ol pipel long ples tiliim ol yet long 6-pela grup na holim tenksgiving seremoni. Long lephan i go long rait em Aga Masawa, Kemoa Yaolasi na Rebecca Geseng. Ol i makim Alang grup na kisim saksak na kokonas i go long ol lida bilong Luteran kongrisesen. Foto: Zeph Aigal.

TU MINIT TINGTING LAIT I MAS KAMAP


Dispela tok "Lait i mas kamap" em i namba wan oda God i bin givim long namba wan pes bilong namba wan buk bilong Baibel. Na Baibel i skruim tok i go olsem: "Orait, lait i kamap. Na God i lukim lait i gutpela na em i amamas." Orait, nau tulait i kamap.....na olkain gutpela samting i stat long kamap long graun.

Yumi stap yet long bigin bilong nupela yia. Na em i gutpela yumi tingim mining bilong lait i mas stap insait long laip bilong yumi.

Yumi tingim tasol lait bilong san. Em i kamap long moning-taim na rausim tudak i go; yumi tok: tulait i kamap. Nau ol pisin i stat long singsing na ol lip na plawa i op. Lait bilong san i mekim ol samting i groa; em inap stretim sik; em i mekim drai ol klos; em i hotim skin; em i givim kala long olgeta samting. Long tudak ol samting i lusim kala.

Kainkain lait i bringim moa gutpela samting. Maski i tudak ausait, i gat lait long haus na yumi sindaun isi. Sapos lait i stap long strit bilong taun, yumi no pret. Ol stilman i pret long lait. Long taim yumi wok long kisim save, i olsem moa moa lait i kam insait long kru bilong yumi. Na las tru, Jisas yet em i lait. Olsem Jon 1:4 i tok: "em i lait bilong ol manmeri." Taim em i kam insait long laip bilong yumi, i olsem yumi laitim wanpela lait. Long narapela ples, Jisas i bin tok olsem: "Mi lait bilong graun." (J:12) Tasol long narapela ples em i tanim long ol disaipel na em i tok: "Yupela i olsem lait bilong graun.....Lait bilong yupela i mas lait long ai bilong ol manmeri." (Mt 5: 14-16)

Mi gat wanpela stori bilong soim dispela poin. Wanpela stik masis i kamap long wanpela



FRANK MIHALIC i raitim

kandel na i toksave long em olsem: "Mi gat wok long laitim yu."

Kandel i kros long dispela na i tok, "Nogat tru. Yu no ken laitim mi. Sapos yu laitim mi, bai yu pinisim mi. Mi amamas long stap naispela kandel tasol.

Maski, yu go, yu klia."

Tasol stik masis i bekim tok olsem: "Olabei, yu longlong? Yu laik sanap olsem bilas nating? Yu no laik kisim laip na amamas?"

Tasol kandel i pret na i guria i stap na i komplem olsem: "Tasol sapos yu laitim mi, bai dispela i givim mi pen, bai em i pinisim mi." Nau stik masis i tok: "I tru, paia i save pinisim yu na pinisim mi tu. Tasol yumitupela i gat wanpela wok tasol: bilong givim lait i go long ol arapela samting. Liklik paia bilong mi em i samting nating; em i no save mekim gut long mi yet. Nogat. Tasol sapos mi no laitim yu, laip bilong mi i no gat mining. Mipela stik masis i gat wok long kirapim paia insait long ol samting nabaut.....na givim lait long ol. Yu wanpela kandel; yu tu yu gat dispela wankain wok: bilong givim lait na hotim olgeta sam-

ing i stap nabaut long yu. Yesa, i tru, dispela wok bai pinisim yu yet. Tasol lukim: olgeta samting bilong yu bai kamap lait. Long taim yu givim yu yet, yu no lusim yu yet. Nogat. Ol arapela bai kisim lait long liklik paia bilong yu na ol bai givim i go i go moa moa yet. Tasol sapos yu no laik bai ol arapela pipel i yusim yu, orait, bai yu dai. Em i samting bilong yu."

Kandel i harim dispela gutpela tok bilong stik masis, orait, nau em i sanap stret tru na i givim oda long masis: "Oke! Laitim mi nau."

Em nau! Long wanem taim yu bin serim lait bilong gutpela save na gutpela tingting na eksperiens na edukesen wantaim narapela man/meri? Long wanem taim smail bilong yu i bin givim belisi long narapela man/meri i bel nogut na i gat wari?

Olsem Jisas i tok: "Yu no ken haitim lait bilong yu."

Taoif sab peris bugim mani long wokim nupela haus lotu

ALOYSIUS SAMI i raitim

OL PIPEL bilong Taoif sab peris long Buka, Not Solomon provins i hatwok yet long bungim mani bilong sanapim nupela haus lotu bilong ol. Dispela em long kisim ples long olpela sab peris sios haus long Karavat.

Siaman bilong Peris Kaunsil, Michael Giobun i tok Peris Fainens Komiti i laikim K4,00 moa long helpim ol long go hetim dispela wok. I kam inap nau, peris na komyuniti i bungim pinis K7,000, tasol ol i sot yet long K4,000.

Olpela haus lotu i lapun pinis na sampela palang i sting tu.

Mista Giobun i tok ol pipel i mas hatwok long painim na bungim mani long sanapim nupela sios haus. Nau yet, Fainens komiti siaman, Charles Gaien i hatwok long kirapim ol grup long painim las hap mani bilong dispela wok.

Long helpim wantaim dispela wok bilong kisim mani, ol pipel i salim ol samting olsem kanu, pul, handel bilong akis na ol kain samting moa olsem. Pe bilong wanpela kanu i stap namel long K50 na K70. Na pe bilong wanpela pul na akis handel em K5.

Amamasim bikpela de

NA LONG Novemba 16, 1994 i bin bikpela de bilong ol pipel bilong Taoif Ailan, Not Solomon provins. Dis-

pela em wanpela liklik ailan long wes kos bilong Buka. Planti Katolik manmeri na pikinini i bin bung long bikpela lotu long Karavat we Taoif Sab peris haus lotu i stap long en long amamasim bikde long lukaut santu bilong ol, Santu Albert. Taoif em i sab peris

long mama peris bilong Our Lady bilong Asamsen long Hahela. I gat planti ol liklik ailan we i stap aninit long Taoif sab peris grup. Em long Jupono, Karavat, Tsiawau na sampela arapela moa we ol pipel i sindaun long em.

Planti pipel long Taoif i wokim gaden kaikai bilong ol long bikpela ailan. Na ol haus slip

long ol liklik ailan. Olsem na ol i pul long kanu i go na kam namel long ol ailan long olgeta de. Wanwan famili i mas gat kanu bilong ol yet long helpim wokabaut bilong ol mekim ol wok namel long ol ailan.

Long Buka ailan, spitbot moto i kisim samting olsem 30 minit long mekim ran i go long Taoif.



• Pater Keady bilong Chabal Katolik Misin glvim komunio long bikpela lotu bilong ol meri long pasim 1994 yia. Lotu i bin kamap long Hahela haus lotu long Novemba 11, 1994. Foto: Aloysius Sami.

Ol namba wan studen bin greduet long Yunaited Sios Tiolojikel Koles

VERONICA HATUTASI i raitim

NAMBA WAN lain greduet sumatin bilong Yunaited Sios Eben Seket bai kisim setifiket bilong ol long Sande, Januəri 15, 1995.

Dispela em ol sumatin husat i bin skul long Tiolojikel Koles bilong Yunaited Sios long Rabaul, em long Rarongo. Insait long faipela yia, ol sumatin i lainim ol sabsek long tioloji na ol arapela wok bilong sios na ministri.

Ol lain ya i bin inap long greduet las yia. Tasol long hevi bilong tupela maunten paia long Septemba las yia, ol pasim koles na salim ol sumatin i go long ol wanwan provins bilong ol.

Orait, mausman long Eben Yunaited Sios opis long Mosbi i tok nau ol sumatin bai i greduet long wan wan rijon bilong ol long Januəri 15 I gat nainpela Yunaited Sios rijon long

PNG na Solomon Ailans.

Mausman i tok tu olsem eitpela sumatin bilong Eben rijon bai greduet long wanpela seremoni we bai kamap long Poreporena Yunaited Sios long Hanuabada. Ol bai kisim setifiket bilong Diploma long Tioloji na wok olsem ol Probesen Minista (PM) long wanpela yia. Bihain long dispela, ol inap odeinim olsem ol minista bilong sios.

Tasol long nau, ol PM bai wok aninit long ol superintenden minista.

Yunaited Sios de

Long ol arapela nius, Trinde Januəri 19, 1995, em i Yunaited Sios De. Yunaited Sios long PNG na Solomon Ailans bai selebretim 27 yia bilong em olsem wanpela sios, bihain long tripela sios long tupela kantri i bung wantaim long Januəri 19, 1958, na kamapim wanem yumi kolim tude long Yunaited Sios.

Tripela sios ya em long Metodis, London Misinari Sosaiti (LMS) na Yunaited Sios bilong Australia YSA).

Ples Pepekene makim 4-pela lida long ranim ol yut wok

ARI GUH DANDEE i raitim

OL pipel bilong ples Pepekene insait long Buang i bin makim pinis ol nupela yut lida bilong ranim wok yut insait long 4 senta kongrigesen bilong ol long 1995.

Insait long wanpela bikpela miting we i kamap long ples Pepekene long krismas taim, ol i tromoi toktok i go i kam na makim ol nupela yut lida ya.

Ol lain ya em Amos Yasiling husat i makim Mosbi brens, Jacob Massam husat i makim Lae brens na em tu i siaman, Tonny Giding vais siaman husat i makim Wau brens, David Kekim husta em seketeri, Ngakiking

Masam namba tu siaman, Brenden Jack tresera, Yawising Kendek, Jeffery Tama, John katapsa, Kiking Ngalau, Kalep Giyasa, Lukas Gayam, Mala Mamba, Samson Keren na Nomsing Kelopas.

Bikpela astingting tru bilong kamapim ol dispela lain yut lida bilong makim wanwan ples na 4 senta kongrigesen bilong strongim ol yangpela long wok yut na stretim gut pasin na sindaun bilong ol.

Na dispela em namba wan taim tu we Pepekene i bin tingting long kirapim dispela wok yut. Long lukluk long hevi bilong ol yangpela manmeri

long ples insait long wok bilong yut na tu long gavman.

Nupela siaman, Tonny Giding i askim strong tru olgeta eksekutyut long i mas wok bung wantaim long kirapim wok developmen bilong yut long ples Pepekene olgeta.

Em i askim olgeta yut grup long wok bung wantaim na sapot long helpim stongim dispela wok bilong yut i go strong long dispela yia.

Em i tok sapos i nogat wok bung wantaim na sapot, bai olgeta dispela eksekutyut i stap olsem bilas tasol long ol manmeri bilong ples i ken lukim.

Em i tok i gat plen bilong ranim gut wok yut ya olsem na olgeta i mas bung gut na sanap klostu.

Pop bai krungutim PNG namba 2 taim long Janueri 16

VERONICA HATUTASI I raitim

WOKABAUT long het-man bilong 960 milien Katolik pipel long wol, Pop John Paul II i kam long Papua Niugini i kamap klostu nau. Tripela de tasol i stap na long Mande Janueri 16 long 5 klok apinun, Holi Papa bai krungutim Jacksons ples balus long Mosbi long namba wan de bilong em long wokabaut i kam long PNG.

Pop John Paul II bai stap tripela de long kantri. Na long Trinde Janueri 18, em bai plai i go long Australia.

I gat sampela ripot i tok Pop i pilim sik liklik long Filipino Ailan. Olsem na i nogat gutpela sans bilong em i kam olgeta long PNG. Tasol ripot i kam long ol bikman husat i rereim lukluk raun ya i tok Pop i fit, na bai kam yet long PNG na go olgeta long Australia.

Pop ohn Paul II i no nupela man long dispela kantri. Long 1984, em i bin mekim namba wan pastorel lukluk raun bilong em i kam long PNG. Em i bin go

olgeta long Hagen na wokim bikipela lotu long hap.

Faipela yia bihain nau na Holi Papa laik wokabaut i kam gen long kantri bilong yumi. Wanpela bikipela samting i stap long program bilong dispela wokabaut bilong Pop em long santuim Tolai tisa na katekis, Peter ToRot. Mipela save long stori bilong ToRot na olsem wanem em i bin indai long han bilong ol soldia bilong Japan long Wol Woa II.

Bai gat welkaming seremoni long Mande, 5.15 long apinun taim Pop i pundaun long ples balus. Ol bikman bilong sios, gavman, ol niusman meri, ol kristen na ol arapela pipel bai bungim em long hap.

Orait, long 6 klok apinun long Mande, motoket wantaim strongpela sekyuriti bai Pop i go long Don Bosco Sios long Badili. Dispela em long stap insait long welkaming prea sevis.

Long Tunde Janueri 17, 8.45 long moning



• Ol yangpela ya i trening long karim kruse long bikipela lotu em Pop bai go pas long en long Sir John Guise stedlum.

em bikipela as long Pop i kam long PNG bai kamap. Dispela em long wokim bikipela misa lotu long Sir John Guise Stedlum long blesim Peter ToRot long namba wan rot bipo long em i kamap olsem wanpela santu. Long tok Inglis, ol i kolim dispela rot long biatifikesen. Em bai stap olsem long sampela yia, inap long ol

bikman bilong sios long Rom na long kantri i prea long Peter ToRot na ol i lukim sampela samting i kamap.

Bihain long dispela step ol bai kanonaisim Peter ToRot na wokim bikipela seremoni gen long tokaut olsem em i kamap wanpela santu. Na dispela bai i namba wan taim long wanpela asples PNG man i

kamap olsem wanpela santu.

Planti sikma meri i na ol disebel pipel i gat bikipela laik long Pop i blesing ol. Na Pop ino lus tingting long ol tran-gu ya. Olsem ol i putim long program na long 11.15 Trinde moning, Pop bai i go blesim ol lain ya i bung i stap long Boroko Sen Joseph's Katolik Sios long Boroko.

Pop kam long santuim Peter ToRot

BIKPELA samting tru we Pop John Paul II i kam long mekim long PNG em long wokim biatifikesen lotu bilong Peter ToRot.

Tasol planti long yumi i no klia long wanem em mining tru bilong dispela wot biatifikesen.

Husat tru inap long kisim taitel olsem "Bleset" na tu ol husat tru bai i kisim nem olsem "Santu?"

Bihain long ol i biatifikaim Sevan bilong God, ol i kolim ol long "Bleset." Ol Bleset i kisim nem Santu bihain tasol long sampela sain, mirakel o samting i kamap. Na Holi Si we i gat long em Pop wantaim ol Kadinel bilong em i givim apruvel bilong ol long em. Tupela bikipela samting ya, Biatifikesen na Kenonaisesen i soim olsem sios i luksave long bikipela na gutpela wok man ya i kisim dispela taitel i mekim long laip bilong em. Wanpela long ol em bilip long Sevan bilong God i strong tru na kamapim dai bilong em.

Biatifikesen i min olsem Pop i givim tokaut olsem Sevan bilong God i stap namel long ol Bleset. Bihain long sampela moa yia gen, ol bai kamaim Sevan bilong god olsem Santu. Na dispela oi i kolim long Kenonaisesen.

Planti yia i ken lus bipo long ol i biatifikaim na kenonaisim manmeri long kamap santu. Ol i save mekim stadi na ol wok painimaut long sampela yia pastaim long laip na sindaun bilong dispela kristen manmeri bipo long ol i biatifikaim ol.

Dispela i stat long Kristen komyuniti we man/meri i bin stap long em taim em i laip. Bikipela bilip long eksampela, wok na dedikesen long God na sios i mekim kristen komyuniti i kolim nem long hiro bilong ol long taim bilong hevi na trabel.

Orait, ol lokol bisop i bungim ol infomesenlong dispela man, Bihain ol i fomim wanpela komiti long wokim ripot long ol wok na laip bilong em. Ol ripot na evidens i go long han bilong • Kongrikresen bilong Rots. Dispela em ol saveman husat i kari-maut wok painim bilong ol yet. • Kongrikresen bilong ol Raits i glasim ol ripot. Sapos ol i apruvim dispela ol ripot, ol i givim long Pop longtokoraitim na go hetim dispela samting.



TOYOTA DYNA

THE TOUGHEST MIDDLEWEIGHT TRUCK IN ITS CLASS

Built Tough, Toyota Dyna Trucks give you an excellent choice, with either petrol or diesel power, long or short wheel base, cab/chassis, flat bed, dump truck and the latest styled extra-wide cab with mighty 3.7 lt. direct injection diesel power. We also offer a wide range of Dyna Special Purpose Vehicles, including Agitator Trucks, Fuel Tankers, Panel Vans, Crane Trucks, and Refuse Collector Trucks. When it comes to the Middleweights, you can't beat Toyota Dyna.



 TOYOTA

Ela Motors

PORT MORESBY 229400 • LAE 422322 • RABAU 921988 • MADANG 822188 • GOROKA 721844 • MT HAGEN 521888 • WEWAK 862255
KAVIENG 942132 • KIMBE 935155 • TABUBIL 589060 • VANIMO 871254 • PORGERA 579367
ALOTAU : WALTERS WORKSHOP PH 611174

Peter ToRot - Sepet na helpa

DISPELA em stori bilong Peter ToRot, man husat Pop John Paul II i kam long biatifaem long Tunde Januəri 17 1995 long Sir John Guise Stadium, Mosbi. Wanpela Sekret Hat misinari pater husat i bin wok long Rabaul, Pater Joseph Theler i tokim stori bilong Peter ToRot.

Bisop Leo Scharmach i bin kisim ol stori bilong ol atwines long laip na wok bilong Peter long redim em long rot bilong biatifaem em. Ol soldia bilong Japan i kilim Peter ToRot. Bikos em i sanap strong long holim pas kristen bilip na gutpela pasin.

Long 1882, ol Sekret Hat Misinari i kirapim wok bilong ol long Is Nu Briten. Dispela em ol lain tasol we bihain, Peter ToRot i kisim kisim skul long ol na kamap wanpela long ol namba wan man long kisim trenim long wok katekis.

Pater Laufer, peris nis long Rakunai pas-taim i bin raitim kamap tupela atikel long laip buong Peter ToRot. Namba wan man we i kamaut long 1946 em long "A Catechist Comes a Martyr." Na namba tu long en em "Too Much Christo." Dispela i kamap long 1950.

Namba wan wok painimaut sios i mekim long laip na wok bilong Peter ToRot i kamap long 1983.

Long Me 9, 1985, olgeta Bisop long PNG i wanbel na salim wanpela pas i go long Rom long Pop na askim em long go het long biatifaem Peter ToRot.


Wokhat bilong leiti na kleji long Is Nu Briten na PNG i karim kaikai nau taim Pop i biatifaem Peter ToRot long neks wik.

Hia nau stori bilong Bleset Peter ToRot.

Yangpela

Mama i karim Peter ToRot long liklik ples Rakunai long Is Nu Britain. Dispela em long 1912.

Papa bilong en em Angelo ToPuia, wanpela sief long Rakunai na navunaram eria. Nem bilong mama em Maria Ja Tumul. Peter ToRot em i namba tri



long sispela pikinini bilong tupela marit. Bikpela sista bilong em, Theresa Ja Varpilak na bikpela brata, Joseph Tatamai i stap laip yet. Ol narapela i dai pinis, tupela long ol em taim ol i liklik yet.

Taim em i liklik, ToRot i bin wanpela manki long harim tok bilong papamama. Olsem na em i feveret pikinini long papa taim narapela brata, Telo, i feveret pikinini long mama. Tasol papa ino spoilim ToRot bikos long toktok bilong sief bilong Rakunai husat i kisim ples bilong ToPuia bihain long em i dai, i tok papa i save panisim na givim gutpela toktok long em taim em i bikhet o sakim tok.

ToRot i go long skul taim em i liklik boi wantaim sevenpela kris-mas. Na em i kamap gut long skul wok na long sait bilong bihainim gutpela pasin. Em i fesmanki long ansarim ol kwesten tisa i askim long klas. Ol ripot i tok long taim bilong Baibel klas. ToRot i save kamap olsem maus-man na em ino mekim wanpela mistek long ol toktok bilong em. Taim em i liklik yet, em i soim strongpela lidasip na dispela i soim gutpela eksampel long ol narapela manki tu. Ol ripot i soim olsem ToRot em i wanpela

gutpela manki, husat i harim tok bilong papamama, ol tisa na ol arapela bos bilong em.

ToRot i bin skul long Taligagap katekis skul long 1930. Peris pris bilong Rakunai, Pater Laufer, i askim ToPuia long salim wanpela pikinini man bilong long go skul pater, tasol papa i tok ol no redi yet long dispela. Olem na ToRot i go long katekis skul tasol.

Long hap tu, em i mekim gut long skul na bihainim gutpela pasin. Maski sampela taim em i laik bihainim ol manki long sampel bikhet pasin, em i strong na em ino joinim ol.

Katekis

ToRot i no stap longpela taim long katekis skul. Bikos peri pris long Rakunai i laikim em long helpim em, em i lusim Taligagap long 1933 long kamap wanpela yangpela katekis tru long Rakunai misin stesen.

ToRot i save redi long sanap na tokaut strong long bilip na gutpela kristen pasin. Sapos em i lukim olsem samepela lain i wokim rong, em bai ino inap pret long tokaut egen-sim ol.

Ol witness i tok tu olsem ToRot i save mekim gut long ol lain i wokim rong. Sapos sampela lain i laik

lusim sios, em i toktok gut long ol na ol i tanim bel. ToRot i strong tru long pre. Maski long hauslotu, gaden o wanem hap, em i lotu yet.

Taim ol soldia bilong Japan i holim pasim Pater Laufer long Vanapope, ToRot tasol i kisim ol hostia long kontena na ol arapela samting bilong lotu i go long ples bilong em. Em i yusim ol dispela taim em i wokim lotu long ol pipel long ples long taim nogut.

Papa

Long Novemba 11, 1936, ToRot i maritim Paula la Varpit long Rakunai Katolik Sios. Mama i karim Paula long liklik ples Ramalmal long Jun 17, 1920. Bikos mama bilong em i bilong Rakunai, em i kamap long hap na kamap wanpela sumatin bilong ToRot. Marit bilong tupela ibin gutpela inap long dai bilong ToRot long han bilong ol soldia bilong Japan.

Kandere bilong em, sief Turue i tok ToRot i bin wanpela gutpela papa husat i lukautim gut famili bilong em. Em i bihainim wanem samting em i toktok long en. Em i lukim marit olsem wanpela bikpela samting God i mekim long manmeri i bihainim. Na em i egensim tru pasin long

brukim marit o wanpela man long kisim tupela o moa meri long maritim.

Sepet na helpa

Taim ol soldia bilong Japan i sindaun long Rabaul long 1942, ol i pasim ol misineri na kristen long go hetim wok bilong ol. Bihain long ol i putim ol wait misineri long kalabus, ToRot i strongim pastorel wok namel long ol kristen pipel long ples. Em i lukautim tu ol sik manmeri, visitim ol na redim ol long dai bilong ol. Em i go het tu long baptisim ol pipel na givim sakramen bilong marit long dispela taim nogut. Taim em i mekim wok long taim nogut, hap tok bilong en em, "Wok bilong God em i bikpela na winim olgeta samting."

Pait long pasin bilong gutpela marit i stap, fridom na rilijon

ToRot i egensim tru pasin we ol soldia bilong Japan i mekim long strongim ol Tolai sief long maritim moa long wanpela meri.

Dispela i givim hevi na hatpela taim long ToRot husat i tokim stret oi bikman long noken wokim dispela pasin bikos em i brukim pasin kristen na lo bilong God. Planti hevi i kamap long ples na komyuniti bikos ol man iken maritim moa long wanpela meri.

Ol sief i ripotim ToRot long ol soldia bilong Japan na ol i tok lukaut long em. "Sapos yu go het long egensim mipela na wokim lotu, bai mipela i katim het bilong yu," ol i tokim em.

Planti taim ToRot i kamap long ai bilong plis na kot long egen-sim oda bilong ol Japan.

Long 1945, wanpela sief, Tometa, husat ToRot i pasim em long maritim moa long wanpela meri i lukim olsem gutpela sans long kisim rivens bilong em long ToRot.

Ol i putim sampela lain long spai long ToRot sapos em i go het yet long wokim ol sios sevis. na sapos em i go het yet long egensim ol man i maritim moa long wanpela meri.

Ol soldia bilong Japan i holim pasim ToRot na putim em long kalabus. Sampela long ol toktok we ToRot i mekim taim em i stap long kalabus em. "Bai mi dai long bilip bilong mi. Sapos em i laik bilong God bai mi olsem, bai mi dai." Luisa la Katai i harim ToRot i tok olsem taim em na ol arapela haus-

lain i visitim em long kalabus.

Taim meri bilong em i go lukim em long haus kalabus long laspela de bilong em bipo em i dai, em i mekim dispela toktok. "Noken wari. Mi gat duti long dai long ol pipel na bilip bilong mi long nem bilong Papa, Pikinini na Santu Spiritu."

Dai bilong ToRot

ToRot i redi gut long dai bilong em. Em i save yet olsem dispela em bai i dai long dispela taim. Em i kaikai liklik kaikai we mamam na ol arapela hauslain i kisim i go long em. Em i waswas na bilas gut na putim nupela klos meri bilong em i kisim i go long em. Em i wet na prea i stap.

ToMano husat i stap long kalabus wantaim ToRot i tok em i bin mas gat save long taim bilong dai bilong em.

Long nait tupela dokta bilong Japan i kam na kisim ol kalabus lain i go long gaden bilong ToMano. Ol i lusim tasol ToRot i stap.

Bihain ol i laik was na ol i go bek long haus kalabus. Ol i lukim ToRot i slip long verenda bilong haus kalabus. Tasol ol i ting em i slip tasol. Ol i singautim nem bilong em, tasol em i no kirap. Ol i sekim em na lukim ol kotonwul long nus na ai bilong em. Ol i sanap yet na sief ToRomano i kamap. Taim ol i painaut olsem ToRot i dai, ol i pret. Ol i karamapim bodi bilong em wantaim narapela hap laplap na lusim em i stap. Bihain ol i go bek long gaden bilong ToMano.

Ol i singautim famili, meri na hauslain bilong ToRot i kam. Brata bilong em, Joseph Tatamai i rausim ol kotonwul na lukim ol blut klot long em. Ol soldia i mas givim posin sut long em. I no bikos em i sik, nogat.

Sampela lain i laik planim bodi long ples bilong papa wantaim em, tasol Pater Laufer i strong long ol i planim em wantaim ol arapela kristen long Rakunai. Ol i wokim fiuneral sevis isi tasol bikos ol i pret long ol Japan na ol sapi bilong ol. Dispela em long Sande June 1945. Bihain long dispela, ol i kisim bikpela brata bilong ToRot, Tatamai long wok long ol soldia bilong Japan long Toma. Liklik brata Telo i sik na ol ino larim em i go long wok.

Tude, matmat bilong Peter ToRot i sanap i stap long ples Rakunai.

GEREHU BOTTLERS

PO BOX 2268
BOROKO, NCD
PH: 21 7334

WE ARE NOW BUYING EMPTY BOTTLES

At our new depot at Gerehu Stage Five (5) on Section 338, Lot 24, 25, 26 opposite the Elcom Office Gerehu.

Our prices are:

1. Empty Coke bottles: K1.50
2. Pepsi bottles: K1.70
3. SP bottles: K1.20

We guarantee you an efficient and fast service.

Do watch for Christmas specials coming shortly.

BETELNUTS & SAGO

PH: 86 2743 FAX: 86 2743

WEWAK/HAGEN K218 - for ONE 50 kg bag
WEWAK/HAGEN K597 - for THREE 50 kg bag
WEWAK/MORESBY K299 - for ONE 50 kg bag
WEWAK/MORESBY K690 - for THREE 50 kg bag
WEWAK/TARI K293 - for ONE 50 kg bag
WEWAK/MENDI - K278 - for ONE 50 kg bag
WEWAK/TABUBIL K299 - for ONE 50 kg bag
WEWAK/PORGERA K299 - for ONE 50 kg bag
WEWAK/GOROKA K242 - for ONE 50 kg bag
WEWAK/WAPENAMANDA K277 - for ONE 50 kg bag
WEWAK/KUNDIAWA-K218 for ONE 50kg bag
WEWAK/KUNDIAWA-K597 for THREE 50 kg bag
(* KUNDIAWA Pick up at Hagen).

DAKA OR MUSTARDS:

WEWAK/HAGEN - K100 for ONE 25 kg
WEWAK/OTHERS - K120 for ONE 25 kg

COST INCLUDES AIRFREIGHT

* We are also looking for agents in Moresby must have car & telephone or fax.
Contact: Peter Devis, Dagua Market P.O. Box 89
WEWAK ESP.

Pop askim ol lotu long wok bung

POP John Paul 11, hetman bilong bikpela kristen sios long wol, Katolik Sios i mekim 10-pela de wokabaut i go long Esia na Pasifik long dispela mun.

Long dispela wokabaut we i stat long, Januəri 12, 1994 long Filipino na kam long PNG, i go long Australia na pinis long Sri Lanka long India, bikpela tingting na samting Pop bai toktok long en em;

• askim ol kain lotu long stap gut na wok-bung long helpim wanpela narapela.

Moa yet long Filipino Ailan we em i wanpela Katolik kantri long namel bilong ol arapela strongpela sios olsem Muslim na Hindu.

• Pop bai apil long ol

pipel bilong tripela kantri long pinisim ol pait we i go het yet long kantri bilong ol. Em long ol kantri olsem PNG, Filipins na Sri Lanka.

• Na tu, em bai blesim tripela Katolik pipel bilong PNG, Australia na Sri Lanka long ol iken kamap santu bihain. Dispela i strongim laik bilong Pop long kamapim ol model santu long ol lokol sios long wol.

Wokabaut i stat tude, Januəri 12, taim Pop i krugutim Manila long statim faivpela de wokabaut bilong em long Filipino.

Long Filipino, em bai i stap long bikpela bung

bilong Katolik Sios long selebretim Namba ten Wol Yut De. Planti ol yut na kristen pipel bai i stap long dispela selebresen. Filipino em i wanpela kantri long Esia we 85 pe sen long ol pipel i memba long lotu Katolik. Dispela em long rijon we ol arapela sios i strongpela memba bilong ol lotu olsem Hindu na Muslim.

Nau long Filipino, i gat belhevi wantaim president bilong kantri, Fidel Ramos na bikman bilong Katolik Sios long hap, Kadinel Jaime Sin. Tupela sait, gavman na sios, i gat belhevi long pasin bilong ol mama i kisim marasin na pasim bel

long ol i noken karim moa pikinini.

Strongpela lo bilong Katolik Sios i stap olsem em i tambu long pasim, rausim o kilim dai bebi taim em i stap long bel. Bikos dispela i daunim gutpela pasin ol man i bihainim long stap insait long sosaiti, komyuniti na kantri.

Olsem na Katolik Sios long Filipins i bihainim strong dispela lo, tasol dispela gavman we Mista Ramos, wanpela Protesten i go pas long em stat long 1992 yet i givim tokorait long ol mama long yusim marasin bilong kontrolim bikpela populesen long kantri we i wok long go antap olgeta yia.

Toktok bilong Asbisop bilong Mosbi Asdaiosis, Sir Peter Kurongku

Ol pipel long Papua Niugini, kantri bilong yumi em i liklik na yangpela. Tasol yumi laki tru long bikman Pop John Paul 11 i mekim namba tu wokabaut bilong em i kam long kantri gen long dispela yia.

Em i mekim namba wan wokabaut bilong em i kam long PNG 10-pela krismas i go pinis long 1984. Dispela em long amamasim 100 yia bihain long ol namba wan misinari i planim Katolik Sios long PNG.

Yumi i amamas long tingim olsem las wokabaut bilong Pop i kam long kantri i no longpela taim i go pinis.

Long dispela taim, Pop i kam long blesim Peter To Rot, Tolai katekis. Dispela em i bikpela samting tru na i olsem tu blesing long sios na ol pipel bilong PNG na Oseania.

Peter ToRot em i namba wan asples man long PNG long kisim blesing na luk-



• Sir Peter Kurongku

save long Pop long kamap wanpela santu man. Na em iken kamap santu long sampela taim i kam, bihainim ol loa bilong sios yet.

Orait, long nambawan wokabaut i kam long kantri, Pop i bin stap wantaim ol pipel long amamasim 100 yia bilong Katolik Sios long kantri. Long nau, yumi wantaim bikman i amamasim kaikai long wok bilong sios insait long namba wan 100 yia.

Katekis
Peter ToRot em i wanpela yangpela man

Tolai husat i wok hat long wok bilong em olsem katekis. Yumi save dispela komitmen long wok i mekim em i painim dai long han bilong enemi. Em long ol soldia bilong Japan. Bikos em no givap long dispela wok, maski ol Japan i putim tambu long ol kristen misineri i go hetim wok bilong ol.

Harim Tok na singaut bilong God em i bikpela samting tru, winim tu oda bilong ol soldia long Japan.

Histori o stori bilong ol katekis long PNG i stat long wankain taim ol i planim Katolik Sios long kantri. Namba wan samting we ol misineri i wokim taim ol i kam long kantri em long redim sampela yangpela man husat bai i helpim ol olsem ol gait na tu tanim tok.

Bihain ol i kirapim ol katekis trening senta long ol daiosis. Bipo long gavman na sios i kirapim ol skul long kantri, ol katekis i mekim wok bilong tisa

long skulim ol pipel long tok Inglis, namba, rit na lotu skul. Ol dispela lain tasol i bin kisim sampela fomol edukesen long dispela taim.

Histori bilong katekis trening na wok long Asdaiosis bilong Mosbi i kamap nupela tasol. Ino olsem long ol arapela hap long kantri.

Long 1970, Pater Bill Ryan i kirapim katekis skul long Sivarai Namona we nau ol i kolim long Pop John Paul Pastorel Senta. Tasol planti long ol i kisim trening i kamap olsem ol sios lida. Na liklik lain tasol i kamap olsem ol katekis. Wot katekis nau i min olsem ol rilijes tisa long kantri na tu long ol arapela ailan long Pasifik.

Yumi go het long prea long planti moa yangpela manmeri iken bihainim eksampel bilong Peter ToRot, husat i givim laip bilong em long prea na daunim em yet long kari-maut sevis bilong God.

Toktok bilong Asbisop bilong Rabaul Asdaiosis, Karl Hesse, MSC

Dia Asbisop Peter Kurongku na ol Brata Susa,

Mipela long Asdaiosis bilong Rabaul i laik tenkim yu, Asbisop, long askim mipela long kam long Mosbi. Mipela i tok tenkyu tu long ol brata na susa long Asdaiosis husat i mekim ol bikpela wok long sapatim yu na i mekim isi long yu askim mipela long kam.

Yes, mipela i wet long tupela yia long wokabaut bilong Pop John Paul 11 i kam long Rabaul. Tasol helt bilong Pop i no gutpela tumas nau. Bikos em i wok long go lapun. Na tu, hevi long maunten paia long Rabaul i mekim wokabaut bilong Pop long go long hap i hat olgeta. Mipela i sori tru long lukim olsem Santu Papa i no inap kam

long Rabaul, tasol mipela i amamas long bungim em long Mosbi na stap insait long bikpela lotu Misa bilong blesim Katekis na Matir, Peter ToRot.

Mipela i tenkim tu Santu Papa long givim mipela sans long bungim em long kantri bilong mipela yet. Mipela i tenkim em long kamap bilong em long kantri. Na ino tasol long em i salim mesej tasol long mekim mipela i bel isi long taim maunten paia i bagarapim mipela. Wokabaut bilong em i mekim mipeli i pilim olsem mipela i hap long bikpela kristen famili long wol.

Wokabaut bilong Santu Papa bai strongim famili spirit na bilip bilong mipela. Em bai givim mipela man olsem modol long yumi ol kristen long bihainim

long onerim dispela wantok bilong yumi yet, Katekis Peter ToRot, husat i dai long han bilong ol soldia bilong Japan. Dispela em bikos em i go het long wok olsem katekis. Em yet i givim laip bilong long ol pipel olsem tasol wasman bilong sipsip i givim laip bilong em long ol sipsip bilong em. Mipela i amamas tru long brata bilong mipela, Peter ToRot. Santu Papa yet i givim nem long em olsem Santu matir.

Ol brata na susa, mipela i amamas long kam stap long Mosbi na autim bilip bilong mipela long amamasim dispela bikpela de na pre wantaim yupela.

God i blesim yupela.
God i blesim yupela.
Karl Hesse
Asbisop bilong Rabaul.

Yu mas baim long 10t tasol!



10t tasol!



5t tasol!

Sapos ol i askim moa... go long narapela stoa!

Man husat i kamap Pop

VERONICA HATUTASI i raitim

MAN husat planti Katolik na ol arapela pipel long wol i save olsem Pop John Paul II i gat nem tru we ol i givim taim mama i karim em. Dispela em long Karol Josef Wojtyla.

Mama i karim Karol long Ma 18, 1920, long liklik taun ol i kolim long Wadowice, long kantri Polan insait long Yurop. Dispela ples em i 30 kilomita longwe long biktaun, Krakow. Bibe long namba tu Wol Woa i kamap, Wadowice i gat samting olsem 10,000 pipel long em. Dispela taun em i bin gat nem long groim na salim ol agrikalsa prodak olsem wit, poteto, bitrut na ol arapela kain kaikai bilong gaden moa olsem. Haus lotu long Wadowice i sanap yet na tude, planti pipel i save kam long longwe ples long lotu long em.


Famili bilong Karol i nogat planti samting. Tasol ol i strongpela kristen famili. Papa bilong Karol em i bin wanpela Leftenen wantaim ami bilong Polan. Tasol indai bilong em long namel bilong bikpela pait long 1941 i bin lusim Karol i sori tru taim em i gat 21 krismas tasol. Mama, Emilia Kaszowska i dai long 1923, taim em i liklik yet wantaim tripela krismas. Long famili bilong em, mama i karim tupela pikinini

tasol. Bikpela brata bilong em, Edmund, husat i kamap wanpela dokta i dai bipo long woa. Olsem na Karol wantaim papa bilong em i kamap gutpela poroman tru. Bihain long olgeta famili memba bilong em i dai, Karol i wan istap wan yet, tasol ol arapela hauslain bilong em i stap.

Karol i bin kamap wanpela Olta boi. Em i bosim ol arapela manki husat i wok wantaim em. Long skul, em i kamap wanpela top futbol pilai na swima. Ski long ais em i wanpela feveret pilai bilong em tu.

Long ol arapela kos long skul, Karol em i wanpela top sumatin tu. Wanpela tisa bilong em, Dokta Edward Zachar i tok olsem Karol em i wanpela klewa manki long Wadowice. "Em i top sumatin long skul we ol mak bilong em i antap moa, winim ol arapela sumatin. Mi ken kolim em long modol sumatin. Mi save givim ait notis long ol manki i bikhet, tasol inogat wanpela taim nem bilong Karol bai i kamap long dispela lista, "Dokta Zachar i tok. Stat yet long taim em i liklik, i luk olsem Bikman long Antap i mas makim Karol long bikpela wok long bihain taim. Olgeta lain husat i save long em i laikim

Stori bilong Pop John Paul II



o edmaiarim em tru.

Long 1938, tupela papa na pikinini i muv i go long Karaskow. Na Karol i go skul long Jagiellonian Yunivesiti. Long hap em i stadim drama, raitim ol poem na ekt long ol drama pilai long tiata grup.

Taim namba tu Wol

Woa i bruk na ol lain Nazi long Jemani i go insait long Polan, ol i pasim yunivesiti. Na laip i hat tru.

Karol i wok long laimston kwari long painim liklik mani na em wantaim papa iken baim kaikai long em. Bikos long dispela taim tu,

papa ino moa wok.

Taim em i painim olsem papa i dai bihain long em i kam bek long wok long 1941, em i sori nogut tru. Em i go stap wantaim gutpela poroman bilong em, Julius Kodynski. Long dispela taim tu, em i stat long stadi tioloji na

ol arapela samting bilong sios.

Long 1944, ol Jemen Nazi i tekova long Polan na mekim ol sleiv na wokman bilong ol. Na ol i kilim planti Jews, ol pipel bilong Polan na ol lain bilong sios.

Long dispela taim tu, Asbisop bilong Krakow, Adam Sapieha i kisim sampela yangpela man long kamap semineri. Na Karol i wanpela long ol. Ol i stap hait long haus na wok, stadi na kaikai inap long pait i pinis. Dispela i mekim na Jemen emploimen opis i painim Karol. Tasol hariap tru, Asbisop Sapieha i rausim nem bilong em long lista long Solvay.

Na nogat man long Wadowice i save long stap bilong Karol. Ol i ting em i dai pinis.

Bihain long Wol Wo, Karol em i go hetim skul seminari long kamap pater. Long Novemba 1, 1946, em i kisim odinesen long kamap wanpela pater. Taim em i wokim namba wan misa long Wadowice long Novemba 2, ol pipel i amamas tru long em.

Cadinel Sapieha i luksave long bikpela save Karol i gat na em i salim em long skruim save bilong em long Rom. Em i lainim tok Italien, Rasien, Frans na Inglis.

Taim Karol i go bek long Polan long 1949, ol komunis i kisim pinis

kantri bilong em. Em i kamap peris pris long Sen Florian long Krakow na wok wantaim ol sumatin na ol saveman.

Long 1953, em i kamap profesa long Morol Tioloji long Krakow na Lublin Katolik Yunivesiti.

Taim em i 38 yias long 1958, em i kamap Oksileri Bisop bilong Krakow. Na em i visitim olgeta peris, ol seminari na em i save long olgeta pater long ol daiosis bilong em.

Long dispela taim tu, em i strong long go hetim tupela wok wantaim. Em long wok long sios na profesa long yunivesiti. Olsem na long dispela taim tu, bihain long em i kamap hetman bilong Katolik Sios, em i stap olsem profesa. Na em i no givap long raitim ol wol long tioloji, pilosofi, ol pilai drama na ol poem. Tupela long ol poem bilong em we planti lain i save long ol em "Quarry" na "Goldsmith."

Long Desemba 30, 1963, Pop Paul VI i mekim em kamap Metropolitin Asbisop bilong Krakow. Na long Ma 29, 1967, em i kamap kadinel.

Long Oktoba 1978, bihin long dai bilong Pop John Paul 1, ol i makim em long kamap Pop, wok em i holim ikam inap nau. Em i nambawan man i kam long wanpela komunis kantri long kamap Pop. Tasol Polan em i wanpela strongpela Katolik kantri tru.

Long wok na laip bilong Pop John Paul 11, tupela samting i kamap long ples klia. Em long bikpela laik bilong em long • Jisas na Mama Maria na • long ol yut long wol.

Sampela wol ol kantri we em i visitim bihain long em i kamap olsem Pop em long : Meksiko, Dominiken Ripablik, Bahamas, Polan, Ailen, Amerika na Teki. Dispela em long 1979.

Long 1980, em i visitim Zaire, Congo, Kenya, Ghana, Apa Volta Aivri Kos, Frans, Brasil na Wes Jemani.


Long dispela yia, wokabout bilong Pop bai go olsem long Esia na Pasifik. Olsem na em bai kamap long yumi hia long PNG long neks wik mande, Januəri 16 1994.

Em i bikpela samting tru long laip bilong ol Katolik pipel long lukim hetman bilong ol i kam long kantri. Olsem na ol i bilip planti lain katolik long kamap long Mosbi long lukim Pop neks wik.

'BACK TO SCHOOL'



No ken abrusim 'Go Bek long skul' saplimen long 19 Januəri insait long *Wantok* na *Times* niuspepa. Olsem na hariap i go long ol nius stua klostu long yu na baim wanpela *Times* na *Wantok* niuspepa na lukim wanem samting bai pikinini bilong yu i mas i gat taim em i go bek long statim skul.



• Poto i solm Pop taim em i manki.

Tokorait bilong lukautim skul subsidi mani long Waigani bai kamapim moa hevi


NUPELA Yia i stat pinis. Tasol mi laik yusim dispela taim mi gat long dispela niuspepa long tok Hepi Nu Yia long yu husat man, meri o pikinini save ritim *Wantok* niuspepa. Mi bilip olsem 1995 bai gutpela long yu na famili bilong yu.

Long dispela wik, mi laik toktok long dispela disisen bilong Nesenel Eksekutiv Kaunsil long nesenel Edukesen dipatmen bai kontrolim dispela K35 milien skul subsidi mani long Waigani long Mosbi.

Edukesen minista Joseph Onguglo i tokaut olsem Nesenel Eksekutiv Kaunsil (NEC) i wokim disisen long kontrolim dispela K35 milien long Waigani. Bikos long las tupela yia i go pinis, Provinsal Edukesen Bod bilong wanwan provins i no bin yusim gut skul subsidi mani. Sampela i yusim krangi na ol arapela i yusim long rot na wok we dispela mani no sapos long go aut.

Astingting na NEC i wokim dispela disisen, Mista Onguglo i tok, em long yusim mani long stretpela rot. Na mani no ken go nabaut long ol krangi smting, rot na wok.

Dispela disisen bilong gavman i gutpela long sampela rot na i no gutpela long ol arapela rot. Bikos disisen ya bai kamapim gutpela samting na tu samting we i no gutpela tumas long sait



NABAUT LONG PNG

wantaim

GODFRIED YASSAFAR

bilong ol tisa, sumatin na skul. Planti papamama, tisa na provinsal edukesen atoriti bai no inap amamas tumas long dispela disisen bilong gavman.

Mista Onguglo i tokaut olsem nesenel Edukesen dipatmen yet bai wokim disisen long wanem samting wanpela skul i nidim. Orait dipatmen bai baim na saplaim o givim i go long dispela skul.

Dispela toktok bilong Mista Onguglo, sapos ol tisa i skelim gut, ating i no gutpela tumas. Taim skul i stat, dispela toktok bilong Mista Onguglo bai no inap karim kaikai. Mista Onguglo i ting olsem tok bilong em bai karim kaikai. Tasol em i no skelim na glasim gut wanem kain ol hevi bai kamap bihainim dispela toktok na disisen bilong gavman.

Dispela hap tok bilong Edukesen minista i soim olsem nesenel Edukesen dipatmen bai wokim disisen long baim ol samting wanpela skul i nidim. Tasol wanpela askim i mas stap olsem: Long wanem rot bai

nesenel Edukesen dipatmen i save long ol samting wanwan skul insait long wanwan provins long kantri nidim. Ol opisa bilong nesenel Edukesen dipatmen i stap long Waigani long Pot Mosbi. Ol i no stap long Wewak, Manus, Kerema o Mendi. I tru olsem i gat ol provinsal opisa i stap long wanwan provins. Tasol ol bai no inap traim long helpim ol opisa long hetkwata. Long wanem ol i kamap wantaim tingting olsem "sapos hetkwata i laik bosim olgeta samting orait em i ken wokim olgeta wok."

Namba wan taim gavman i senisim polisi bilong fri edukesen/skul subsidi na tokaut olsem ol papamama i mas baim skul bilong ol pikinini. Nau gavman i tokaut olsem mani bilong skul subsidi bai stap long Waigani. Na Waigani yet bai baim ol samting wanwan skul i nidim.

Planti tisa na provinsal edukesen atoriti na opisa long wanwan provins i luksave olsem hetkwata (Waigani) i gat dispela pasin bilong holimpas long

samting longpela taim. Dispela em long mekim na stretim ol pepa wok long karim aut wok. Bihainim dispela luksave bilong dispela pasin, planti skul bai no inap kisim hariap ol samting ol i nidim. Bikos wok bai ron isi isi long hetkwata. Taim dispela samting i kamap, ol tisa insait long rurel eria bai spenim mani long kam aut long taun na sekim ol samting. Na bihain spenim mani long go bek.

Gavman i no sapos long wokim dispela disisen. Bikos i gat ol gutpela rot bilong stretim dispela hevi we Provinsal Edukesen Bod i no yusim gut mani.

Dispela disisen bilong gavman nau bai kamapim hevi long sampela provins husat i save na tu bin yusim skul subsidi mani bilong em long stretpela rot. Hevi bilong liklik lain tasol i karamapim tu gutnem bilong ol gutpela provins.

Wanpela gutpela rot long daunim hevi bilong "yusim krangi skul subsidi mani" em gavman i no laik wokim disisen long holim na kontrolim mani bilong ol lain husat i bin yusim krangi skul subsidi mani stap bek long Waigani. Tasol gavman i mas salim mani bilong ol provins husat i save na tu bin yusim gut skul subsidi mani bilong ol

Viles bikman komplem long pablik sevan no wok gut

PAULUS TALI i raitim

KOMPLEN i wok long kamap long ol pablik manmeri olsem ol pablik sevans insait long ol gavman opis i no save mekim gut wok bilong ol.

Wanpela bikman bilong ples long Morobe provins, Aaron Hamm i tok em i no amamas long planti taim em i save laik go long lukim ol wokman bilong gavman na ol i no save stap long opis.

Mista Hamm i tok em i save bungim tu planti arapela lapun bilong ples na ol yangpela i save laik go long ol gavman opis wantaim ol hevi na wari bilong ol. Tasol seketeri i save tok bos i go aut.

Mista Hamm i tok ol i save bungim hevi long ol gavman opis bilong DPI, Edukesen, Helt; Komes, Yut na ol arapela moa we i save wok klostu long ol pablik.

Mista Hamm i tok dispela i no gutpela pasin tru bikos planti bilong ol i save kam long ples na taim i no gat man long helpim ol, dispela i save bagarapim tingting bilong ol.

Bikman ya i tok planti taim ol i save lukim wokman bilong gavman i save pulap long haus laki olsem Hos Resis. Ol i save go long ol dispela hap long taim bilong wok na i no long fri taim bilong ol yet.

Long dispela as, ol i no helpim ol pipel gut wantaim hevi bilong ol.

Em i askim ol bos bilong gavman dipatmen long lukluk klostu long dispela kain pasin na stretim. Bikos opis bilong gavman em bilong pipel long stretim ol hevi na wari bilong ol.

Bilong wanem na Mortein?

Bikos Mortein i save lukautim gut famili bilong yu

- * Mortein i save kilim kwik natnat na lang.
- * Mortein eitpela aua koil inap lukautim yu long ol binatang i save flai.
- * Mortein surface spray bai lukautim yu long ol kokoros na kain kain binatang.



Mortein

BAI LUKAUTIM GUT FAMILI BILONG YU LONG KAIN KAIN SIK



• (Raithan) Oi ami opisa bilong Amerika i karim bodi bilong ami pailot husat i bin pundaunim balus long Not Korea long las mun long talm no gut bilong ren.
 • (Antap) Oi ami bilong Bosnia i redim bom bilong sutim i go long ol Muslim ami. Bosnia ami i kem long Prtoka ples na wetim birua long kamap.

• Prins William na Harry i amams long ski long sno long Klosters taun long London.

• Oi meri long Iran i karamapim ol bikpela blanket na haltim ol pikinini bilong ol bikos ples i kamap kol long las yia.



• (Iephan) Oi Haitan refusi i lusim Amerika Nevel Bes na sip bilong ami i kism ol i go bek long Kuba. Oi i kral no gut tru bikos ol i no amamas long go bek.
 (antap) Oi ami bilong Yunaltet Nesen i was long ol refusi man-meri bilong Muslim we ol i was long ol Inap palt namel long Islam na Bosnia i orait bal ol i ken salim ol i go bek long ples.

PNG LAIPSTAIL

NCDC klinim ol rot insait long siti tasol olsem wanem long ol baret?

GODFRIED YASSAFAR i raltim

PLANTI taim sapos yu ron long PMV bas, ka bilong wok, ka bilong yu yet o ka bilong wanpela poroman o wantok insait long Mosbi siti, yu bai lukim sampela

gras na tu long ol arapela hap. NCDC i givim kontrak i go long ol grup long klinim na rausim ol pipa long rot. Na ol rot i luk klin na gutpela. Tasol

NCDC i no opim ai na lukluk i daun long ol baret arere long rot. Na tu ol baret i stap arere long ol haus long ol liklik stret nabaut insait long siti. Sapos ol inspekta bilong NCDC i gat taim, ol i ken lusim opis bilong ol o kam ausait

long ka bilong ol na sekim ol baret. Mi bilip olsem taim ol i go na sekim wanpela baret na lukim ol pipa, ol bai ting olsem ai bilong ol i, giamanim o pilai trik long ol-ol baret i pulap tru long kainkain pipa na sampela i smel olsem ples bilong tro-



yangpela manmeri karim brum na rek na waitpela beg o blakpela plastik beg. Wok bilong dispela lain em long brumim na rekim ol pipa long sait bilong rot na putim i go insait long ol beg na plastik beg. Ol i kism kontrak wantaim Nesenel Kapital Distrik Komisn (NCDC) long karim aut wok bilong klinim pipa arere long rot.

Dispela lain i no save wari tumas long hot san bilong Mosbi siti. Ol i no save wari long ol PMV bas i kirapim das klostu long ples ol i wok.

Bikpela samting i olsem ol i klinim ples long mekim rot i luk gutpela. Ol i lusim tingting long hot san na das na mekim dispela wok long soim mipela ol arapela manmeri insait long siti olsem mipela i mas lukautim na klinim ples bilong mipela. Mipela i mas stopim pasin bilong tro-moi pipa nabaut-long haus, rot, kona bilong strit, arere long opis, rotbung, liklik bus o



Long dispela tripela poto yu ken lukim ol pipa i pulap tru long baret. Antap: Baret arere long hos res haus long Boroko. *Lephan-Antap*: Baret klostu long Lahara servis stesin. *Lephan-Daun billo*: Baret arere long 3 Mail bus stop long Taurama soping senta.

moi na kukim pipa. NCDC i lukluk tasol long rot. Tasol em i no lukluk long ol baret we i ken kamapim kainkain smel nogut. Na dispela i ken givim sik i go long ol manmeri husat i stap klostu long dispela ol baret.

Olsem wanem! NCDC i gat plen o tingting long klinim ol baret na rausim ol pipa i stap insait long ol. Pot Mosbi wanpela taun insait long kantri we i save nogat ren longpela taim tru. Olsem na ol pipa long baret i save stap olsem tasol. Sapos i gat ren orait wara bai rausim ol pipa na baret i klin. Watpo na sampela

baret i save smel nogut? Bikos wara nogut i kam aut long ol haus i save go daun long ol baret. Tasol i no inap lo ng ron bikos ol pipa i pasim baret. Dispela i stopim wara long ron na i stap tasol long wanpela hap na kamapim smel nogut.

NCDC i toktok long klinim Mosbi. Em i mekim wok long klinim Mosbi siti. Tasol NCDC i no sekim ol takaboks, beksait bilong ol bikpela stua na tu sampela liklik stua, baret, toilet long maket na ol arapela eria. Wanpela bikpela baret insait long siti staf long 3 Mail bus stop long Taurama soping senta.

Dispela baret i go olsem long Boroko, Godon na go olgeta long Erima. Baret ya i pulap long kainkain pipa-plastik, botol, empti tin bia na sof dring, emti katen bia na sof dring na tu planti arapela pipa nabaut. Ol gras tu i pulap insait long baret.

Bikpela samting i olsem smel nogut ol pipa insait long ol baret i kamapim i ken kamapim sik long ol manmeri husat i stap klostu o arere long ol baret. Sapos yu go insait long wanpela bilong ol dispela baret, nus bilong yu bai pas na blok. Na bai yu painim hat tru long pulim win.

Toilet bagarapim gutpela Godens maket

DANIEL MONA i raitim

GODENS maket long Mosbi i gat nem long salim planti gutpela kaikai, kumu na abus long Mosbi na Sentrel provins.

Planti pis bilong solwara i save long long ol asples Papua we ol yet i save pulapim long bokis ais. Arapela i save karim ol abus bilong ol i kam we ol i kukim pinis o drain tasol na kam salim long maket.

Tasol i gat wangepa hap eria insait long dispela maket we i no gutpela tumas long ol manmeri husat i laik raun long baim kaikai na tu salim kaikai.

Toilet bilong Godens maket i save oltaim kamapim bikpela smel long ol manmeri husat i raun long baim kaikai na tu ol lain i kam long ples long salim kaikai.

Dispela toilet tu i stap klostu olsem long 10 mita samting long ol tebol bilong maket. Na smel bilong em i save bagarapim tru ol manmeri.

Wara tu i stap long hap na ol maket lain i save kisim wara long dispela hap tasol na kapsaitim antap long ol kumu na kaikai bilong mekim ol i stap gutpela na i no ken drai.

I gat luksave olsem ol lain husat i salim kaikai bilong ol klostu long dispela hap toilet i stap i no save salim gut kaikai bilong ol. Bikos i no gat man i save go klostu long baim kaikai bilong ol.

Taim sampela lain bilong ples i save kam long maket na painim olsem ino spes long tebel samting, ol i save

go mekim nating klostu long toilet ya na salim ol kaikai bilong ol.

Tupela man long maket i bin tokaut long tingting bilong tupela olsem i mas gat senis i kamap long dispela toilet insait long Godens maket. Tupela i laikim bai toilet i mas go stap longwe long hap bilong ol i salim kaikai.


Tupela man ya i tokaut tu olsem ples bilong karim wara tu i mas stap bilong em yet na i no ken stap wantaim toilet. Ol i laikim tu bai ol wokman bilong maket i mas wasim toilet long olgeta aua bai toilet i ken smel gut.

Bikos smel bilong toilet tu i save pulim planti long tumas long maket.

Toilet i wangepa hevi insait tu long Mosbi siti bikos planti hap bilong ol manmeri i ken go kisim win o pilai long en i no gat toilet. olsem long nambis bilong Ela Beach i no gat toilet.


NCDC Deputi Siti M e n e s a , K u m a r a s w a m y Arasaratnam i tok planti toilet insait long Mosbi i pas pinis bikos ol pablik i no save yusim gut. Ol pablik manmeri i save bagarapim toilet we smel i save kamap na bagarapim ples.

Mista Arasaratnam i tok NCDC i pasim pinis ol pablik toilet long planti hap bilong siti. Long Ela Beach bai ol i wokim nupela gen tasol bai i longwe long hap nau olupela toilet i sanap.



• (antap) - Wangepa haus maket long Godens. Toilet i stap klostu tasol long raitan bilong poto.

• (raitan)-Hohola maket i soim toilet long raitan. Klostu tasol long toilet em PMV bas stap na ol stua.



SKRUIM TOK

Lep i go long rait

1. Longpela sia
4. Bilong opim lok.
5. Stretim gras long en.
8. Hevi bilong ol samting.
11. Paiawut em kaikai bilong en.
12. Dofin.
14. Wangepa kain sel bilong solwara.
15. Long taim ol frut i redi long kaikai.
16. Tenkyu.
19. Pis i save kaikai man.
21. Maria Yosep i papamama bilong Jisas.
22. Bilas bilong lek.
23. Wangepa kain mat ol i wokim long skin bilong ol enimal.

26. Tony na Robert Namana i gat nem long dispela spot.
28. Klap bilong ol eksevisman.
29.Tombi.
30. Wangepa tul bilong ol kanda.
32. Solwara (Tok Inglis).
33. Ol i save lukautim ol sikman.
34. Dispela tieta grup i stap long Goroka.
37. Bai yu kisim dispela long taim ol i paitim pes bilong yu.

Antap I go daun

2. Wangepa mun.
3. Yu yet.
4. Givim samting long stretim wangepa

- asual long narapela man.
5. Samting i gat foapela lek.
6. Yu (tok motu).
7. Wangepa diwai.
9. Glu.
10. Wangepa stesin long Wes Sepik Provins.
11. Abrus long rot.
13. Bilong ol kristen em Sande na bilong oSDA em Sarere.
16. Ol pipel i go holide long narapela ples.
18. Kutbu, Sambri na Kopiago em tripela.
19. Long taim ensin bilong ka i dai ol man i save ka na statim.
20. Bikpela maket long Mosbi.

24. Poroman.
25. Klostu.
27. I no pas.
31. Niugini.
32. Wangepa rot bilong kisim marasin.
35. Bilong lukluk.
36. Nogat. (Tok Inglis).

ANSA BILONG SKRUIM TOK LONG PES 19



Pasin bilong kem long ol pipia ples i bikpela nau • Dispela poto i soim wanpela ples bilong tromoi ol pipia insait long Mosbi siti. Olgeta de ol pipia ka save go kapsaitim pipia long ol hap olsem Baruni na 6 mail. Planti trangu grasrut manmeri na pikinini save kem long ol dispelapipia hap na wetim pipia ka. Na mumutim ol pipia nabaut. Mipela i tok PNG gat planti bus raun na nogat inap pipel. Tasol long oi siti olsem Mosbi, kain laipstail bilong kem arere long ol pipia ples i kamap bikpela nau • Lukim ful ripot long neks wik.

STORI BILONG BAMBELLI





Big Bro **REBO**



Spak **MAIK**





■ Kanage em i man bilong kaikai rais stret. Wanpela taim meri bilong Kanage kukim rais long apinun na tokim Kanage long kaikai. Tasol Kanage i les long kaikai rais na tokim meri bilong em olsem: Mami, mi kaikai rais long olgeta apinun i go na mi les pinis. I gat sampela arapela kaikai long kisim ples bilong rais o nogat? Meri bilong Kanage kirap na askim em: Yu les long kaikai rais na bai yu kaikai wanem samting? Kanage tingting i go nogat na kirap tokim misis bilong em: Mami, mi no askim yu long kros o askim kwesten long mi. Mi askim yu sapos i gat sampela arapela kaikai-kain olsem...yu save feveret ya-we i gutpela long kaikai long apinun. Misis Kanage i harim olsem na tokim Kanage: Nau tasol yu tok yu les long kaikai rais na wanem taim bai yu les long dispela feveret kaikai ya. Sandaun Dweller

VANIMO

□ Potnalt wik Fralde na Kanage i go long beng long kisim mani. Em i go kamap long beng na lukim ol manmeri sanap long tupela lain. Tupela lain i longpela tru. Lain Kanage i sanap long en i moa longpela long arapela lain. Dispela lain bilong Kanage i gat wanpela meri tasol. Meri ya i sanap namba tu long lain. Long fran bilong meri ya em wanpela man i sanap. Kanage i sanap long beksait stret. Kanage i sanap i go na pilim al silp. Em nau bol painim rot bilong wokim pani na ol manmeri bal lap. Em nau Kanage kirap na tok olsem: Yupela! Lain bilong mi ya i longpela stret ya. Na i gat wanpela meri tasol. Tasol dispela em i liklik samting. Mi gat warl long meri ya. I luk olsem mipela olgeta man tasol i lainap long beksait bilong em ya. Dispela em mak nogut ya. Meri ya harim Kanage i tok olsem na em i tanim na tokim Kanage: Sapos yu ting olsem lain i longpela na yu no inap go insait, plis yu na sindaun na malolo. Taim lain i go sotpela orait yu ken kam na go insait tasol. Wanpela meri long arapela lain i harim olsem na tokim Kanage: Baras, dispela em tok parabell bilong tumbuna Yosua na Yosep. Yu yet skelim na pilim. Yosua Yosep

MENDI

■ Kanage stap long Lae na laik go bek long Madang. Em kalap long PMV bas bilong ol Kander (Buang), na kamap long Madang long 2 klok apinun.

Long Madang, em kisim narapela bas na laik go long ples Gamoi long Nobsco. Long hap rot ol i stap long Sagalau maket long baim buai.

Long Sagalau maket, Kanage tok pilai long ol mama na ol meri NOBSCO long tokples. Em i tok: Bar Lar Medec. Long tok pisin, dispela hap tokples i min Hei ol wantok.

Em nau ol mama na yangpela meri kirap na tok: Man man ya save long tokples bilong mipela ya.

Ol mama lap nogut tru na kaikai buai sanap i stap. Kanage tok gen: Ol wantok tokples i no hat, isi long kisim. Em nau ol mama long Nobsco kirap tok gen: Em save gut long tokples ya. Kanage lap nogut tru na tok: A ah, Keks Nagur. Paulus Tali

MADANG

□ Kanage kisim wanpela hala ka na go kisim prenmeri bilong em long Grin Haus hostel bilong ol meri long Mosbi. Bihain tupela givim sisti i go raun long Magi haiwe.

Kanage i no sekim gut flul bilong em. Em lukim mita i stap long E na ting olsem em i gat 'enough' flul. Em ritim F na ting olsem 'finish'. Samting tru em E i min emti, na F i min ful.

Taim tupela pinisim ol kolta long Magi haiwe na laik kam bek, flul i pinis na tupela i stap long rot.

Laki ol pilisman i kamap na helpim tupela. Na Kanage tokim ol long stori bilong em. Man ol kilim skin stret long lap. Joe Meko

MOSBI

Wes Irian atis strong long mani bilong penting

WANPELA atis long Lae i save stap wantaim ol penting bilong em.

Nem bilong dispela man em John Nussy. Em i gat 30 krismas. Na i bilong Wes Irian.

Nussy stat long yusim pen long penim ol piksa bihain long em i ranawe long Irian Jaya long 1978. Dispela em long taim pait i kamap bikpela namel long fridom paitman bilong Irian Jaya, wantaim ol soldia bilong Indonesia.

Em i stat wok long Mosbi long 1983 we em i save salim ol penting bilong em long ol rot insait long siti.

Ol namba wan penting bilong John i soim ol fridom paitman bilong Irian Jaya. Dispela penting i pulim stret ai bilong planti manmeri olsem ol turis insait long siti.

Planti manmeri i baim ol dispela penting na putim long haus bilong ol o karim i go wantaim ol.

"Planti manmeri i baim ol penting bilong mi, na sampela i kam askim long moa," em i tok. Liklik bisnis wok bilong John i groa gut na givim sampela wansiling long stap laip. Na dispela i gutpela tru long em.



John soim tupela penting bilong em.

Taim yu kisim ol kainkain pen...
olsem tit i pen ...baksait i pen...
het i pen...sik mun pen...
o wanem kain sik...!

Olgeta taim igat Disprin long halivim yu!



Em isi, yu ken kisim Disprin na tanim wantaim wara!

Igat narapela yu ken kaikaim... teis olsem muli!

Na igat ol kapsol yu ken daunim wantaim wara!

TINGIM... OL KAINKAIN PEN...
IGAT DISPRIN OLSEM WE YU LAIKIM...

Kisim
DISPRIN...
kilim pen!


MUSIK NA TELEWISEN

PAPUA NIUGINI



Top musikman bilong Ingran laikim PNG tumbuna musik

I KAM LONG Ela Motors OL WIL BILONG NESEN



GENESIS

• Peter Gabriel (lephan) wantaim Phil Collins (namel) na wanpela ben memba bilong ol.

JAMES KILA i raitim

PLANTI yangpela man-meri PNG long 1980 i save harim musik bilong dispela top rok ben bilong Ingran ol i kolim Genesis.

Dispela ben i gat nem long wol. Ol i bin salim planti milien kaset,

bilong ol na tu planti ol man long kantri long Yurop, Amerika, Australia na Jemani i save laikim musik bilong ol.

Tupela top singa bilong ol lain ya em Phil Collins na Peter Gabriel. Tupela i gat nem long wol long stall musik bilong bihain long ben i bruk na ol i

stat rekotim solo album bilong ol yet.

Long las yia long mun Septemba, Peter Gabriel i bin kam raun long PNG. Em i kam long wanpela liklik praivet balus bilong em. Balus ya i bin go long Rabaul pastaim, we Gabriel i bin go raun lukim o tumbuna

sing-sing bilong ol Baining. Ol lain ya i save danis antap long paia. Gabriel i stap long Rabaul 3-pela de bipo long maunten i pairap.

Bihain Gabriel i kalap long wanpela bot o yot na i go long Nu Ailan, Manus na Madang. I go moa long pes 20


AMERICAN TOP FORTY

AS AT 24/12/94

CUR.	TITLE	ACT NAME
1.	<i>I Swear</i>	All-4-One
2.	<i>Don't Turn Around</i>	Ace Of Base
3.	<i>I'll Remember</i>	Madonna
4.	<i>You Mean The World To Me</i>	Braxton
5.	<i>Stay (I Missed You)</i>	Lisa Loeb
6.	<i>Mr Jones</i>	Counting Crowe
7.	<i>If You Go</i>	Jon Secada
8.	<i>Baby I Love Your Way</i>	Big Mountain
9.	<i>Any Time, Any Place</i>	Janet Jackson
10.	<i>Anytime You Need A Friend</i>	Mariah Carey
11.	<i>Return To Innocence</i>	Enigma
12.	<i>The Most Beautiful Girl</i>	Prince
13.	<i>I'll Take You There</i>	General Public
14.	<i>The Sign</i>	Ace Of Base
15.	<i>Moving On Up</i>	M People
16.	<i>Misied</i>	Celine Dion
17.	<i>Shine</i>	Collective Soul
18.	<i>Wild Night</i>	Mellencamp
19.	<i>Crazy</i>	Aerosmith
20.	<i>Found Out About You</i>	Gin Blossoms
21.	<i>I'm Ready</i>	Campbell
22.	<i>Until I Fall Away</i>	Gin Blossoms
23.	<i>Can You Feel The Love Tonight</i>	Elton John
24.	<i>Always</i>	Erasure
25.	<i>Back And Forth</i>	Aslyyah
26.	<i>Come To My Window</i>	Melissa Etheridge
27.	<i>Prayer For The Dying</i>	Seal
28.	<i>Beautiful In My Eyes</i>	Joshua Kadison
29.	<i>Whatta Man</i>	Salt-N-Pepa
30.	<i>Meat</i>	B.C. 52s
31.	<i>Objects In The Rear View</i>	Meat Loaf
32.	<i>Regular Thang</i>	Ovis
33.	<i>Mmm Mmm Mmm Mmm</i>	Crash Test Dummies
34.	<i>Losser</i>	Back
35.	<i>I Wich</i>	Gabrielle
36.	<i>Without You</i>	Mariah Carey
37.	<i>Centsloop</i>	Us3
38.	<i>Now And Forever</i>	Richard Marx
39.	<i>Ain't Got Nothing If You</i>	Richard Marx
40.	<i>Fall Down</i>	Toad The Wet

EMTV TELEWISEN

THURSDAY 12TH JANUARY, 1995			SUNDAY 8TH JANUARY, 1995		
1.17	STATION OPEN	4.00	WACKY RACES	4.00	BONANZA
1.20	2ND TEST CRICKET	4.30	HOT SCIENCE	5.00	BEYOND 2000
3.00	KIDS KONA	5.00	WONDER WORLD	5.27	EMTV TOK SAVE
3.30	HOT SCIENCE	5.27	EMTV TOK SAVE	6.00	NATIONAL EMTV NEWS
4.00	3RD TEST CRICKET	5.29	DAY BREAK NEWS	6.30	MOVIE
5.00	WONDER WORLD	5.29	EMTV NEWS BREAK	8.00	NCDC NEWS
5.27	EMTV TOK SAVE	5.30	HOME AND AWAY	8.24	EMTV TOK SAVE
5.29	EMTV NEWS BREAK	6.00	NATIONAL EMTV NEWS	8.30	TBA
5.30	HOME AND AWAY (G)	6.30	A CURRENT AFFAIRS	9.30	WOPA WORLD CHAMP
6.00	NATIONAL EMTV NEWS	7.00	POT OF GOLD	10.30	HAWAII 5-0
6.30	A CURRENT AFFAIR (G)	7.28	LOTTO DRAW	11.30	NATIONAL EMTV NEWS REPLAY
7.00	LOTTO DRAW	7.30	NEIGHBOURS	11.57	MEDIATION WITH PASTOR WALO ARNI
7.02	POT OF GOLD	8.00	MAZDA JACK	12.00	STATION CLOSE
7.30	NEIGHBOURS	8.57	EMTV TOK SAVE	12.00	SUNDAY 8TH JANUARY, 1995
8.00	FIZZ (G)	9.00	FRIDAY NIGHT MOVIE "Late For Dinner"	8.37	STATION OPEN
9.00	WORLD SERIES CRICKET	10.45	COUNTRY PRACTICE	8.40	CHIT CHAT WITH SIR PAULIAS MATANE
11.00	SMALL BUSINESS SHOW	11.15	NATIONAL EMTV NEWS REPLAY	8.50	CRICKET
11.30	NATIONAL EM-TV NEWS REPLAY	11.45	MEDITATION WITH PASTOR WALO ARNI	12.30	TBA
12.00	CRICKET HIGHLIGHTS	11.47	STATION CLOSE	1.00	CRICKET
12.27	MEDITATION WITH PASTOR WALO ARNI	11.10	SATURDAY 14TH JANUARY, 1995	5.00	BONANZA
12.30	STATION CLOSE	11.07	STATION OPEN	6.00	NATIONAL EMTV NEWS
FRIDAY 13TH JANUARY, 1995		11.10	JOURNEY TO THE WEST	6.30	WONDERFUL WORLD OF DISNEY
2.50	STATION OPEN	12.00	SURF LEAGUE TITLES	7.30	RAY MARTIN PRESENTS OLIVIA NEWTON JOHN
2.52	EMTV TOKSAVE	12.30	NORTH QUEENSLAND REAL ESTATE	8.30	SING WITH JOY
3.00	KIDS KONA	3.30	GILLETTE		



9.00	MOVIE
10.45	CHIT CHAT WITH SIR PAULIAS MATANE
10.48	EMTV TOK SAVE
10.50	NATIONAL EMTV NEWS REPLAY
11.10	MUSIC & SPOKEN WORD
11.47	MEDITATION WITH PASTOR WALO ARNI
11.50	STATION CLOSE

G - General Exhibition
PGR - Parental Guidance Required
M - Mature Audience

PNG TOP TWENTY

AS AT 07/01/95

NO.	SONG	ARTIST
1 (1)	<i>Rabaul Town</i>	Barike
3 (2)	<i>Tariga Iau</i>	Painim Wok
7 (3)	<i>Island Bougainville</i>	Crew 5
4 (4)	<i>My Bougainville</i>	Dabsy Yapuc
9 (5)	<i>Kantri Blong Yumi</i>	Reks Band
2 (6)	<i>Ebong & Ivory</i>	Wong/Bowman
5 (7)	<i>Sepik Meri</i>	Basil Greg
11 (8)	<i>Lus Lain</i>	Greg/Telek
6 (9)	<i>My Love</i>	Leonard Kania
8 (10)	<i>Manus Island</i>	Keni Lucas
16 (11)	<i>Missing You</i>	Crew 5
12 (12)	<i>Tapalan Ti Mosbi</i>	Keni Lucas
13 (13)	<i>Kolwin</i>	Leonard Kania
10 (14)	<i>Everything I Owe</i>	Keni Lucas
15 (15)	<i>Santu Teresia</i>	P. Pomahun
0 (6)	<i>Rabaul Taun</i>	Basil Greg
0 (17)	<i>Spirit Of Love</i>	Cotton 22
0 (17)	<i>Dust Over Rabaul</i>	Wong/Bowman
18 (18)	<i>Kure Maina A Koe</i>	Greg/Telek
19 (19)	<i>Sare Sare</i>	Jerediah
20 (20)	<i>Luluk Raon</i>	L. Kania

• Ratings based on requests on Radio Kalang and not cassette sales.

ELA MOTORS - OL WIL BILONG NESEN

Koki pisin bilong bus na nambis kamap olsem wanem



BIPO tru long wanpela ples insait long Morobe provins, i gat tupela brata i stap. Tupela i save kilim planti abus na kaikai.

Wanpela taim tupela i tingting long go painim abus. Olsem na tupela i kisim ol sap ston na sampela mau mango na wokabaut i go long bus.

Tupela kamap long wanpela hap bikbus we i gat planti lek mak bilong ol wel pik. Nau tupela i putim ol sap ston ya i go insait long mango na putim long rot bilong pik.

Tupela brata i go sindaun antap long wanpela bikpela diwai na lukluk i stap. Na i no longtaim wanpela bikpela pik i kamap na wok long kaikai mango ya.

Pik i mekimsave long kaikai mango i go na ol sap ston insait long mango i katim nek bilong em, na pik ya i pundaun na dai. Tupela brata ya i go daun long diwai na katim pik na redi long kukim.

Tasol i nogat paia bilong kukim pik. Olsem na tupela i go antap gen long diwai na lukluk i go nabaut long ol smok bilong paia. I no longtaim na tupela i lukim wanpela bikpela smok bilong paia i kamap long wanpela sait bilong maunten. Olsem na tupela i stat long wokabaut i go



long hap.

Tupela i kamap long dispela hap paia i stap na bungim wanpela meri wantaim pikinini meri bilong em i wok long gaden i stap. Dispela i no meri nating. Em masalai meri stret.

Tupela go tokim meri ya olsem tupela i laikim paia long kukim pik. Olsem na meri ya i tokim ol long karim liklik meri ya na em bai holim paia na olgeta wantaim bai go long dispela hap pik i stap.

Tupela brata i orait na ol wokabaut i go kamap long ples pik i dai i stap long en. Na tupela brata go het na mekimsave long katim

pik ya. Tupela i katim pik pinis na givim bel bilong pik i go long meri ya long go wasim long wara.

Meri ya i go long wara na i no kam bek hariap. Olsem na bikpela brata i salim liklik brata long i go long wara na sekim meri ya. Taim liklik brata go kamap klostu long wara, em i lukstil na lukim olsem meri ya i wok long stretim bel bilong pik na kaikai i stap. Olsem na em kwiktait ron i go bek na tokim bikpela brata bilong em long wanem samting em lukim.

Tupela brata i kirap kukim pik bilong tupela na kisim i go antap

long diwai. Tupela kilim tu pikinini meri bilong masalai na kukim long mambu na redim i stap.

Taim masalai meri ya i kam bek, em lukim tupela brata ya i stap antap long diwai na em askim tupela long sampela pik bilong kaikai. Olsem na tupela givim em mit bilong pikinini meri bilong em, na em mekimsave long kaikai i stap.

Meri ya kaikai pinis na em askim long pikinini meri bilong em. Na tupela brata i tokim em olsem em yet i kaikai pinis pikinini bilong em. Meri ya i kra i nogut tru

na ron go tokim planti arapela masalai moa i kam long kilim tupela brata ya.

Ol masalai i kam bung aninit long as bilong diwai ya na stat long go antap. Wanpela strongpela masalai man i sanap long as bilong diwai na ol arapela i wok long sanap antap long em i go antap. Ol i wokim lata long ol yet na go antap long kilim tupela, brata ya.

I no longtaim wanpela blakpela anis i kamaut long diwai ya na kaikai bol bilong dispela strongpela masalai man husat i sanap long as bilong diwai na strongim ol arapela i go antap.

Taim masalai ya i laik sruk liklik, olgeta masalai antap i kapsait i go daun long graun na kisim taim nabaut. Ol i go het gen na mekim lata long ol yet na i go antap. Tasol dispela anis ya i wok long kaikai man aninit long as bilong diwai na ol i wok long pundaun yet.

Tupela brata i sindaun antap long diwai i go na kisim gras bilong pisin na pasim long hann bilong tupela. Tupela i kirap tanim kamap olsem koki na flai i go.

Narapela i flai i go long bus na narapela i flai i go long nambis. Olsem na nau bai yu ken lukim tupela kain koki we wanpela i save stap long bus na narapela long nambis. Na tu ol koki i save pilai na stap klostu wantaim ol man. Bikos koki i bin kamap long ol man.

Anna Kelong
MOROBE PROVINS



□ Kanage lukim muvi long EM TV i go na lukim wanpela stesu meri (glaman meri). Dispela stesu i gat wanpela samting olsem sen i stap long nek bilong em. Sapos yu rausim dispela sen, stesu ya bai kamap olsem meri tru. Kanage sindaun isi tru na lukim dispela muvi go na kirap tok isi tasol olsem: Sore o, sapos mi gat wanpela kain samting olsem, mi bai haitim dispela samting long rum. Taim mi laik kisim gutpela amamas, bai mi rausim tasol sen ya long nek. Na mitupela bai mi pilai olsem wanpela liklik manki pilai antaim mama bilong em. Taim mitupela i pinis long pilai, bai mi putim sen i go bek long nek bilong stesu na haitim gen. Ol poroman na brata bilong Kanage harim em i tok olsem na olgeta i opim ai na lukluk long em.

Jimmie Belbook
Hoks, MOSBI

■ Long Hohola No.1 long Mosbi gat wanpela hostel bilong ol meri. Olgeta taim Kanage i save draiv i go olsem long dispela hostel, em i save singaut olsem: Olsem wanem! Bai mi slip wantaim kol gen long nait. Olgeta taim Kanage i save draiv i go olsem long dispela hostel, em i save tromoi dispela hap tok. Mekim i go na ol meri long dispela hostel i les olgeta long harim. Wanpela Sarere nait Kanage draiv i go na singaut: Olsem wanem! Bai wankain yet o i gat liklik senis i kamap? Ol meri long hostel kirap na tokim em: Yu go na slip wantaim kol na indai olsem wanpela lapun sik dok. Kanage stopim ka na tokim ol: Em orait. Gutpela tok pisin bilong yupela. Sapos em i dai, bai yupela kam na holim em na mekim ol toktok i gat wari na sore.

□ Kanage em i wanpela bikpela sals pilsman. Wanpela taim em i go stopim pait bilong sampela manki long Godens pils bareks. Tasol wanpela yangpela masolman i kam ausait na singaut long pait wantaim Kanage.

Sampela manmeri long sailtain i lukim na stat long mekim pani long man ya. Ol i tokim em olsem: Maski yu westim taim bilong yu ya. Go pinisim gut bia bilong yu na go slip. Yu lukim Kanage olsem wanem. Han bilong em i bikpela tumas long pes bilong yu ya. Yu laikim bai han bilong em i karamapim pes bilong yu. Boi ya mekim i go nogat na askim Kanage long salim liklik brata bilong em i kam ausait na em bai traime bun wantaim em. Liklik bilong Kanage harim olsem na isi tasol wokabaut i go ausait wilwilim boi ya.

William Somen
Godens, MOSBI

Boi laik maritim meri bilong narapela sios



Dia LAIPLAIN,
Mi bai marit long neks yia. Tasol mi wari bikos papamama bilong mi no inap oraitim marit bilong mi. Bikos meri ya i save lotu long Sande na mi wantaim papamama bilong mi save lotu long SDA long olgeta Sarere.

Mi askim meri long kam lotu wantaim mi long SDA. Tasol em i no laik senis.
TOGETHER

Dia PREN,
Wari bilong yu em planti yangpela marit i save bungim long laip bilong ol long sait bilong lotu wantaim. Mipela i save tokim ol

long tingting gut. Na tupela yet i mas kamapim wanpela tingting.

Long kamapim gutpela marit, man na meri i mas kamapim

wanpela tingting long lotu wantaim. Dispela em sapos tupela i no save lotu wantaim taim tupela i no bin marit yet. Sapos man na meri i no wanbel long wanem lotu bilong go long en, dispela inap kamapim hevi long ol pikinini. Sampela pikinini bai go wantaim papa bilong ol. Na sampela bai go wantaim mama bilong ol.

Sampela taim ol pikinini bai paul long husat bai ol i go wantaim long lotu. Em nau bai ol i les na stap long haus. Long stretim dispela hevi na helpim ol pikinini, tupela manmeri yet i mas

kamapim ansa we i ken helpim ol pikinini i kamap kristen.

Ol marit husat i bilong wanpela lotu, i save gat planti gutpela samting i kamap long ol. Man na meri i save pas wantaim long wok bilong lotu, karim hevi bilong sios wantaim, helpim narapela long bilip na kristen pasin bilong tupela na dispela i helpim tru ol pikinini bilong tupela long kamap gutpela kristen pikinini.

Sapos papa na mama i bruk long lotu, bai olgeta dispela samting i no inap long kamap.

Long luksave bilong mipela, marit namel


long tupela yangpela husat i no bilong wanpela lotu i no save kamap gut. Tupela i no save amamas na sampela taim marit i save bruk.

Dispela em hevi we inap kamap sapos man na meri yet i no save stretim ol hevi pastaim long tupela i sindaun wantaim.

Mipela i askim yu long sindaun gut wantaim prenmeri bilong yu, na tu papamama bilong yu. Na yupela i mas toktok gut long dispela hevi nau yu wok long tingim i stap bipo long yu kamapim tingting bilong maritim meri ya.
LAIPLAIN

Salim ol hevi na wari bilong yu i kam long LAIPLAIN, P.O. Box 6047, Boroko. Yu ken ringim mipela tu long telipon namba 26 0011. Mipela i no inap autim trupela nem long hia.

ANSA BILONG SKRUIIM TOK





Nem: Emmanuela A. Afiakwah
 Krismas: 24 yia (man)
 Edres: P. O. Box A-13, Adisadel Estate, Cape Coast, Ghana.
 Save Laikim: Futbol, musik, senisim poto na raun olsem wanpela turis.

Nem: George Asomaning
 Krismas: 25 yia (meri)
 Edres: P. O. Box A-13, Adisadel Estate, Cape Coast, Ghana, West Africa.
 Save Laikim: Musik, waswas, senisim ol piksa, na raun olsem wanpela turis.

Nem: Francis Muli
 Krismas: 22 yia (man)
 Edres: P. O. Box 2183, Gusap Section Tunga, Lae, Morobe Province.
 Save Laikim: Pilai ragbi, raitim pas, lotu, gaden, harim na ritim tumbuna storl.

Nem: Dickson John
 Krismas: 19 yia (man)
 Edres: Ralume Block, P. O. Box 299, Kimbe, West New Britain Province.
 Save Laikim: TV, soka, harim musik, laikim ol penpren long ol arapela hap long PNG.

Nem: Nason Paul
 Krismas: 19 yia (man)
 Edres: P. O. Box 299, Ralume Block, Kimbe, West New Britain Province.
 Save Laikim: Raitim pas, pilai soka, lukim vidio na harim ol pop musik.

Nem: Oberth Nekea
 Krismas: 18 yia (man)
 Edres: Irrigation Section, Ramu Sugar Ltd, P. O. Box 2183, Gusap, Lae, Morobe Province.
 Save Laikim: Kristen penpren, ol gopela singsing, Baibel kem na pilai volibal.

Nem: Lawrence Umbun
 Krismas: 19 yia (man)
 Edres: Fonsen Logging, P. O. Box 16, Kandrian, West New Britain Province.
 Save Laikim: Tok pilai, harim musik na raitim pas long ol penpren.

Nem: Elajiah W Aemai
 Krismas: 15 yia (man)
 Edres: Reforestration Department, P. O. Box 487, Kimbe, West New Britain Province.
 Save Laikim: Pilai soka, harim Gospel musik na go long lotu.

Nem: John Asai
 Krismas: 17 yia (man)
 Edres: Reforestration Department, P. O. Box 487, Kimba, West New Britain Province.
 Save Laikim: Pilai soka na waswas long nambis.

Nem: Wilson Kamai
 Krismas: 16 yia (man)
 Edres: Reforestration Department, P. O. Box 487, Kimbe, West New Britain Province.
 Save Laikim: Pilai gita, harim gopela musik na ritim Baibel.

Sapos yu laik salim pen pren i go ovasis raitim leta long inglis

Ol refuji wokim sotgan nau

IAN KAKARERE i raitim

BIKPELA wari i kamap nau long ol plis long Kiunga bikos ol refuji bilong Wes Irian long kea senta i wokim ol bikpela strongpela sotgan pinis.

Not Flai Provinsel Plis Komanda; Sief Inspekta Peter Taiang i oraitim Wantok ripota long holim na lukluk long ol dispela sotgan.

Wanpela sotgan ya i gat longpela paip na blakpela pen we i luk olsem wanpela strongpela sotgan tru we i ken kamapim bikpela bagarap. I luk olsem man husat i wokim dispela sotgan i no gat gutpela tuls bilong yusim long wokim ol sotgan ya.

I gat ples bilong opim na yusim na taim em i no gat wok long mekim, ol i ken lokim na putim i go stap.

Wanpela sotgan i gat sotpela paip bilong em na ol lain husat i wokim sotgan ya i salim i go long wanpela asples man long Westen provins yet.

Sejen John Tura i tok ol plisman bilong em i bin sekim ol sotgan ya na painimaut olsem ol gan ya i strongpela wankain stret long ol gan masin i save wokim long faktori.

Em i tok ol i yusim ain bilong paip wara long het bilong gan ya olsem na dispela i ken bruk isi na kilim husat man i yusim.

Long Westen provins, i gat bikpela maket pinis bilong salim ol sotgan.

Ripot i tok sampela Wes Irian refusi long Is Awini kem na tu long arapela kea senta i wok long wokim ol dispela sotgan.

Wanpela plisman nem bilong em Dinam Kim bilong ples Karengo long Kiunga distrik i tok planti bikman long ples bilong em i baim pinis ol dispela sotgan long ol Wes Irian refusi.

Em tok taim em i bin go long ples sampela taim i go pinis.

Top musikman bilong Ingran laikim PNG tumbuna musik

i kam long pes 18

Em i yusim dispela yot olsem ples bilong slip na kaikai.

Balus bilong em i go kisim em gen long Madang na em i go antap long Goroka long lukim so.

Long Goroka So planti ol manmeri i no bin save olsem dispela top musik man i stap. Em i save olsem ol narapela waitman na lukim ol tumbuna sing-sing long so.

Raun bilong Gabriel long PNG em bikos em i laik harim na lukim ol kain tredisinol o tumbuna singsing na danis bilong yumi. Em i bin harim olsem PNG i gat narakain ol gutpela musik. Na tu yumi gat ol planti tokples na kalsa ol musik na danis bilong yumi long wanwan provin i narakain long olgeta.

Jeneral menesa bilong Pacific Gold Studio, Greg Seeto tasol, husat i bin luksave long em na tupela i toktok liklik long ol musik bilong PNG.


Mista Seeto i tok Gabriel i laikim tru ol kain stail tumbuna musik na danis bilong PNG. Em i tok olsem sapos PNG i ken putim gut ol tumbuna singsing bilong ol wantaim ol instramen bilong ol waitman ol i ken kamap strong olsem ol lain bilong Afrika na Jamaika.

Seeto i bin pilaiam sampela musik bilong Sanguma na Tambaran Kalsa grup. Na taim Gabriel i harim em i bin amamas tru na i tok olsem long 1995 o 1996, em bai kam bek long PNG long wok long kisim ol musik bilong yumi.

I gat ples bilong opim na yusim na taim em i no gat wok long mekim, ol i ken lotuim na putim i go stap.
 Wanpela sotgan i gat sotpela paip bilong em na ol lain husat i wokim sotgan ya i salim i go long wanpela asples man long Westen provins yet



• Ol plisman long Kiunga i sekim ol sotgan we ol Wes Irian long refusi kem i wok long wokim na salim long ol man.



em i kirap no gut long lukim ol ples i gat planti abus long ol haus.

Mista Kim i tok em askim ol lain kandre bilong em na ol i tok ol man bilong ples i baim ol sotgan ya na save haitim long maunten. Taim ol i laik go long bus, ol i save go kisim na go painim abus.

Kiunga plis i wari tu bikos planti bilong ol dispela sotgan i go aut pinis long ol arapela provins we ol man i kam na baim.



• Peter Gabriel long raitan sanap toktok wantaim Jeneral menesa bilong Pacific Gold Studios, Greg Seeto i storl long Septemba 1994 Goroka So.

BISNIS LONG PAPUA NIUGINI

Soten em nupela dairekta bilong Konstitusinal Rivyu Komisn


PAULUS TALI i raitim

GAVMAN i makim pinis Jonathan Soten long kamap dairekta bilong Konstitusinal Rivyu Komisn (CRC) long wok bilong glasim gen provinsel gavman sistem insait long Papua Niugini.

Jonathan Soten bilong ples Tarawe long Siassi, Morobe provins i bin kamap dairekta bilong CRC bihain long olupela dairekta, Dokta Warilamo i lusim na go kisim wok olsem dairekta bilong Nesenel Rises Institut

(NRI). Mista Soten i bin stap olsem Ekting Dairekta inap Praim Minista, Sir Julius Chan na deputi bilong em, Chris Haiveta na CRC siaman, Ben Micah i makim em long kamap dairekta long 12 Novemba long las yia. Mista Soten i bin tokim Wantok long las yia olsem dispela i wanpela hatpela wok tru. Tasol ol wokman na memba i mekim bikipela wok tru long kamapim dispela wok bilong glasim gen ol eria na han rot bilong

provinsel gavman sistem. Em i tok dispela olgeta wok em i bilong kamapim gutpela gavman na gutpela kantri we ol pipel i ken amamas. Em i laikim bai yia 1995 i mas kamap gutpela yia bilong gavman long wok bung wantaim. Jonathan Soten i holim Masta Digri long Akauting na Fainensel Edministresen long Sheffield Yunivesiti long Ingran. Em i bin statim wok bilong em stret wantaim CRC taim gavman i statim. Jonathan i marit na i gat 6-pela pikinini.



Goroka taun gat bas sevis nau - Bipo biktaun bilong Isten Hallans provins, Goroka i nogat bas sevis. Tasol nau i gat. Mekim na ol pipel i ken stap long wanpela kona na go long narapela kona. Foto: Sape Metta

NCDC baset lukluk long moa developmen projek


DANIEL MONA i raitim

NESENEL Kapital Distrik Komisn (NCDC) i brukim pinis K57.5 milien baset bilong em long las wik. Baset ya bai lukluk long givim moa sapot long ol developmen projek we bai i kos olsem K17.785 milien. Arapela eria bai baset ya i lukluk long ol em; Edministresen K15.117 milien, Operesen kos K11.291 milien, Lon na ol dinau samting K5.744 milien, ol bisnis asets K3.228 milien na Motu Koita Kaunsil K1.5 milien. Rekot i soim olsem baset bilong NCDC long dispela yia i go antap abrusim K47.349 milien bilong las yia. Ol rot bilong pulim mani long dispela yia bai i go antap liklik olsem long

takis. Sels na sevis takis bai i go antap long 3 pesen long dispela yia long pulim mani bilong bekim bek ol mani i go aut. Ol takis bilong NCDC i bin pulim K25 milien long dispela yia we i abrusim tu mak bilong las yia long K18 milien. Takis i bin bikipela eria we NCDC i pulim moa mani long en na namba tu em long ol bil bilong wara insait long siti. Wara i pulim olsem K13 milien long dispela yia. Bungim olgeta eria we mani i kam long en em; takis bilong graun, pipia, wara, sels na sevis takis, laisens fi na ol arapela liklik takis i bungim na kamapim olsem K50.7 milien. Nesenel gavman gren em K6.7 milien we em i

save givim oltaim long NCDC. Sels Takis i go antap ong 3 pesen we i min olsem ol liklik takis olsem long pipia bai i abrusim K20 mak na i go antap long K23 mak we ol manmeri bai baim long dispela yia. Olgeta haus husat i save yusim wara bai baim K7.50 na ol bisnis na kampani eria bai baim K50 long wara. Ol manmeri husat i save go maket bai baim geit long K1. na i no 60 toea olsem bipo, rejistaim dok bai fi bilong em i K10, planim bodi bilong daiman long 9 Mail matmat bai kos K100 long ol pikinini na K150 long ol bikipela manmeri. Ol arapela samting tu we prais i go antap long dispela yia em 'ong Taurama Leisa Senta we ol manmeri i save go waswas long

swimpul, ples bilong go eksesais we ol manmeri i save haia long K60. Nau aia em K100. Ol haus sik long Mosbi long dispela yia bai kisim helpim long NCDC. NCDC bai baim ol samting we i sot long ol haus sik na tu baim ootnait bilong ol wokman. Japan gavman i bin givim K15 milien pinis long NCDC na ol bai i go het long stretim wara saplai sistem long Mosbi siti. Dispela projek bai stat long mun Mas. NCDC i gat arapela plen bilong kamapim long dispela yia. Ol plen ya em; wokim hap bilong stapim ka long beksait bilong haus palamen long Waigani, stretim rot long Mosbi Dauntaun, Boroko, Waigani, opim Botanikel Gaden i go bikipela liklik.




Ol OTML trak bai yusim ret na grinpela flag long ol haiwe rot

IAN KAKARERE i raitim

OL bikipela haiwe ka long Ok Tedi Maining Limited (OTML) bai tromoi hap laplap long soim sain long arapela ka olsem bikipela haiwe i kam. Dispela em wanpela nupela sistem ol bikipela haiwe ka long maining eria olsem Ok Tedi bai yusim long rot insait long Tabubil na Kiunga. Dispela sistem ya i kamap i kamap long stapim planti ol birua we inap kamap long haiwe taim ol bikipela haiwe ka bilong maining i ron. Bikos sampela taim ol haiwe i save karim ol kago olsem bensin na ol wel bilong masin na tu arapela saplai bilong maining. Bai i gat tupela liklik ka i ron


wantaim ol bikipela haiwe ka husat i karim ol kago na ron long rot. Wanpela bai ron long fran na narapela long beksait. Ka husat bai ron long beksait na holim grinpela laplap na ka husat bai ron long fran bai holim retpela laplap. Dispela sain i soim olsem sapos wanem ka i kam long fran na i lukim dispela ka wantaim retpela laplap, em i mas harim stapim ka long arere bilong haiwe rot na wetim ol bikipela maining ka ya i go pastaim. Ripot i kam long Ok Tedi Maining Limited Trensport Supavaisa, Glen Pratt i tok dispela sistem em bilong daunim ol birua bilong rot namel long ol ka na bikipela haiwe ka bilong maining. Mista Pratt i tok bipo ol i save yusim namba long soim ol ka

husat i kam long amaspela bikipela haiwe ka i ron i kam. Tasol i gat hevi we i save gat bikipela das long rot na tu ol draiva i no save laikim long olgeta taim holim namba long rot. Olsem na ol i kamapim dispela tingting bilong soim laplap tasol long ka na arapela ka husat i ron i kam i ken lukim na save olsem haiwe ka i kam, Mista Pratt i tok. Long dispela taim yet, bai tupela sistem wantaim bai wok yet. Bai ol ka ya i soim namba na sampela taim bai ol i yusim laplap tasol long soim sain. Inap olgeta ka long haiwe bilong Tabubil na Kiunga i luksave long senis ya orait ol i ken stat long yusim tasol ret na grin laplap long soim sain.





• Ol lain ya i amamas long kisim nupela masin.



• Dispela pls I no ranawe. Yangpela Jason Yip soim bikpela pls em i hukim long soim olsem em i ken winim papa (lephan) bilong em long hukim ol bikpela pls tu.



• Masin ya i mekimsave long stretim rot klostu long Kangumu maket long Lae siti. Bikpela wok bilong stretim rot i bin stat long hap long sampela wik i go pinis.



• Ol lain Gollala long Naseret (Laloki) kisim ol pamkin bilong ol em wara Laloki asuat long Mosbi siti i bin tait na go antap na bagarapim. Dispela em ong las wik Sarere.



• Ol yangpela ya i sindaun malolo bihain long ol i bikpela hatwok stret. Luk olsem sampela bilong ol i mas hangre pinis. Ol i sindaun malolo na lukim ol arapela i mekimsave long pilal volibai long Lepwing Draiv, Godens, Mosbi long las wiken. Moa long 10-pela tim bai soim stall gen long dispela wiken.



• Ol boksa husat i makim Buka long nesanel boksing sempionsip. Ol selekta i makim ol bihain long ol i holim sempionsip bilong ol yet long Buka. Buka i save salim sampela strongpela boksa long ol nesanel resis o palt.

Maket bilong olgeta lain Redi nau long kam bek bilong Jisas Kraiss

Dia Edita, Mi laik egensim pas bilong ol lain husat i save komplem long ol hailans i salim kaikai long maket bilong narapela provins.

Mi lukim ol pas ol Morobe i komplem long Lae maket we ol hailans i save salim kaikai bilong ol long en.

Mi laik tok olsem ol hailans i save groim ol gutpela kumu na kaikai bilong gaden we planti

hap bilong nambis i nogat long en. Olsem na dispela i givim sans long ol manmeri bilong taun long kaikai ol kainkain kaikai bilong gaden long nambis, na tu bilong ol hailans yet.

Mi ting maket em ples bilong olgeta manmeri bilong Papua Niugini long raun na baim kaikai. Olsem na olgeta manmeri bilong ples tu i ken salim kaikai bilong ol long en, bai ol

manmeri bilong taun i ken amamas long kain kain kaikai bilong gaden long baim.

Mi ting i no gutpela long komplem long maket. Bikos maket em bilong olgeta manmeri na i no bilong ol Morobe, Madang, Tolai o Papua tasol.

Em tasol bekim bilong mi.

**Neil Puanjamo
POPONDETA**

Noken tok pilai long ol kristen brata

Dia Edita, Mi laik bekim pas bilong wanpela brata husat i raitim long *Wantok* bilong Novemba, 1994, long ol manmeri i save lap long ol kristen grup husat i sanap long strit na autim gutnius bilong bikpela.

Mi ken tok stret olsem yupela i ken lap na tok pilai long ol kristen brata na susa husat i wok long autim gutnius long rot. Tasol ol i mekim dispela long

helpim yumi olgeta long senisim laip na pasin bilong yumi.

Planti bilong mipela i no save go long lotu long harim tok bilong God long Sande. Olsem na kain lotu olsem we i kamap long rot em gutpela taim bilong yumi long harim tok bilong God.

Plis yu noken lap na tok pilai long ol. Bikos yu no mekim long ol tasol em yu lap na tok pilai long God papa long heven.

Dispela ol lain i mekim wok bilong bikpela. Na i no long laik bilong ol yet long grisim yu long joinim ol.

Ol i luksave long pasin nogut we ol i save mekim bipo na ol i ting i gutpela ol i mas serim dispela toktok wantaim ol arapela husat i holim yet wankain pasin ol i save mekim bipo.

Em tasol toktok bilong mi.

**Tom Kewa
GOROKA**

Nogat lida bilong Sauten Hailans

Dia Edita, Mi laik komplem long ol nesanel memba bilong mipela long Sauten Hailans provins.

Mipela i gat Philemon Embel, Dick Mune na Lapon Onge long nesanel palamen. Tasol ol dispela memba i no stap klostu long lukluk long hevi bilong mipela ol pipel bilong ples.

Sampela taim i go pinis mipela i harim nek bilong wanpela bilong ol dispela tripela memba long Maus bilong Redio Muruk long dispela pait mipela wantaim ol lain birua bilong mipela.

Mi laik tok stret olsem dispela memba husat i opim maus bilong em long redio i westim tru taim bilong em.

Sapos mipela i gat lida, ating lida

inap kamap long namba wan taim pait i bin liklik yet na ken stapim.

Tasol ol i wok long hait i stap na pait i go bikpela pinis na laip bilong planti man i lus pinis long dispela pait. Olsem na mipela tu i stap wantaim belhat na redi tasol long pait bek. Bikos mipela i lusim laip bilong planti lain pinis.

Yu husat lida i hait long Waigani na bihain i laik kam na opim maus, em yu westim taim bilong yu pinis.

Mipela i no inap long harim toktok bilong yu husat memba. Bikos mipela i save olsem mipela i nogat lida o man i bosim mipela.

Em tasol komplem bilong mi.

**Eric Yongo
MENDI**

Noken ai op long gris bilong ol kendidet long 1997 ileksen

Dia Edita, Mi laik tok klia long ol manmeri bilong Isten Hailans provins olsem mipela i gat wanpela kris-mas tasol i stap long nesanel ileksen i kamap long 1997.

Olsem na ol manmeri i noken kirap nogut long harim ol kainkain toktok giaman o kempen sampela kendidet i laik mekim nau.

Sampela kendidet husat i tingting pinis long sanap long 1997 nesanel ileksen i stat pinis long baim ol manmeri long mani, kaikai na ol samting long grisim ol manmeri.

Plis yupela ol manmeri i mas ai op na lukluk long dispela samting. Bikos mipela i laikim gutpela lida i mas kamap na makim Isten Hailans provins long nesanel palamen.

Ol lida mipela i gat nau em; John Giheno, Aita Ivarato, Mathias Ijape, Casten Maibawa, Mathias Karani, Sowa Gunia na Kevin Masive. Ol dispela lida i gutpela lida bikos ol i save helpim mipela long planti samting insait long ples.

Tasol i gat sampela samting we i no stret yet na planti man bai kisim tingting yet long wok bilong ol na bai traime long sanap egensim ol.

Mi laik askim rijenel memba bilong Goroka olsem Goroka em taun bilong olgeta manmeri bilong Papua Niugini. Olsem na memba i mas lukluk gut na stretim gut dispela taun.

No ken larim ol bikpela ovasis kampani tu i kam pulap long Goroka bikos i mas gat spes tu bilong ol asples yet long wokim

bisnis.

I gat planti samting i stap yet long mekim kamap long Goroka na sapos memba i no lukluk gut, bai sampela nupela kendidet i kamap na i laik resis wantaim memba na winim em long mekim kamap ol samting we i no stret yet.

Olgeta manmeri i mas lukluk gut long husat lida na votim bikos politik em wanpela samting we yu ken pundaun long en bikos long ol gutpela gris na switpela promis bai yu harim long kendidet.

Em tasol toksave bilong mi i go pas long ol pipel bilong Isten Hailans provins.

**Hankey Lutle
GOROKA**

Dia Edita, Mi laik sapotim pas bilong brata Ben Kenori em i bin kamap na toktok long ol bikhet pasin we i wok long kamap insait long kantri.

Yes brata, mi sapotim pas bilong yu. Bikos gavman em mipela ol pipel yet i makim. Na bikpela God papa i givim ol dispela lida long mipela long go pas olsem stia bilong mipela long kamapim gutpela sindaun long ples graun.

Ol lida i save kamapim ol ol bilong banisim mipela i stap insait gut. Tasol mipela ol manmeri yet i no save respektim dispela lo. Ol dispela lo em bilong mipela tasol.

Boi Mengar painim papa bilong em

Dia Edita, Mi wanpela yangpela boi na mi stap long Wewak. Mi no save long papa tru bilong mi. Tasol ol pren bilong mi save stori olsem papa tru bilong mi i stap tasol no gat man i save long wanem hap provins bilong Papua Niugini em i stap long en.

Planti manmeri i tok nem bilong papa bilong mi em Emille Brikil.

Mi no save long pes bilong em. Na tu em i no save long pes bilong mi. Olsem na dispela sait i hat tru long mi bungim em yet.

Jack Uria, Mengar Village, PO Box 77, Wewak, E.S.P

**Jack Uria
WEWAK**

Mipela i no pret olsem God i givim tingting long man long kamapim lo bilong lukautim man i stap gut.

Olsem na taim mipela i brukim lo, mipela i sakim tok bilong God. Bikos God yet i givim mipela ol dispela lo long lukautim mipela gut.

Nau kainkain bikhet pasin i wok long kamap na ol yangpela man i kamapim bikpela bikhet pasin moa long stil na kilim man. Ol pipel i pait long pasin jeles na dring spak.

Olsem na long dispela, mipela i mas kisim tingting nau olsem taim bilong bikpela Jisas Kraiss i klostu long kam bek.

Bikos tok i stap pinis long

Baibel olsem taim bilong bikpela long kam bek, bai kainkain bikhet pasin i kamap long dispela graun. Ol brata bai kilim brata, papa bai kilim pikinini na planti moa.

Olsem na hap toktok mi laik mekim em, mipela olgeta i mas luksave long ol dispela samting nau i wok long kamap na stretim laip bilong mipela, na wetim bikpela long kam bek. Bikos taim bilong em i klostu nau.

Em tasol hap liklik toktok bilong mi na husat arapela i laik joinim moa i welkam tasol long rait long Wantok nuspepa.

**Timothy Barey
GOROKA**

Olgeta lida mas lusim ol pasin nogut

Dia Edita

Mi raitim dispela pas bilong mi kam long *Wantok* nuspepa long putim wanpela askim i go long olgeta politisen, lida na ol arapela bikman meri long kantri.

Askim bilong mi long dispela lain manmeri olsem: "Inap olgeta i ken putim tingting, save, han na wok-bung wantaim long dispela yia na ol arapela yia i kam inap mipela i bungim yia 2000?"

Mi putim dispela askim i go long ol bikos mipela i stap nau long nupela yia. Na mipela olgeta i mas senisim sampela pasin nogut bilong mipela. Na i gat nupela pasin we i gutpela na stretpela long ranim kantri bilong mipela.

Kantri bilong mipela i bungim planti hevi pinis, bikpela na liklik, long ol yia i go pinis. Kantri bungim hevi long wok politik, bisnis na ekonomik, sosel wok na tu ol arapela samting. Dispela ol hevi bagarapim na daunim tru gutnem bilong kantri.

Planti kantri long ovasis i save tok olsem Papua Niugini em i wanpela ris kantri insait long Saut Pasifik. Sampela taim mipela yet i save mekim dispela hap tok. Mipela i gat ol risoses we ol arapela kantri insait

long Saut Pasifik i nogat.

Tasol watpo na mipela i wok long bungim hevi? Hevi bilong nogat inap wok. Hevi bilong lo na oda. Hevi bilong gavman i sot long mani. Hevi bilong askim gavman long kompens-esen. Hevi bilong gavman i bringim ol sevis i go long rurel eria. Mipela i bungim kainkain hevi. I no dispela ol hevi tasol. Mipela i bungim tu ol arapela hevi.

Bihainim askim bilong mi long ol politisen, lida na ol arapela bikmanmeri, mi laik tok olsem sapos dispela lain i senisim gridi, toktok kros, korapsen, paulim o yusim krangni mani na tu ol arapela pasin nogut na ranim kantri long stretpela rot, kantri bai no inap bungim hevi. Bikos ol lida bilong kantri mekim gut wok bilong ol.

Mipela ol pipel i no save long wanem samting ol lida bilong mipela i wok long mekim. Mi no save ol i ranim kantri olsem wanem. Bikos ol i bosim na lukautim olgeta wok. Mipela i stap tasol long lukim olsem wok ol i karim aut i helpim mipela ol pipel na kantri bilong mipela.

**John Lapun
WEWAK**

Olgeta sios lotuim wanpela God tasol

Dia Edita,

Mi gat komplem long ol bikpela misin o sios husat i bin kam planim lotu pastaim long PNG. Na Luteran Sios em i wanpela long ol.

Mi no amamas long lukim olsem planti memba bilong sios ya i save egensim ol arapela nupela liklik sios we i wok long kam insait long kantri nau.

Dispela i no stret. Long wanem ol arapela sios olsem Baptis, AOG na ol CLC i no lotu bilong giamanim God. Nogat ya. Ol i lotu long wankain God we ol bikpela sios i lotu long em.

Olsem na mi no amamas taim mi lukim sampela memba bilong Luter-

an Sios i rausim wanpela man bilong Baptis Sios long taim em i autim tok bilong God. Dispela em long Yalu maket long 13 mail, Lae siti.

Sapos yumi ol lain bilong wanpela God tasol, orait, yumi noken mekim olsem.

Lukim long John 4: 19-21. Na tu long Pita 1: 7-9. Plis, yu husat i mekim dispela pasin lukim ol Baibel ves ya na bai yu kisim skul long wanem rot God i laikim yu long bihainim.

Sapos yu husat i egensim o sapotim mi i, emi orait. Mi witnesim Tok bilong God tasol.

**Motune Kei
LAE**

Mosa Komyuniti gavman bin mekim gutpela wok

Dia Edita,

Mi laik komplem long provinsal gavman bilong Wes Nu Briten provins. Bikos long 1990, ol i bin kamapim Mosa Komyuniti Gavman we mipela i bin stap na wok liklik taim tasol na gavman ya i pinis.

Memba bilong Mosa, Moses Nahia i go het na makim ol kainkain lain em i save long ol i go insait long dispela kaunsil grup. Olsem na planti gutpela lo mipela i kamapim i no moa wok. Na ples i go nogut olgeta long kainkain bikhet pasin.

Taim mipela i statim kaunsil ya, mipela i wokim lo olsem; no ken planim daiman arere long blok, noken wokim blak maket, noken pilaim vidio piksa long blok, na planti arapela lo we i lukautim na kamapim gutpela sindaun long Wes Nu Briten provins.

Nau olgeta dispela lo i no moa wok. Bikos mipela ol lain bilong Mosa Komyuniti Gavman i no moa wok.

**John Kawi
KIMBE**

Husat i laik salim pas i kam long edita i mas raitim stret nem na salim i kam long dispela adres: Pas i go long Edita, Wantok Nuspepa, P.O. Box 1982, Boroko - N.C.D.

Redio Sandaun mas op long 1995

Dia Edita,
Mi laik bai provinsal na nesanel gavman i lukluk na stretim hariap hevi long redio stesen bilong mipela long Sandaun.

Mipela ol grasrut pipel i bungim hevi bikos provinsal redio stesen bilong mipela i save pas long planti taim las yia. Na mipela i no save kisim gut nius long ol samting i kamap long kantri na ausait. Mipela i painim hat tu long salim ol toksave hariap i go long ol wantok long longwe hap taim ol bikipela samting i kamap.

Mipela i laikim bai long dispela yia,

1995, redio stesen ya i wok na ino stap pas olsem long las yia. Mekim na mipela i stap longlong tru olsem ol bus kanaka bilong bipo.

Long ol ples longwe long taun, redio em i bikipela samting tru long harim nius, toksave na ol arapela bikipela samting i kamap long kantri na ovasis. Olsem na mipela i askim strong gavman long stretim redio stesen bilong mipela long sandaun bikos dispela i helpim tru mipela o pipel bilong

Alois Elik VANIMO

Tok Save i go long ol man i save salim pas long Wantok. Sapos yu no putim nem tru bilong yu long pas mipela i no inap prinim leta bilong yu.

Kisowai painim wantok long Morata

Dia Edita,
Mi rait i kam long Wantok niuspepa long wanpela wantok poroman bilong mi i ken lukim na bungim mi.

Brata ya mi toktok long en em Gideon Kaupa. Em i bilong liklik ples Ugai long Goroka. Na nem bilong mi em Kisowai, brata bilong yu.

Nau mi harim olsem yu stap long Morata hia long Mosbi. Tasol mi no save sapos yu stap long Morata namba wan o tu.

Sapos wanpela wantok bilong Gideon i lukim pas bilong mi, toksave long em long kam painim mi long Boroko Brian Bell kampani. O sapos nogat, ringim mi long dispela telepon namba. 256091.

Long lukim yu.

Kisowai W.
P.O. Box 6510
BOROKO

Morobe EDF mani no go stret

Dia Edita,
Mi laik komplon long olgeta nesanel na provinsal memba bilong Morobe provins long rot we ol i wok long yusim lilektorel Developmen Fan (EDF) na provinsal alokesen bilong mani olgeta provins.

Mi lukim olsem ol memba i wok long givim aut mani long rot bilong skoarim poin o winim sapot bilong ol manmeri long go bek gen long palamen o provinsal asembli.

Planti i no givim mani wantaim tingting stret bilong helpim hevi o pipel long wanem samting ol i sot long en.

Sampela memba i givim mani i go long ples we ol i save olsem resis bilong em long ileksen bai hat. Long dispela as, em i mas putim mak bilong em long kolim bel bilong ol manmeri long winim ol long taim bilong ileksen.

Mi ken lukim planti bikipela projek we ol manmeri i mas i gat long kamapim gutpela sindaun long ples. Tasol i no gat sapot bilong gavman long putim mani i go insait na kirapim.

Taim provinsal gavman tu i save brukim baset bilong provins long olgeta yia, baset bilong ol i save karim astingting bilong skoarim poin tasol na i no wantaim bel tru bilong helpim ol manmeri bilong Morobe provins.

Primia bilong Morobe, Titi Christian i toktok pinis long kamapim nupela kain vot we ol manmeri yet bai votim primia. Dispela i givim planti tingting tru long ol memba. Bikos ol i tingim ol yet. Samting i tingting planti long dispela bikos ol i no inap long kam bek moa.

Long dispela as, baset bilong provins bai sut long mak na rot bilong winim vot. Dispela em politiks na i no pipel.


Mi ken tok stret olsem politiks long Morobe provins bai i no inap kamap gut long dispela taim yet inap planti yia i go pastaim inap sampela gutpela yangpela pikinini Morobe i kamap na kisim ples. Em nau bai yu ken lukim politiks bilong sevim pipel stret.

Bikos nau, sampela bilong ol dispela nesanel na provinsal lida i no gat gutpela skul bilong ol na tu i no save long as tru bilong wok politiks. Olsem na nau yet bai ol i tingting planti doti politiks olsem man i save tromoi huk long solwara na ol pis i save resis long kaikai.

Em tasol wari na lukluk bilong mi long wok politik insait long Morobe provins. Na husat arapela i laik givim moa tingting antap, yu welkam tasol.

Sony Sandre ENGA

Isi long kaikai buai



Dia Edita,
Mi laik toktok long prais bilong buai insait long Mosbi siti, na ol arapela bikipela senta olsem Lae, Goroka na Hagen. Prais bilong ol dispela buai i dia tru.

Mi lukim ol manmeri bilong kaikai buai i no save war. Ol save tromoi moa mani yet. Maski sapos prais bilong buai i go antap tru, olsem long ol bikipela holidi.

Mi laik tok tasol olsem em i laik bilong wanwan, manmeri long kaikai buai. Nogat samting i stapim yupela.

Tasol bikipela samting em yupela mas tingim helt o bodi bilong yupela.

William Sua IALIBU

Watpo na Waigani bai bosim skul sabsidi mani?

Dia Edita

Mi wanpela man long ples. Mi laik komplon long dispela tokorait bilong Chan/Haiveta gavman long kontrolim skul sabsidi mani long Waigani, Mosbi.

Mi pilim olsem dispela tokorait bilong gavman i no gutpela tumas. Long luksave bilong gavman, dispela disisen i ken gutpela. Tasol long luksave bilong mi yet na tu ol arapela papamama na manmeri long ples na provins, dispela disisen i no gutpela.

Dispela disisen bilong gavman i no gutpela. Bikos wankain olsem fri skul polisi bilong Paiais

Wingti, dispela disisen bai kamapim bikipela hevi long ol skul. Planti skul bai no inap kisim haria ol samting bilong ol. Dispela bai kamapim arapela hevi we ol sumatin bai no inap lainim gut samting long skul.

Pastaim long gavman i wokim dispela disisen, em i no laik go aut long wanpela provins. Na paitim toktok wantaim Provinsal Edukesen Bod bilong ol provins. Astingting em long kisim tingting bilong ol sapos ol i laikim o i no laikim dispela samting.

Olgeta yia, ol bikman na politisen i save stap tasol long Mosbi na wokim disisen. Ol i no

save go aut long ol provins na sekim samting o paitim toktok wantaim ol pipel o atoriti na kisim tingting bilong ol. Bihain long dispela em i ken skelim na glasim ol tingting ol i kisim na wokim disisen.

Nau long sait bilong skul sabsidi mani, tru tumas, planti skul bai bungim hevi. Planti tisa bai komplon. Planti tisa insait long ol rurel eria bai lusim mani long go aut na sekim ol samting ol i nidim na askim nesanel Edukesen dipatmen long baim na givim i go long ol.

Cletus Wandos WEWAK

Ol pasinda sip no sasim ol pikinini nating

Dia Edita,

Mi save lukim long Wantok niuspepa olgeta taim we ol manmeri i save rait na komplon long Luteran Siping long kisim mani long ol pikinini long ron antap long sip.

Mi luksave long komplon bilong yupela na mi sapotim. Tasol i gat planti as yumi mas skelim tu olsem long wanem as na olgeta manmeri husat i ron long sip i mas baim.

Bikipela samting antap long sip em welfea o gutpela ron bilong ol manmeri long sip namel long biksolvawa.

Dispela em wanpela samting yumi olgeta i save wari long en. Bikos nogut sip i bagarap long solwara, bihain bai yumi komplon na askim long kompensesen long papa bilong sip.

Long dispela as, olgeta manmeri husat i ron long sip olsem pasindia, ol i mas baim sip.

Narapela samting em, sip i mas wokim gutpela haus pasindia long ol manmeri i ken sindaun na slip gut long en taim ol i ron long solwara. Sip i mas

wokim tu gutpela toilet na bikipela ples bilong baim tiket.

Sip i mas klin na senisim ol betsip bilong karamap na slip. Kokoros na musmus na doti

i no save isi antap long ol bet bilong sip. Olsem na dispela em sampela, samting tu sip i mas gat mani long stretim.

Em sampela samting mi ken tingim long

tokaut long bekim ol komplon bilong planti manmeri husat i save ron long sip.

Jack Noke MADANG

Maski tok nogut long niuspepa

Dia Edita,

Long Wantok niuspepa bilong Desemba 22, mi bin ritim wanpela kain tok pilai we P.S. Origini bilong Mosbi i raitim.

Em i no gutpela long putim kain tok pilai long Wantok niuspepa. Bikos ol pipel, we planti bilong ol em ol kristen

lain tu i save ritim. Na taim ol i ritim dispela kain tok pilai olsem yu raitim, ol bai pilim nogut.

Yu lukim tok i stap long Efeses 4: 4-4.

Sapos yu wanpela kristen na yu no skelim tok bilong yu na putim long Wantok, mi no

wanbel wantaim yu.

Moabeta yu ritim ol dispela toktok bilong God na em bai helpim yu. Sapos yu mekim gutpela tok long niuspepa, em i orait. Tasol tok nogut i no inap helpim manmeri.

Mutone Kel LAE

Ol Finsafen mas soim rispek long ol hailans

Dia Edita,

Mi laik autim bikipela belhevi bilong mi i go long ol manmeri bilong Finsafen long Morobe provins.

Olgeta taim mi save lukim ol lain brata susa long hailans i save kamap long Finsafen long baim buai, tasol ol asples manmeri i no save mekim gut long ol.

Ol trangu hailans ya i lusim bikipela moni long baim ka na sip i kam long ples bilong mipela long Finsafen long baim buai. Tasol ol manmeri bai tok nogutim ol na mekim ol kainkain tok beksait long ol.

Mi ting dispela i no wanpela gutpela pasin. Bikos yumi long Finsafen i gat dispela nem kristen i stap wantaim yumi.

Olgeta taim yumi save opim maus long

haus lotu long singsing na prea. Tasol pasin bilong helpim narapela na laikim narapela brata susa i no gat long yumi.

Mi ting Luteran sios i westim taim bilong em nating long lainim yumi long tok bilong God. Tasol kaikai bilong wok ya i nogat tru.

Long bikipela sip bilong Luteran Siping, ol wokman bilong sip i

no gutpela tumas long ol arapela husat i ron long sip. Plis yumi karim nem bilong Luteran sios long sip na tu long haus lotu. Olsem na mekim samting stret long soim olsem yumi kristen manmeri.

Em tasol belhevi bilong mi.

Nick Tazimo FINSAFEN

YU MAS RAITIM NEM NA ADRES BILONG YU



Sarip sot tumas long ol longpela man

Dia Edita,

Komplon bilong mi i go long ol kampani i save wokim sarip. Mi no amamas long ol sarip we ol i katim sot tumas.

Kampani i mas tingim tu olsem i gat sotpela na longpela man long dispela graun. Yumi ol man ino wankain. Olsem na kampani i

wokim ol sarip i mas tingim dispela na katim longpela na sotpela sarip.

Mipela ol longpela man i save kisim taim stret long baksait i pen taim mipela i yusim sotpela sarip.

Mi ken tok olsem ating Bogenvil tasol i bin luksave long dispela

samting bipo na salim ol gutpela sarip.

Tasol long nau, taim ol hevi long Bogenvil i stap, mi no save wanem kampani long wanem hap tru i wok long salim ol sarip i kam long Bogenvil.

Johnny Rema Elutupan BUKA

The Word Publishing group of Newspapers

PNG

BUSINESS

SPORT
Weekend

THE TIMES

of Papua New Guinea

WANTOK

NIUSPEPA BILONG OL PAPUA NIUGINI STRET


We've got PNG covered



ALL THE NEWSPAPERS FOR ALL THE PEOPLE

THE TIMES

of Papua New Guinea



The decision makers paper

Always a step ahead with

- * LOCAL NEWS
- * INTERNATIONAL NEWS
- * CHURCH NEWS
- * REGIONAL NEWS
- * LIFESTYLE NEWS
- * COMMENTARY NEWS
- * BUSINESS NEWS
- * SPORTS NEWS

and much more for our readers!

We will keep you on track with the TIMES weekly in 1995.

So hurry, don't miss out on this weeks addition!

**To advertise ring
Phone: 25 2500 Fax: 25 2579**

LAE BISCUIT



RAGBI LIG

NIUS

LAE BISCUIT



Manki Westen provins winim pinis wan yia kontrak long pilai long Australia

IAN KAKARERE i raiim

WANPELA manki Westen provins i gat sans nau long pilai ragbi lig insait long Nu Saut Wels, Australia long dispela yia. Dispela pilaia em Nelson Gamai, husat i gat 22 krismas na i bilong ples Kaviananga long Westen provins.

Gamai i kisim kontrak pinis long pilai long Mur Willum Bah Mustangs ragbi klap long Nu Saut Wels long wanpela krismas.

Gamai i bin pilai wantaim Kiunga Brothers long foapela krismas bipo. Em i bin pilai tu insait long skul bois resis taim em i bin skul long Kiunga hai skul.

Long 1988, Gamai i bin memba bilong anda 60 kilogram tim husat i bin go pilai raun long Kwinnslen na Nu Saut

Wels. Long dispela raun, Gamai i prenim wanpela manki Kwinnslen. Boi ya em Jamie O'Connor.

Insait long foapela krismas i go pinis, Gamai wantaim O'Connor i wok long salim ol pas i go i kam na tupela i kamapim gutpela prensip tru.

Long las yi, Gamai i askim O'Connor sapos i gat spes long pilai ragbi long Australia lig tim. O'Connor i save pilai wantaim Murwillumbah Mustangs klap.

O'Connor i bin askim klap opisel bilong em na ol i orait long Gamai i ken pilai long pri sisen trening wantaim ol.

Ol Mustangs opisel i bin amamas tru long pilai bilong Gamai na ol i givm em wan yia kon-

trak long pilai long klap.

Gamai i bin driman long pilai insait long Winfield Lig resis long Sidni.

Gamai i no inap long bungim wanpela sans olsem long PNG yet. Bikos i gat planti biknem PNG pilaia i save stap long ol biktaun olsem Mosbi, Goroka, Hagen, Lae na Rabaul.

Gamai i bin tokaut olsem i hat tru long pilai long ol tim insait long Sidni lig. Bikos trening long ol klap insait long Nu Saut Wels na Kwinnslen i save hatpela tru.

Gamai i tok trening bilong Mustangs klap em hatpela na ol i save trening strong tru long winim kontrak bilong ol.

Em i tok em i gat gutpela sans nau long pilai insait long ol Winfield lig resis long bihain.



• Nelson Gamai i sindaun namba tu long raitan i kam long fran lain. Em i sindaun wantaim tim bilong em long Kiunga lig, Brothers.

Gamai i tok insait long ol Australia lig resis, i save gat ol skaut opisel husat i save raun na lukluk long ol pilaia. Sapos ol i bungim wanpela gutpela pilaia, ol i save kisim em na askim em long joinim klap bilong ol insait long Winfield lig long Sidni.

Tupela Pepsi op sisen tim bai baim K50 fain

JACK AMI i raitim

TUPELA tim bilong Pepsi Op Sisen lig tonamen long Mosbi i mas wanwan baim K50 fain. Bikos ol sapota bilong tupela i mekim sampela bikhet pasin long gem bilong las wik Sarere.

Tupela tim ya i bin bung long wanpela gutpela strongpela gem, em i bin kamap long ples Manumanu ausait tasol long Mosbi siti.

Tupela tim ya i joinim resis nupela tasol. Nem bilong tupela em Sen Vincent na Tokarara. Eksekutiv komiti bilong tonamen wantaim go pas bilong presiden George Kaupa na deputi bilong em, Jack Talai i kisim dispela nupela tim long pinis bilong yia 1994.

Talai i tok dispela tupela tim i mas baim fain bilong tupela bipo long resis bilong dispela wiken. Sapos nogat bai tupela i lusim gem long ofset.

Em i tok olsem tupela nupela tim, ol i skelim

pilai na pasin bilong tupela tim ya. Na long dispela yia, ol opisel bai skelim na tokaut sapos tupela tim ya bai joinim gen resis o nogat.

Tupela tim ya i bung long wanpela strongpela gem stret we skoa bilong namba wan hap i klostu. Ol siti boi bilong Tokarara i skoarim 8-pela poin, na haiwe boi bilong Sen Vincent i skoarim 6-pela poin.

Ol namba wan trai bilong Tokarara i kam long Joe Maggio husat i skoarim wanpela trai, na fulbek Vagi Lai i kikim wanpela penelti na kik bilong tupela poin. Long Sen Vincent em Barnabas Gorogo i skoarim wanpela trai na Steven Tokau i kikim kik bilong tupela poin.

Long stat bilong namba tu hap bilong gem, tupela sait wantaim i pilai strong tru.

Ol pilai i go na long 40 minit, ol bikipela fowat bilong Sen Vincent wantaim go pas bilong kepten Fred



• Ol bol Tokarara.

Arua, Tore Sarea, Felix Hurae na Gorogo ran strong na laik go insait long trai lain bilong Tokarara. Dispela em bihain long faiv eit Archie Mai junia i kamapim liklik spes wantaim stail pilai bilong em. Tasol ol siti boi wantaim go pas bilong Willie Arua, Rex Aisi, Maggio na Micheal Lucas i sanap

strong na putim ol fowat bilong Sen i go bek.

Senta bilong Sen Vincent, John Ma'a meknais long 45 minit taim em kisim wanpela bal i kam long ol birua pilaia, na spit long sait lain i go long skoa. Tokau kisim kik bilong tupela poin long arere tru. Tasol em makim gut na

seilim bal i go insait long brukim skoa bilong Sen Vincent i go antap long 12 na Tokarara stap yet long 8.

Taim 10-pela minit bilong pilai i stap yet, ol Tokarara pilaia i traim olgeta stail long skoarim wanpela trai na winim gem. Tasol banis bilong ol Sen boi i strong tru.

Referi Sarea Fareho i stapim gem tupela taim. Dispela em long taim ol pilaia bilong tupela tim wantaim tro-moi han i go i kam. Ol sapota long sailtain tu i go insait long fil na joinim.

Pilai stat gen na klostu long pinis, fowat Felix Hurae brukim banis na givm wanpela gutpela bal long Allan


Solien, husat i skoarim wanpela trai long ful taim stret. Na tupela tim i dro.

Ol pilaia husat i pilai strong tru long Sen Vincent em Arua, Sarea na Ma'a. Na Jimmy Lalatute wantaim Paul Kautete i pilai strong tru long Tokarara, bipo tupela lusim fil bikos tupela kisim bagarap.



• (antap) - Lelea tim bilong Pepsi Op Sisen ragbi lig tonamen. Long gem bilong las wiken, ol i nekim Poreporena 16-12.

• (raithan) - Em stail bilong hatim skin tasol. Volibal resis long Lepwing Draiv, Godens long Mosbi las wiken. Pilal i kamap namel long PX na Sogu.



• Sab Siti Raiders laik autim bal taim em bungim Poimo pilala. Dispela em long Pepsi op sisen lig resis las wiken long ples Manumanu, ausait tasol long Mosbi siti.



• Mosbi Pablik Sevan soka resis i stat gen las wiken. Poto solm NPF pilala popala long stapim bal em pilala bilong Teacher i kikum i go namel long lek bilong em. Tupela tim i dro 1-1.

LAE WOMENS SOFTBALL ASSOCIATION

1994-1995 SEASON - ROUND 2 DRAW 7 14/1/95

Time	Teams	Vs	Teams	Diamond	Umpires
09.00-10.15	Fireballs	vs	Coronation (jnr)	1	W. Wanma
10.30-11.45	Fireballs	vs	Coronation (l)	1	P. Pasen
12.00-01.15	Defence	vs	Elcees (l)	1	Emily F/Balls
1.30-02.45	Taubar	vs	Medics (l)	1	L. Sadgrove
3.00-04.30	Sharks	vs	Gans (l)	1	P. Katusela
9.00-10.15	Defence	vs	Elcees (jnr)	2	D. Kehono
10.10.30-11.45	Westpac	vs	Aviat	2	H. Costigan
12.12.00-1.15	Karanas	vs	Wantoks	2	M. Lunny
13.13.30-2.45	YMCA	vs	Kabiu	2	T. Sapul
15.15.00-4.30	Manalos	vs	PX	2	R. Nenmale
09.09.00-10.15	Sharks	vs	Gans (jnr)	3	A. Ilikis
10.10.30-11.45	Unitech	vs	Karanas	3	BSP
12.12.00-1.15				3	
1.30-2.45	Westpac	vs	Royals	3	Unitech
3.00-4.30	YMCA	vs	BSP	3	Royals
09.09.00-10.15	Taubar	vs	Medics (jnr)	4	A. Hungrabos
10.10.30-11.45	Taubar	vs	Medics (lr)	4	Keith
12.12.00-1.15	Sharks	vs	Gans (lr)	4	J. Ajgilo
1.30-2.45	Fireballs	vs	Coronation (lr)	4	C. Yawing
3.00-4.30	Defence	vs	Elcees (lr)	4	Kakare

RESULTS 7/1/94

1. Defence	7	Bismark	0	(Forfeit)
2. Malagan	7	Coronation	0	(Non payment of Affil. fees)
3. Elcees	7	Taubar	0	(Non payment of affil. fees)
4. Medics	8	Fireballs	4	

LAE WOMENS SOFTBALL - POINTSLADDER

League	L/Reserve	Junior
Bismark	8	2
Coronation	0	0
Defence	4	4
Elcees	11	10
Fireballs	5	0
Malagan	8	4
Medics	8	6
Taubar	4	-
Division 1		
Air Niugini	1	
Aviat	6	
Kabiu	6	
Karanas	12	
Manolos	4	
Wantoks	0	
Westpa	6	
YMCA	5	
Division 2		
BSP	8	
Karanas	8	
Royals	6	
Westpac	0	
Unitech	0	
YMCA	4	

UNAGI OFF SEASON LEAGUE DRAW S

Saturday 14/01/95 (field one)

Times	Teams	Div
1000am	5 Mile vs 4Mile Youth	C
1100	7Mile vs G/Ridge	C
1200pm	Hawks vs Siane	C
0100	D/Brothers vs W/Sua	C
0200	S/Hawks vs Siane	B

Field two

10.00	E/Boroko vs 3/4 Mile	C
11.00	M. Tobo vs 6 Mile	C
12.00	8 Mile vs Makana	C
1.00	Saraga vs Sharks	C
2.00	M. Tobo vs 6 Mile	B

Sunday 15/01/95

1000am	7 Mile vs G/Ridge	B
1100	D/Brothers vs Wara Sua	B
1200pm	5 Mile vs 4 Mile	B
0100	S/Hawks vs Siane	A
0200	5Mile vs 4 Mile	A
0300	D/Brothers vs Wara Sua	A
0400	7Mile vs G/Ridge	A

Field 2

10.00	8 Mile vs Makana	B
11.00	E/Boroko vs 3/4 Mile	B
12.00	Saraga vs Sharks	B
1.00	8 Mile vs Makana	A
2.00	E/Boroko vs 3/4 Mile	A
3.00	M. Tobo vs 6 Mile	A
4.00	Saraga vs Sharks	A

Man of the Match Awards
Courtesy of City Pharmacy

PORT MORESBY MENS SOFTBALL ASSOCIATION

1994-95 SEASON

Round 1 - Week 9

Sunday January 15, 1995.

Time	Grade	Team	Vs	Team
09.00am	C	Malagan	vs	Karanas
10.30am	A	Manolos	vs	Post Hawks
12.00pm	A	Taubar	vs	MSC
01.30pm	A	Bears	vs	Tigers
03.00pm	A	Manolos	vs	Gazelle
Diamond Two				
09.00am		F R E E		
10.30am	B	Bears	vs	Dolphins
12.00pm	B	Bay	vs	Gazelle
01.30pm	B	PNGBC	vs	Bus. Sys. Elcom
03.00pm	B	Taubar	vs	Karanas
Diamond Three				
09.00am	C	F R E E		
10.30am	C	Admiralty	vs	Tigers
12.00pm	C	Manolos	vs	Raiders
01.30pm	B	Malagan	vs	Hawks
03.00pm	C	Dolphins	vs	MSC
N O T E	A	Bus Sys Elcom	bye	
	C	PNGBC	bye	

FRENCHBAKEHAUS



• CAKES

Weddings & Birthdays
Our speciality

25 1266 Pom
42 5349 Lae

FRENCHBAKEHAUS



• CAKES

Weddings & Birthdays
Our speciality

25 1266 Pom
42 5349 Lae

PROVINSAL SOKA NIUS

1996 em gutpela ya bilong statim Kostel Ragbi Lig resis

Klia long em!

JACK AMI I raitim

AIDIA bilong kirapim Kostel Ragbi Lig Asosiesen long dispela ya ating i hariap tumas.

Presiden bilong Pepsi Op Sisen tonamen, Jack Talai i tokaut olsem long las wik Tunde. Em i tok ol lain i laik kirapim dispela resis i no toktok gut wantaim lig bilong em, bipo ol i tokaut long dispela aidia long niuspepa.

Dispela aidia i kamap taim ol bikman bilong Mosbi Winfield Lig resis i rausim tupela Papua tim long resis bilong dispela ya. tupela tim ya em DCA na Hawks. Ol boi Porebada i save pilai long DCA, na ol boi Hanuabada i save pilai long Hawks.

Tupela arapela lig Mosbi lig i rausim em Air Niugini na Waliya.

Talai i tok Pepsi lig i ran gut wantaim 16 tim olgeta we 9-pela i bilong Sentrel provins. Ol tim bilong Sentrel em Koiari, Tauruba, Manumanu, Poimo, Sen Vincent, Bogi, Lealea, Maria na Opongo.

Em i tok Pepsi Op Sisen lig i ogenais na ran gut, sapos wangepela i makim wantaim ol arapela op sisen lig insait long kantri.

Em i tok dispela Kostel Ragbi

Lig Asosiesen i mas kamap long 1996 na i no long dispela ya. Bikos olgeta samting i no redi yet. Na tu pipel bilong ol ples long Sentrel provins i no glasim o paitim toktok yet long dispela aidia.

Tupela bikman husat i kamap wantaim dispela aidia em Tara Gau na Heagi Isaiah. Talai i tok dispela tupela bikman i mas kisim tingting bilong ol tim husat i pilai nau long Pepsi Op Sisen lig tonamen.

Talai i tok dispela aidia i gutpela. Bikos em bai givim sans long ol yangpela man bilong ol ples long Sentrel provins long kamapim na soim stail bilong ol long pilai lig. Tasol em i gutpela long glasim tu ol hevi taim lig ya i kamap.

Em i tok namba wan samting ol i mas lukluk em long sponsa, insurens, ol referi bilong lukautim gem, hamas tim bai pilai, na wanem fil bai ol gem i kamap.

"Tupela ya i go pinis Pepsi Lig Komiti i bin kamap wantaim dispela aidia. Tasol aidia ya i no go het bikos ol i bungim hevi bilong painim sponsa," Talai i tok.

Em i tok moa olsem long statim wangepela nupela lig, dispela lig mas gat namel long K20,000 na K30,000. Na ol kampani bilong sponsaim resis bai glasim gut olgeta hap em pilai bai kamap.


Tasol Talai i sapotim dispela mov na tok wangepela interim komiti i mas kamap pastaim long stretim olgeta wok, na tu long painim wangepela sponsa.

PEPSI OP SISEN LIG TONAMEN

Ol skoa bilong las wiken:

1. Tokarara dro Sen Vincent 18-18
2. Tatana dro Koiari 4-4
3. Lealea def Poreporena 16-12
4. Bogi def Manumanu 16-12
5. Vabukori fofit Taurubu
6. Opongo dro Waigani 10-10
7. Sabama def Poimo 5-4
8. Hohola def Maria 8-4

• Olgeta gem bilong las wiken i bin kamap long ples Manumanu ausait tasol long Mosbi siti.



• Emily putim ai long bal na lak setim wan pilala long baksait. Kain stail oslem i bin kamap long resis bilong las wiken long Lepwing Draiv, Godens. I no resis tru. Nogat. Em ol manmeri na pikinini long hap i bung tasol long amamasim wiken. Moa gem bal kamap long dispela wiken. *Poto: Ivan Bayagau.*

Gazelle gat sans long nekim ol boi Manolos

MOSBI SOFBAL RIPOT

HELEN REI I raitim

OLPELA sempion Manolos bai bungim Gazelle long bikipela gem bilong Mosbi softball resis bilong ol man long dispela wiken.

Olpele sempion tim i lusim pinis tripela gem wangepela bihain long narapela. Bikos pitsa bilong ol Isimel Marnapai i no bin pilai. Isimel em wangepela pilala husat i strongim Manolos long winim gren fainal na taitel bilong las ya.

Tasol Emil Lucas i kisim nau dispela hatwok, na save pitsim bal long lephan. Emil i liklik brata bilong Lucas Wamilala, wangepela top pitsa bilong Papua Niugini husat i save pits long NGI tim.

Bipo Emil save pilai long outfil posisen. Tasol em i go pits nau na kepten Simon Sirimai wantaim Lipirin Palangat i go long outfil posisen.

Manolos i gat inap gutpela pilala olsem Sirimai, Oscar Karai, Chris Timmy, Robert Mago na olpela nem pilala, Ron Rolly long

kisim ples bilong ol pilala i no sambai o stap long pilai.

Ol boi Gazelle i bin malolo long las wiken. Olsem na ol i kisim gut win long pretim stretim Manolos.

Gazelle i lusim wangepela gem tasol egens Hawks, husat i go pas nau long poin lada bilong resis. Sampela nem pilala bilong Gazelle i go long ol arapela tim. Tasol Gazelle i no lusim stail bilong em long win, olsem em i bin soim long ol gem bilong em.

Gazelle i dro long tupela gem egens Elcom na Malangan, na winim 4-pela. Las gem bilong ol long raun wan bai kamap long dispela wiken bihain long longpela holide.

Gazelle i sindaun long namba tu ples long lada wantaim NGI long 10 poin. Tasol NGI i go pas liklik bikos long gutpela pesen. Tupela wantaim i mas win dispela wiken long holimpas posisen bilong tupela. Sapos tupela wantaim i win, bai poin bilong tupela goap i go antap long 11.

Gazelle i redi gut tru

long dispela wiken gem. Em i gat inap gutpela pilala olsem Hosea Utul, Joachim Kiliu, Tony Dapal, Peniel Elieb, Titus Kabi, Peter Urari, Junior Kalas, Francis Timber na Patrick Pilak.

Tupela pilala, Aquila Burat na Jerry Albert i bin go holide na kam bek pinis. Na Pius Martin husat i lusim 4-pela gem bikos long wok bai joinim tim tu long dispela wiken.

Em bai wangepela gutpela gem tru long lukim. Na sapos Marnapai i pilai, em bai

bungim birua namba bilong em, Pilak. Tupela tim wantaim i gat wankain strong. Tasol Gazelle bai kisim fil wantaim gupela sans long win.

Long ol arapela gem, Malangan bai bungim top tim Hawks, na NGI bai pilai kaskas long MSC, husat i salim kaikai long Malangan long bikipela skoa stret. Narapela gutpela gem bai kamap namel long Fuji wantaim City Tigers. Fuji i bin nekim olpela sempion, Manolos, na bai sambai long givim wankain mekim-save long ol boi Tigers.

PORT MORESBY WOMENS SOFTBALL ASSOCIATION 1994/95 SEASON DRAW - ROUND ONE WEEK 12 - 14/01/95

Diamond One

Time	Gr	Fixtures
9.00	AR	UPNG 1 vs R/Q Royals 11
10.30	AR	Fujitsu 11 vs Mazda Carps 11
12.00	A	Lotto Stars 1 vs Yokomo 1
13.30	A	G/Malangan 1 vs R/Q Royals
15.00	A	Mazda Carps 1 vs Isuzu Karanas 1
16.30	A	Fujitsu 1 vs Fairdeal Gazelle 1

Diamond Two

10.30	C	Pomtech 1 vs Garamut Country
-------	---	------------------------------

Diamond Three

9.00	C	PNGBC Arch. 11 vs Lotto Stars
10.30	C	Admiralty 11 vs Norths 11
12.00	C	UPNG 11 vs Dolphins 11
13.30	AR	C/Exodus 1 vs Elcom 1
15.00	AR	Norths 1 vs Tarangau 1
16.30	AR	G/Country 1 vs G/Tarangau 11

Bye:

- *A* Shell Wantoks 1
- *C* Isuzu Karanas 11

PLAYER PROFILE:

FULL NAME: Emily Lafa
NICKNAME: Emmax
AGE: 19 years
MARITAL STATUS: Single
VILLAGE: Moveave
PROVINCE: Gulf
HEIGHT: 162 cm
WEIGHT: 50 kilogram
OCCUPATION: Shop assistant at Prestige Shoes
STAR SIGN: Leo
SPORT: Volleyball
POSITION: Any position
FAVOURITE OVERSEAS CLUB: Brisbane Broncos (Sydney Winfield League)
FAVOURITE OVERSEAS PLAYER: Willie Carn (Broncos)
FAVOURITE RADIO STATION: 96 Nau FM
FAVOURITE SINGER: Bon Jovi
FAVOURITE ACTOR: Tom Cruise
FAVOURITE MUSIC: Gospel

FAVOURITE TV PROGRAM: Neighbours
FAVOURITE MOVIE: Master of the Universe
FAVOURITE FOOD: Rice and chicken
FAVOURITE DRINK: Orchy
FAVOURITE HANGOUT: Ela Beach
FAVOURITE RELAXATION: Watching TV
WHAT WOULD YOU DO IF YOU WON LOTTO? I would buy a Pajero (my dream car).
HOW WOULD YOU DESCRIBE YOUR FUTURE MAN: A person who does not smoke and consume alcohol and must also consider my views before making a decision. A person of that character should make a good future man for me.
LIKES: Praying Roseary
WHAT IS YOUR DREAM CAR: Pajero
BAD HABITS: Nil
MOST ADMIRED PLAYER: Iamo Launa
GREATEST AMBITION: To become a pilot.

Compiled by Leo Wafiwa

Bisini bai paia long ol biknem tim long wiken

BIKPELA salens long dispela wiken bai kamap namel long Air Niugini na Deced long Mosbi pablik sevans soka resis long Bisi nis soka graun.

Ol fowet lain bilong Deced i gat moa pawa long sut long longwe na tu long brukim banis bilong birua tim. Olsem na dispela pilai bilong ol inap givim bikipela mekimsave long golmak bilong Air Niugini.

Pablik Sevans Kap resis.

Tasol ol balus boi bilong Air Niugini tu i no inap larim Deced i soim stail bilong ol long pes bilong em. John Forowa bai traime long holim gut stia bai winim dispela salens.

Clement na John bai bungim bikipela salens long Adam na ol boi bilong em long Deced. Tasol husat kepten i holim gut stia bai winim dispela salens.

Narapela gutpela pilai bai kamap tu em ol skul Teachers na ol bisnis lain bilong Invesmen Kopresen.

paia lait man na olgeta sans em bungim, em i no save westim taim long straikim long mak. John Bips na ol boi long midfil eria bilong Teachers bai pilai strong long winim dispela gem bikos ol i mas win na kamap lida bilong dispela pul.

long strongim difens taim pilai i go strong.

Na dispela hevi tasol i ken givim hevi long Invesmen Kopresen.

Ol manki loya bilong Atoni Jenerel bai traime strong bilong Trens spot na dispela bai wanpela strongpela gem bikos Trens spot bai tingting long win.

Trens spot i bin dro long las wiken egens ol redio man bilong NBC na dispela bai kirapim bel bilong Trens spot long i mas winim gem bilong em.

Trens spot i gat ol gutpela pilai o i sem i

Fidelis, Eli Mali Desmond Waku na ol arapela yangpela manki tu.

Pilai bilong Trens spot i save kamap gut tru na ol i gat nem long kamapim belhevi long husat tim i laik salensim ol.

Atoni Jenerel em ol lain husat i no save westim taim wantaim bal long fil. Na dispela em wanpela kain stail bilong ol we ol inap kamapim hevi long Trens spot sapos Trens spot i no glasim gut stail bilong Atoni Jenerel.

Tupela tim ya i gat nem long ol gutpela stail na strongpela pilai bilong tupela. Bikos i gat tu planti ol trikman na gutpela pilai i stap long tupela tim wantaim.

Papa bilong Deced, Adam Lema bai i gpas long ol yangpela boi bilong em long dispela pilai.

Midfil eria bilong Deced tu i gat pawa long stapim ol strongpela salens em ol birua tim i ken kamapim.

Deced i bin soim pinis planti gutpela stail bilong pilai long prisisen na em i no inap givim moa sans long dispela taim bilong

Namba pailot bilong John em Clement Anisana na em tu i gat planti gutpela eksperiens long abrusim ol taim no gut bilong birua.

Ol tisa i gat gutpela na strongpela fowet lain bilong ol na ol inap long mekim Invesmen Kopresen i wari sapos ol i no was gut.

Straika bilong Teachers, Kobi em wanpela



• Kas bilong Teachers i stapim bal na i laik salim long wanpela bilong em tasol birua bilong NPF i sanap pinis na banisim rot. Tupela tim wantaim i mekim save long brukim bun tasol no gat na tupela dro 1-1. Poto Yakam Kelo

Ol wanpelaia bung na nekim Yuni

YAKAM KELO I raitim

WOK poroman bilong Raymond Nasa na Francis Moyap i helpim PTC long autim tiket bilong Yunivesiti 5-3 skoa insait long Mosbi Pablik Sevans soka resis long las wiken.

Moyap wantaim Nasa husat i bin wanpelaia long Lae skwat bipo i bung gen long Mosbi na kamapim gen olgeta stail bilong tupela long bipo we i helpim PTC long winim Yunivesiti.

Tripela intanesenel pilai, Raymond Nasa, Francis Moyap, na Steven Mune i bung wantaim gen na yusim eksperiens bilong tripela long fowet lain bilong PTC we tripela i kamapim gutpela stail long pilai.

Yunivesiti i bin luksave long dispela na long nambawan hap bilong pilai, Yunivesiti i

no westim taim long skoa.

Nambawan gol bilong olpela intanesenel na PNG asisten kosa, Robert Popat i kirapim bel bilong Yunivesiti long skorim tupela gol moa long go pas long PTC.

Steven Mune bilong PTC i kisim wanpela gutpela bal i kam long Koale Baining na skorim nambawan gol bilong PTC long nambawan hap. Long hap taim Yunivesiti i go pas long skoa 3-1 egens PTC.

Long namba tu hap bilong pilai, Francis Moyap i kisim wanpela gutpela bal i kam long Raymond Nasa na putim stret long umben bilong Yunivesiti.

I no longtaim, Raymond wantaim Lussel Pui i wok strong long midfil na salim wanpela gutpela bal i go long Francis Moyap na em skorim namba 3 gol.

Tupela tim wantaim ron wankain long 3-3 skoa.

Narapela PNG pilai, Simon Emmanuel wantaim Panu i wok hat tru long midfil bilong Yunivesiti long skoa egens PTC. Tasol fulbek bilong PTC, Peppy Pombuai i sanap strong long rausim olgeta sans bilong Yunivesiti long skoa.

Olgeta stail bilong Francis Moyap wantaim Raymond long bipo i kamap gen. Francis i salim wanpela bal i go insait long spes we Raymond i ron i go insait na salim bal ya i go pas long golmak bilong Yunivesiti we PTC i go pas long 4-3 skoa.

Klostu long fultaim, Lussel Pui wantaim Koale Baining i sapot wantaim na givim wanpela gutpela bal tru long Steven Mune na em tromoi longpela lek bilong em antap na

salim bal ya i go pas long umben bilong Yunivesiti. Dispela i kamapim namba 5 gol bilong PTC long winim gem egens Yunivesiti.

Dispela i bin wanpela gutpela na strongpela gem tru long Sande apinun.

Long arapela resis bilong Pablik Sevans soka, NPF i soim olgeta strong bilong em long traime autim tiket bilong Teachers tasol em i popaia na tupela i dro 1-1 long fultaim.

Ol boi bilong Teachers tu i no bin kamap gut long taim na dispela em wanpela hevi we i stapim ol long i no pilaim stret stail bilong ol. Long dispela as, NPF i holim ol 1-1 long fultaim.

Bikipela salens namel long ol redio man bilong NBC na Trens spot tu i kamap long 1-1 dro long fultaim.

PNGFA laikim ol liklik senta tu long tonamen

YAKAM KELO I raitim

SEKETERI bilong Papua Niugini Futbol Asosiesen (PNGFA) i askim olgeta liklik soka senta long pilai insait long ol nesanel tonamen we bai i kamap klostu long ol.

Seketeri, Don Sigamata i tok taim nesanel tonamen i kamap long wanpela provins, ol arapela liklik distrik o stesin husat i stap klostu long dispela taun, i mas yusim dispela sans long pilai tu.

Don i tok dispela ya bai i gat nesanel anda 17 tonamen. Olsem na olgeta senta i mas kisim anda 17 skwat bilong ol na kamap long tonamen ya bai nesanel junia kosa i ken makim PNG skwat bilong em.

Bai i gat Osenia Anda 17 tonamen long dispela ya. Olsem na PNG i mas redim wanpela junia tim bilong go insait long dispela Osenia tonamen.

Don i tok long arapela bikipela tonamen we i save kamap long Mosbi, ol

senta olsem Kerema, Popondeta na Hoods Asosiesen insait long Sentrel provins i mas soim pes tu.

Long dispela ya bai i gat PNGFA Kap tonamen long Mosbi na seketeri bilong PNGFA i laikim bai ol arapela senta husat i stap klostu i mas salim tim bilong o i kam. Dispela em i sans bilong ol tim long soim pilai bilong ol long kain tonamen olsem we i kamap klostu long ol.

Don i tok ol senta olsem Kerema i bin salim toksave pinis olsem ol i laik memba long PNGFA long dispela ya. Bikos ol tu i save pilai soka long Kerema na i laik soim aut pilai bilong ol tu long ol kain nesanel tonamen.

Em i askim tu Hoods Asosiesen insait long Sentrel provins long soim pes tu long ol nesanel tonamen olsem.

Planti bilong ol bai i no gat sans yet long stap insait long nesanel seleksen bilong Saut Pasifik Gems. Tasol em i sans bilong ol long soim ol yet we bhain taim bai sampela bilong ol i ken kamap long nesanel skwat.

PUBLIC SERVANTS VOLLEYBALL ASSOCIATION POINTS LADDER ROUND 4: WEEK ENDING 08/1/95

WOMEN

TEAM	P	W	L	WF	LF	NM	SF	SA	PF	PA	P%	MP	
Post PTC	4	4	-	4	-	-	12	1	192	78	2.46	8	
UPNG	4	4	-	2	-	-	12	3	270	98	2.21	8	
Works	4	3	1	1	-	-	10	5	191	148	1.29	7	
Nat/Parl	4	3	1	-	-	-	10	7	223	205	1.09	7	
IRC	4	2	2	1	-	-	9	7	206	158	1.3	6	
Finance	4	2	2	-	-	-	5	8	150	159	0.94	6	
BPNG	4	2	2	1	1	-	6	4	135	133	1.02	5	
NHC	4	1	3	-	-	-	6	11	171	224	0.76	5	
Sika Fire	4	1	3	-	-	-	5	9	126	190	0.66	5	
Sports Com	4	2	2	1	2	-	6	7	95	111	0.86	4	
NCDC	4	1	2	1	-	-	1	3	5	93	75	1.24	4
Lands	4	-	3	-	-	-	1	3	8	119	151	0.79	3
Education	4	1	2	-	2	1	3	6	45	125	0.36	2	
NRI	4	-	4	-	2	-	2	12	85	200	0.43	2	
Health	4	-	3	-	1	1	2	8	64	136	0.47	2	

MEN

UPNG	4	3	1	2	-	-	11	4	199	103	1.93	7
Lands	4	3	1	2	-	-	9	5	185	108	1.71	7
Sika Fire	3	3	-	-	-	-	9	2	160	116	1.38	6
NHC	4	2	2	1	-	-	9	5	170	122	1.39	6
PTC	4	2	2	1	-	-	8	7	194	139	1.4	6
NCDC	4	2	2	-	1	-	7	7	141	142	0.99	5
Works	4	2	2	-	1	-	6	9	140	192	0.73	5
Nat/Parl	3	-	3	-	-	-	4	9	136	187	0.73	3
BPNG	4	-	3	-	1	2	3	3	46	73	0.63	2
Education	4	1	2	-	2	1	3	7	59	135	0.44	2
NRI	4	-	4	-	2	-	1	12	75	194	0.39	2
Health	3	-	2	-	2	1	-	6	90	-	-	-

WF: Win on forfeit
 LF: Loose on forfeit
 NM: No Match
 SF: Sets For
 SA: Sets Against
 PF: Points For
 PA: Points Against
 MP: Match Points

PNGFA bai kamapim komiti bilong ol referi na kosa

YAKAM KELO I raitim

BIKPELA senis bai kamap insait long olgeta wok bilong Papua Niugini Futbol Asosiesen (PNGFA) long kamapim gutpela na strongpela asosiesen bilong ronim soka insait long kantri.

Dispela em wanpela bikipela toktok we olgeta soka opisel bilong wanwan provins na PNGFA eksekutiv i bin sindaun na toktok long en long las wiken long Goroka.

Wanpela long ol bikipela senis insait long wok bilong PNGFA long ronim gut

soka long kantri em long kamapim komiti grup bilong olgeta referi insait long kantri.

Dispela i min olsem olgeta referi i mas stap insait long dispela komiti. Bikos PNGFA bai oltaim sindaun klostu wantaim dispela komiti bilong referi na toktok long ol wok na eria bilong ronim soka long en.

Dispela komiti tu bai givim sans long ol referi long vot long wanem senis PNGFA i laik kamapim.

Olgeta hevi bilong referi tu bai i go stret

long dispela komiti grup pastaim long PNGFA i harim na stretim. Dispela em long banisim soka long ron stret na i no ken bungim ol hevi bilong referi na PNGFA.

PNGFA Teknikel Dairekta bilong ol kosa, ldris Kumbrawah i tok em yet wantaim nesenel het kosa bilong PNG, Posman Kisakiu bai sindaun na wok wantaim long glasim ol rot na senis insait long wok bilong PNGFA.

Kumbrawah i tok dispela komiti bilong referi i no stapim PNG Soka Referis Asosiesen long go het. Ol referi i ken go het yet long

asosiesen bilong ol tasol ol i mas kam aninit long komiti ya pastaim long wanem hevi o ripot i go long PNGFA.

Kumbrawah i tok dispela komiti bai opim dua tu long olgeta referi insait long ol liklik senta long stap insait. As tingting bilong dispela em long kirapim soka tu insait long olgeta liklik senta long kantri.

Olpela presiden bilong PNG Soka Referis Asosiesen (PNGSRA), Mark Kelep i tok dispela em wanpela gutpela senis PNGFA i laik kamapim. Planti krismas i go pinis na dispela samt-

ing i no bin kamap long bungim wok bilong referi i go klostu na strong wantaim PNGFA, Mark i tok.

Mark i tok dispela komiti grup i mas kamap long tingting na rot bilong kirapim stret soka long kantri. Na i no bilong kisim biknem o wokim nem long wanwan man.

Em i tok long pastaim, ol referi i save stap long we liklik long PNGFA taim ol nesenel tonamen i laik kamap. Bikos ol referi i save long PNGFA kalenda tasol ol i no save kisim ripot program bilong bihainim long taim long holim ol nesenel tonamen.

Em i tok ol referi i save stap tasol na kirap i go long holim wisel long taim bilong ol PNGFA tonamen ya.

Mark i tok pastaim, asosiesen bilong ol kosa na PNGFA i no save wok klostu tumas long planti samting. Olsem na em i sapotim dispela nupela senis sapos em i ken kamap tu long bungim wok bilong ol kosa na referi long poroman na ranim soka insait long kantri.

Arapela senis tu we bai i kamap long PNGFA em long kamapim tu wanpela komiti bilong olgeta kosa insait long kantri. Dispela tu bai i wankain long komiti

bilong ol referi we PNGFA yet bai i mas lukluk klostu long ol.

Arapela senis we bin kamap long PNGFA kibung long Goroka las wiken em; Vais presiden bilong PNGFA em Richard Nagai husat em het kosa bilong Lahi Soka Asosiesen (LSA) long Lae.

Richard em wanpela Level 1 kosa na i bin holim eksekutiv wok bilong asosiesen wantaim LFA bipo na bihain wantaim Lahi taim ol i kamapim long las yia.

Vais Tresera bilong PNGFA em Cathy vani na seketeri em John Sigamta i holim yet posisen bilong em.



•Lynette Tokana bilong Praim Ministas dipatmen i ronim bal i go aut long golmak bilong em bihain long Falnens i traim long skoa tasol bal i go na abrus i kam bek. Stralka bilong Falnens, Christine i kamap klostu long kisim bal long Lynette. Ol meri Falnens i bin strong na nekim ol meri bilong Praim Minista, 1-0 long fultaim.

Het kosa laikim moa nem long trening skwat

OL kosa husat i stap insait long PNG Kosing Panel i ken givim nem bilong husat pilaia em ol i ting i mas stap insait long PNG trening skwat, nesenel kosa, Posman Kisakiu i tokaut long dispela.

Long dispela taim yet, nesenel kosa i gat pinis ol pilaia long trening skwat. Tasol dispela trening skwat i gat spes yet long husat kosa i ken salim nem bilong ol pilaia em ol i gat bilip i mas stap long trening skwat.

“Ol kosa husat i stap insait long kosing panel i mas tokaut tu long ol pilaia husat em ol i gat bilip long i mas stap insait long PNG trening skwat bilong Saut Pasifik Gems. Mi bilip long ol kosa bikos ol i save gut long wanwan pilaia.”

Posman i tok ol kosa i save stap long gutpela mak bilong makim ol pilaia bikos ol i save long ol pilaia.

Olsem na sapos ol dispela kosa insait long PNG Kosing Panel ya i gat sampela moa nem bilong ol pilaia, ol i ken salim ol nem ya i go long Posman Kisakiu, John Gringo bilong Madang na seketeri bilong PNGFA; Don Sigamata.

Asisten kosa bilong nesenel kosa, Robert Popat i tokaut long las wiken

olsem ol Mosbi pilaia bai statim trening bilong ol long 4 Februari. Olgeta Sarere moning bai ol i bung long tupela aua trening na bihain ol i ken go het long soka resis bilong ol long apinun insait long Mosbi soka resis.

Posman yet i tokaut tu olsem em i bin toksave pinis long Ludwig Peka bilong LFA, Richard Nagai bilong Lahi na John Gringo bilong Madang long las wik PNGFA miting long statim trening bilong ol.

Em i tok Richard tupela Ludwig i orait long statim trening bilong tupela long wankain taim em long 4 Februari long Lae wantaim LFA na Lahi pilaia.

John Gringo long Madang i tok Madang sait bai holim trening bilong ol insait long mun Januari yet.

Toktok bilong bungim ol pilaia bilong Kimbe, Popondeta, Goroka na Hagen insait tu long holim trening i no klia tumas.

Kosa em ki man bilong kirapim spot

MOA kos na trening i mas kamap long olgeta kosa long apim level bilong ol na kamapim ol gutpela kosa insait long kantri. Wok bilong ol kosa long olgeta spot em bikipela samting long kamapim gutpela pilai long fil na kamapim tu ol gutpela pilaia.

Tim i save bihainim plen bilong kosa

Ol kosa i save mekim pilai i go gutpela bikos wanwan tim i save kamapim kain kain stail bilong ol yet long pilai egensim narapela tim. Na dispela i soim tru save bilong wanwan kosa long givim trening long tim bilong ol.


Wanem tim husat i save marim gut na bihainim stret olgeta toktok bilong kosa, i save winim gem bilong ol. Tim husat i no save bihainim stret gem plen o tingting bilong kosa i save lusim gem bilong ol.

Kosa em man husat i olsem mekenik bilong tim. Wanem hap bilong tim i bagarap o i no wok gut, kosa i mas stretim na lukim olsem olgeta samting insait long tim ya i mas wok stret na ron gut.

Moa trening long kosa

Olgeta kosa i mas go insait long moa trening long kisim moa tingting na opim save bilong ol long wok bilong kosa. Sampela kosa i save gat gutpela plen bilong kamapim long tim bilong em, tasol sampela taim em yet i no save bilip tumas long plen bilong em. Dispela i soim olsem em i mas kisim sampela kain sapot o luksave long arapela olsem olgeta gem plen o tingting bilong skulim ol pilaia em bikipela samting.

Sampela kosa i save subim planti aida o gem plen tumas long tim bilong em na dispela i save paulim luksave bilong ol



pilaia long wanem kain gem plen tru bai ol i mas pilaim long fil.

Long dispela as, i moa gutpela long ol kosa i mas kisim moa trening na kos long wok bilong ol.

Sapos wanpela tim i no gat kosa, em i olsem ol pikinini husat i no gat haus na ol i slip raun nabaut nabaut long ausait.

Apim level bilong kosa

I mas gat strongpela program bilong ol kosa long bung olgeta yia insait long trening o kos bilong ol. Na insait long tes ol i wokim, ol kodineta bilong kos i

ken luksave husat kosa i gat save. Dispela i ken soim aut husat kosa i wok long go daun long save bilong em na husat i wok hat yet long lainim moa long wok bilong em.

Long taim bilong givim setifiket o pepa long soim mak bilong ol kosa, ol i ken save long wanem level bilong kosa em ol i stap long en.

Dispela i mas kamap olsem wanpela samting bilong resis namel long ol kosa yet long traim winim top mak long kisim bikipela level. Na dispela inap kamapim tru nesenel kosa bilong mipela long kantri.

Nesenel kosa bai kamap bihainim level bilong em long trening ol kosa i save kisim na eksperiens bilong em long lainim tim long pilai.

Moa ovasis trening


I mas gat moa ovasis trening o kos bilong ol kosa i kamap long Papua Niugini yet o long ovasis

kantri. Dispela em i rot bilong opim tingting i go moa long kirapim tru save na aida bilong kosa na skelim i kam bek gen long kain stail na trening bilong mipela long kantri.

Sapos PNG i ken kisim ol ovasis saveman husat i gat moa eksperiens long wok bilong kosa i kam long lainim ol kosa bilong mipela, orait i mas gat planti bilong ol dispela kain raun i mas kamap.

Ol kosa i mas traim long kisim wankain level olsem ol kosa bilong arapela kantri i gat long en. Na sapos dispela i kamap tru, ating bai stended na level bilong spot insait long PNG bai kamap strong bikos kosa i gat save long stail bilong arapela kantri na bilong mipela long kantri.

WANTOK SPOTS



Sans bilong PNG long winim Wol 7 asait lig hangamap long ol pilaia

JOE KANEKANE i raitim

SANS bilong Papua Niugini long go insait long fainal bilong Coca Cola 7 asait ragbi lig resis i stap long han bilong ol pilaia tasol. Nesenel Kosing Dairekta bilong Papua Niugini Ragbi Futbol Lig (PNGRFL), Ivan Ravu i tok olsem.

Mista Ravu i tok ol pilaia i mas pilaim gem isi, na kontrolim o lukautim ran bilong ol bai ol i ken ran strong insait long dispela 4-pela 10 minit bilong pilai.

Em i tok long ol yia bipo, ol pilaia i save tekov na pilai strong

long stat bilong gem. Na taim gem i laik pinis, ol i nogat moa inap strong long pilai gut. Olsem na ol i nogat moa strong long holim na takelim gut ol birua pilaia.

"Ol boi bilong mipela i save pilai gut tru long stat bilong gem, na taim gem i go long pinis bilong em, ol i save winsot na mipela save lus long gem. Sapos ol i lukautim ran bilong ol long wanpela spit i go inap long pinis bilong gem, mipela bai gat gutpela sans long win," Mista Ravu i tok.

Nem bilong ol pilaia husat bai makim kantri long dispela bikpela resis em PNGRFL i no autim yet. Tasol long bilip bilong Mista Ravu,

planti nupela pes bai stap insait long tim. Na em i pret olsem dispela kain tim bai nogat ekspiriens long pilai long ol kain gem we i gat bikpela salens stret.

Nesenel kosing dairekta i toktok long ol pilaia i mas lukluk gut long inta senis we ol pilaia i save senis long taim gem i go yet.

Long wanem sapos wanpela pilaia i sotwin tru, wantu tasol kosa i mas senisim em. Long wanem sapos kosa i no mekim olsem, dispela pilaia bai nogat strong long takel. Na narapela tim bai putim trai na mekim tim bilong mipela i lus.

Ol opisal bilong Coca Cola 7 asait resis i tokaut pinis long dri bilong gem. Na Papua



• 1994 PNG tim husat i go lus long Canberra Raiders long plet fainal. Long lephan i go long rait em Buddy Dou (kosa), Aquila Emil, Philip Boge, Michael Tolvita, Tuksy Karu, James Miviri, David Buko, Luke Waldiat, Stanley Haru, John Lynch (trena).

Niugini i stap long pul 7 wantaim Keneda, Japan na Gold Coast. Gold Coast em wanpela tim bilong Sidni Winfield Lig resis.

Long dro bilong PNG, PNG bai bungim Keneda

na Gold Coast wantaim long Fraide Februeri 3, 1995, long nait. Namba wan gem egensim Keneda bai kamap long 6 klok apinun. Na narapela gem egensim Cold Coast

bai kamap long 20 minit i lusim 8 klok nait. Dispela tupela namba wan gem bai kamap long Sun Korp stadium, em bipo ol i save kolim Lang Park. Sapos PNG i winim

tuepla namba wan gem, em bai salensim Japan long go insait long fainal bilong Kap. Tasol sapos em i lus, em bai bungim narapela birua tim long pleit resis.

PUBLIC SERVANTS SOCCER ASSOCIATION NCD PSSA CUP COMPETITION BISINI GROUNDS

14/01/95 Time	Div 1	Fixtures	Ground one
0800am	M4	PTC vs CMB	
0910	W4	Hay vs Deced	
1000	M4	Education vs NCDC	
1110	W4	NPF vs POSF	
1200pm	M4	BPNG vs University	
0110	W3	Prime Min. vs Invest. Corp	
0200	W3	University vs NCDC	
0250	M3	Prime Min. vs DCA	
0400	W3	BPNG vs Finance	
0450	M3	Air Niugini vs Deced	

Div 2 (Bis 2)	14/01/95
0800am	M3 PNGBC vs Hay
0910	W2 DCA vs IRC
1000	M1 NBC vs IRC
1110	W2 Teachers vs Education
1200pm	M1 POSF vs A/General
0110	W2 Works vs Transport
0200	M1 NBC vs A/General
0250	W2 Works vs NPF
0400	W1 Air Niugini vs CMB
0450	M2 Teachers vs Invest Corps

BYE: Team not on draw above are on byes

Div 3 (Bisini 1)	15/01/95
0800am	M4 BPNG vs NCDC
0910	W2 DCA vs Teachers
1000	M1 NBC vs POSF
1110	W2 Air Niugini vs NBC
1200pm	M1 Finance vs Invest Corp
0110	W2 PTC vs A/General
0200	M1 Education vs Transport
0250	W2 A/General vs Transport
0400	W3 Prime Min vs PNGBC
0450	M3 Prime Min vs Invest Corps

15/01/95 Div 3 (Bisini 2)	
0800am	M3 Deced vs DCA
0910	W2 BPNG vs University
1000	M4 Works vs Teachers
1110	W4 POSF vs PNGBC
1200pm	M4 CMB vs University
0110	W3 Hay vs NPF
0200	M4 NCDC vs Finance
0250	M4 BPNG vs PTC
0400	W2 DCA vs Works
0450	M3 Deced vs Hay

Byes: Teams not on draw are on bye
NB: BPNG (M4) and Deced (M3) will play twice today

MOSBI SOFBAL DRO
- pes 29

PNGFA apim afiliesen fi long kisim tim go long Tahiti Gems

YAKAM KELO i raitim

AFILIESEN fi bilong olgeta A Senta bilong Papua Niugini Futbol Asosiesen (PNGFA) bai go antap long K4,000 long helpim PNG soka tim i go long Saut Pasifik Gems long Tahiti em bai kamap long dispela yia.

Olgeta soka asosiesen husat i stap insait long A grup bai baim K500 moa antap long K3,500 ol i save baim las yia long afiliesen fi bilong ol i go long PNGFA.

Dispela em wanpela ripot i bin kamap long bung bilong PNGFA eksekutiv las wik long Goroka, we olgeta soka presiden bilong wanwan asosiesen i bin wanbel long en.

Olgeta soka provins husat i stap insait long B senta bai baim K1,150 long afiliesen fi bilong ol tu long dispela yia. Dispela em K150 i go antap long K1,000 ol i save baim long las yia.

Olpela vais presiden bilong PNGFA na nesenel kosa bilong sinia PNG mens tim, Posman Kisakiu i tok dispela senis i bin kamap long helpim PNG skwat i go pilai

long Saut Pasifik Gems.

Posman i tok kos bilong 24 man husat bai go long SP Gems bai sanap olsem K16,800.

Em i tok K700 em levi fi bilong wanwan pilaia na opisel.

Long dispela as,

PNGFA miting ya i paitim ol toktok i go i kam na wanbel olsem PNGFA bai baim K9,600 bilong PNG skwat. Dispela i min olsem PNGFA bai baim K400 bilong wanwan pilaia na opisel. Na ol opisel na pilaia yet bai baim K300 levi fi bilong ol.

Tasol dispela K300 bilong wanwan pilaia i hat liklik olsem na mit-

ing i pasim tok olsem olgeta pilaia bai baim K125. Dispela bai kamap olsem K3,000. Na wanwan soka asosiesen insait long ol provins bai baim afiliesen fi bilong ol we inap kamapim narapela K4,000 i go long PNGFA.

Dispela mani bilong K3,000 bilong ol pilaia na K4,000 bilong ol asosiesen bai kamap-

olsem K7,200. Na bungim dispela wantaim K9,600 bilong PNGFA bai kamapim K16,800 bilong salim PNG tim i go long SP Gems long Tahiti long mun Julai.

Insait long miting ya, olgeta asosiesen i wanbel long dispela na i redi long helpim PNG soka tim bilong SP Gems.

Lukim ripot long pes 27



Opongo ragbi lig tim • Tim ya i bilong Kairiku erla bilong Sentrel provins. Ol i dro wantaim Walgani 10-10 long Pepsi Op Sisen Iig resis las Sarere. Pilai bin kamap long ples Manumanu. Lukim ful ripot long pes 27. Foto: Jack Ami.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.